

HADIS

Jurnal Ilmiah Berimpak (*Edisi Pertengahan Tahun*)

Diterbitkan Oleh: **Institut Kajian Hadis (INHAD)**
Kolej Universiti Islam Antarabangsa Selangor (KUIS), MALAYSIA

Tahun Pertama, Bil: 1, Syaaban 1432h, (Julai 2011)

Bilangan ini

KATA ALUAN.

Oleh: Ketua Pengarang

SUMBANGAN SYEIKH MOHAMED IDRIS AL-MARBAWI DALAM PENENTUAN IDENTITI PERAWI: TUMPUAN KEPADA KITAB BAHR AL-MADHI.

Oleh: Dr Faisal bin Ahmad Shah.

KETOKOHAN SYEIKH MUHAMMAD YASIN AL-FADANI DAN SUMBANGANNYA DALAM DISIPLIN PERIWAYATAN SANAD.

Oleh : Mohd. Khafidz bin Soroni & Mohd. Norzi bin Nasir.

SYEIKH ABDULLAH BASMEIH BIN MUHAMMAD BASMEIH: KAJIAN TERHADAP MASTIKA HADIS.

Oleh: Mohd Farid Ravi Abdullah.

FORMAT JURNAL HADIS

Jurnal Hadis bermaksud pendokumentasian artikel-artikel ilmiah yang berorientasikan hadis dan pengajiannya. Jurnal hadis diterbitkan sebanyak dua kali dalam setahun.

Garis panduan penulisan artikel:

- 1- Artikel hendaklah menepati tema jurnal hadis yang diterbitkan.
- 2- Artikel hendaklah bersifat asli dan memenuhi syarat kaedah sebuah penulisan jurnal.
- 3- Artikel yang dihantar bukan merupakan artikel yang pernah dibentangkan oleh jurnalis atau diterbitkan oleh mana-mana pihak penerbitan.
- 4- Artikel hendaklah menggunakan perkataan-perkataan yang sesuai dari aspek tatabahasa dan olahannya.
- 5- Artikel boleh dihantar dalam bentuk kertas kerja (hard copy) dan soft copy atau melalui e-mail kepada Ketua Pengarang Jurnal Hadis INHAD.
- 6- Artikel boleh ditulis di dalam Bahasa Malaysia, Bahasa Arab dan Bahasa Inggeris disertakan dengan abstrak.
- 7- Artikel perlu disertakan dengan nota kaki dan rujukan.
- 8- Setiap jurnalis artikel perlu bersiap-siaga dengan sebarang kemungkinan samada artikel diterima atau ditolak. Selain itu, jurnalis artikel memberi kebenaran kepada pihak editor untuk melakukan penilaian terhadap artikel yang dihantar dan menyunting serta menerbitkannya.
- 9- Artikel yang berjaya untuk diterbitkan disusun berdasarkan keutamaan dan kerelevanan dengan tema jurnal hadis.
- 10- Setiap jurnalis akan menerima penghargaan dan saguhati dari pihak editor sebanyak 5 salinan jurnal bagi setiap terbitan.

Semua urusan dan penghantaran yang melibatkan artikel boleh dihantar atas nama Ketua Pengarang ke alamat berikut:

Ketua Pengarang Jurnal Hadis.
INSTITUT KAJIAN HADIS (INHAD),
Kolej Universiti Islam Antarabangsa Selangor (KUIS),
Bandar Seri Putra 43600, Bangi,
Selangor, **MALAYSIA.**

SIDANG REDAKSI JURNAL HADIS

Penaung

Profesor Dato' Aziuddin bin Ahmad

(Rektor KUIS)

Penasihat

Mohd Farid Ravi bin Abdullah

Ketua Pengarang

Syed Abdul Majid Ghouri

Setiausaha

Mohd Norzi bin Nasir

Setiausaha Kerja

Rashidi bin Salleh

LEMBAGA PENASIHAT ANTARABANGSA

Dr. Rif'at Fauzi Abd. Mutalib

(Mantan Pensyarah Hadis dipelbagai universiti di Mesir dan Arab Saudi).

Prof. Dr. Muhammad 'Ajaj al-Khatib

(Profesor Hadis dan Mantan Ketua

Bahagian al-Quran dan al-Sunnah, Fakulti Syariah Universiti Dimasyq dan dipelbagai universiti di Arab Saudi dan negara-negara Teluk).

Dr. Badi' al-Sayyid al-Lahham

(Pensyarah Hadis, Fakulti Syariah Universiti Dimasyq, Syria).

Syeikh Salman al-Husni al-Nadwi

(Pensyarah Hadis di Fakulti Syariah dan Usuluddin, Universiti Nadwatul Ulama dan Rektor Universiti Imam Ahmad bin Irfan al-Syahid, INDIA).

Prof. Dr. Muhammad Abu Laith al-Khair Abadi

(Profesor Hadis, Fakulti Ilmu Wahyu dan Warisan Islam, Universiti Islam Antarabangsa (UIA), Malaysia).

Syeikh Nizam Muhammad Solih Ya'qubi

(Pakar Ekonomi Islam di Bahrain,

dan Ahli Lembaga Penasihat Syariah di kebanyakan Bank dan Yayasan Kewangan).

Dr. Shayuthy B. Abdul Manas

Penolong Profesor

Jabatan Al-Quran Dan As-Sunnah,

Kuliyah Ilmu Wahyu Dan Sains Kemanusiaan,

Universiti Islam Antarabangsa Malaysia (UIAM).(Malaysia).

Dr. Muhammad Adil Khan

(Pensyarah Hadis di Fakulti Usuluddin, Universiti al-Faruqiyah, Karachi, Pakistan).

Syeikh Abdullah al-Ma'rufi

(Pensyarah Hadis di Dar al-Ulum Deoband al-Islamiyyah, INDIA)

Dr. Muhammad Akram al-Nadwi

(Felo Penyelidik di Pusat Pengajian Islam Oxford, Oxford Britain).

Dr. Muhammad Waliuddin al-Nadwi

(Pensyarah Hadis di Fakulti Pengajian Islam, Dubai, Emieriyah Arab Bersatu).

SIDANG EDITOR

Profesor Dr. Jawiah binti Dakir

(Timbalan Pengarah, Institut Hadhari, Universiti Kebangsaan Malaysia).

Dr. Faisal bin Ahmad Shah

(Pensyarah Kanan Jabatan Al-Quran & Al- Hadis, Akademi Pengajian Islam, Universiti Malaya).

Ustaz A. Irwan Santeri Doll Kawaid

(Pensyarah Fakulti Pengajian Quran dan Sunnah, Universiti Sains Islam Malaysia (USIM)).

Ustaz Mohd Khafidz bin Soroni

(Pensyarah Jabatan al-Quran dan al-Sunnah, Akademi Islam, KUIS)

Ustazah Nur Afifah Abas

(Pegawai Penyelidik INHAD, KUIS).

Ustaz Zulhilmi bin Mohamed Nor

(Pensyarah Fakulti Pengajian Quran dan Sunnah, Universiti Sains Islam Malaysia (USIM)).

PEWASIT ARTIKEL

Dr. Muhammad Mustaqim Mohd Zarif

Pengarah Pusat Pengajian Teras,
Universiti Sains Islam Malaysia (USIM).

Dr. Habeeb Rahman Bin Md. Ibramsa

Timbalan Rektor / Penolong Profesor
Al-Madinah International University (MEDIU)

Dr. Faisal Ahmad Shah

Pensyarah Kanan
Jabatan Al-Quran dan Al-Hadith,
Akademi Pengajian Islam,
Universiti Malaya (UM).

Dr. Shayuthy B. Abdul Manas

Penolong Profesor
Jabatan Al-Quran Dan As-Sunnah,
Kuliyah Ilmu Wahyu Dan Sains Kemanusiaan,
Universiti Islam Antarbangsa Malaysia (UIAM).

KANDUNGAN JURNAL

KATA ALUAN

Oleh: Ketua Pengarang 9

SUMBANGAN SYEIKH MOHAMED IDRIS AL-MARBAWI DALAM PENENTUAN IDENTITI PERAWI: TUMPUAN KEPADA KITAB BAHR AL-MADHI

Oleh: Dr Faisal bin Ahmad Shah.11

KETOKOHAN SYEIKH MUHAMMAD YASIN AL-FADANI DAN SUMBANGANNYA DALAM DISIPLIN PERIWAYATAN SANAD

Oleh : Md. Khafidz bin Soroni & Md. Norzi bin Nasir. 35

SYEIKH ABDULLAH BASMEIH BIN MUHAMMAD BASMEIH: KAJIAN TERHADAP MASTIKA HADIS

Oleh: Mohd Farid Ravi Abdullah. 67

بِسْمِ اللَّهِ الرَّحْمَنِ الرَّحِيمِ

KATA ALUAN

الحمد لله رب العالمين، والصلاة والسلام على نبيه المصطفى، وعلى آله الخيرة وأصحابه البررة، وعلى من والاه.

Jurnal Hadis ini berobjektif mempersembahkan kajian-kajian yang berorientasikan ilmu hadis dan isu-isu semasa yang berkaitan. Ia merupakan antara perancangan utama INHAD sejak penubuhannya pada tahun 2008, namun disebabkan kekangan waktu dan beberapa masalah yang tidak dapat dielakkan, penerbitan jurnal ini tertangguh menjadikan penerbitannya agak lewat daripada perancangan asal.

Matlamat utama penerbitan jurnal ini adalah untuk membudayakan kajian dan penyelidikan berkaitan dengan pengajian hadis serta menggalakkan para sarjana Islam menyumbang hasil penyelidikan dalam bidang pengajian hadis dari dalam dan luar Negara. Usaha ini bagi menyemangatkan pengajian hadis, sekaligus membudayakan sunnah Rasulullah SAW dalam kehidupan orang Islam. Saya percaya platform sebegini adalah menjadi berita gembira kepada para pencinta ilmu, khususnya bagi mereka yang menekuni ilmu hadis. Memandangkan jurnal Hadis ini yang pertama diterbitkan oleh INHAD, pasti ada kekurangan dan kelemahan. Namun, harapan kami supaya cadangan-cadangan yang baik demi penambahbaikan jurnal dialu-alukan dan disampaikan kepada ketua pengarang.

Melalui hasil pena para jurnalis yang terdiri daripada para pensyarah universiti dan mereka yang mempunyai kepakaran dalam bidang ini, harapan kami agar mereka tidak keberatan untuk terus berkarya dan menyumbangkan idea untuk dimuatkan dalam jurnal

hadis terbitan INHAD berbekalkan kelebihan ilmu yang telah dikurniakan oleh Allah SWT. Selain itu ruangan jurnal ini diharapkan dapat menjadi medan terbaik kepada semua jurnalis dalam menghasil, menyumbang dan mempersembahkan hasil kajian yang bersifat asli, baru, bermutu serta berimpak. Pasti nya semua kajian yang menepati syarat-syarat yang tersebut akan dimuatkan dalam jurnal ini dan dipersembahkan kepada para pembaca yang budiman.

Akhir kata, setinggi-tinggi tahniah dan penghargaan buat para jurnalis, semoga Allah SWT senantiasa memberikan sangkaan baikNya dan kejayaan terhadap segala usaha yang kita lakukan. Semoga para pembaca yang budiman turut terpanggil untuk memberikan ulasan positif dan membina terhadap kandungan yang dimuatkan seterusnya menyambut baik penerbitan jurnal hadis ini. Wallahu A'lam.

“Hanya yang terbaik buat semua dari hati, dari INHAD”.

MOHD FARID RAVI BIN ABDULLAH.
(Ketua Pengarang).

Sumbangan Syeikh Mohamed Idris al-Marbawi Dalam Penentuan Identiti Perawi: Tumpuan Kepada Kitab *Bahr al-Madhi*

Oleh: Dr Faisal bin Ahmad Shah (U. Malaya)

ABSTRACT

This study is focused on the method of determination of narrators used by Mohamed Idris bin Abdul Raof al-Marbawi in his syarh (exegesis) of Bahr al-Madhi's scripture, a work in the form of translations and interpretations of two thousands seven hundreds and eighty one (2781) selected hadis (Islamic traditions) from al-Jami' of Imam al-Tirmidhi. This scripture is still being published and considered as a main reference in Islamic studies at several mosques in North West of Malaysia. Such immense acceptance of this scripture has motivated the researcher's interest to undertake the present study. This qualitative approach involved an assessment into al-Marbawi's Bahr al-Madhi especially on the method of determination of narrators. In order to achieve such assessment the researcher has engaged with documentary analysis. The whole methods in determination of narrators applying by al-Marbawi has been examined by researcher by analyzing the findings gathered from various interpretations of al-hadis. Comparative approach also applied by referring to the earlier exegesis of other expertises in al-hadis and identify whether al-Marbawi's styles are in accordance with their methods.

Pengenalan

Tulisan ini cuba melihat sumbangan Syeikh Mohamed Idris al-Marbawi dalam bidang penentuan perawi yang merupakan salah satu daripada bidang ilmu riwayat hadis.. Kesungguhan dan pengorbanan Syeikh al-Marbawi dalam meningkatkan kefahaman umat Islam terhadap hadis-hadis nabi dibuktikan dengan penghasilan tiga buah kitab hadis dalam tulisan jawi iaitu *Bahr al-Madhi*, *Bulugh al-Maram* dan Kitab Idangan Guru Sahih Bukhari dan Muslim. Namun dalam tulisan ini tumpuan akan diberikan kepada sumbangan beliau dalam penentuan perawi melalui kitabnya *Bahr al-Madhi*. Penulisan akan dimulakan dengan biodata ringkas Syeikh al-Marbawi dari sudut latarbelakang pengajiannya dan karya-karya penulisan yang dihasilkan oleh beliau. Tulisan kemudiannya akan memperkenalkan

kitab *Bahr al-Madhi* seterusnya sumbangan beliau dalam penentuan perawi.

Biodata Al-Marbawi secara ringkas

Nama penuh beliau ialah Mohamed Idris bin Abdul Raof al-Marbawi al-Azhari¹ Nama ini digunakan pada hampir keseluruhan karya-karya penulisan beliau. Gelaran al-Marbawi yang terdapat pada namanya adalah bersempena dengan nama kampung asal keluarganya di Lubuk Merbau yang terletak dalam daerah Kuala Kangsar, Perak. Manakala al-Azhari pula merujuk kepada Universiti al-Azhar di Mesir tempat beliau menimba ilmu dalam bidang pengajian Islam. Al-Marbawi dilahirkan pada 28 Zulkaedah 1313H bersamaan 12 Mei tahun 1896 di kampung Masfalah Mekah Mukarramah. Tarikh dan tempat lahirnya ini dinyatakan dalam kamusnya yang terkenal iaitu Kamus al-Marbawi.² Syeikh al-Marbawi tinggal dan membesar di Mekah sehinggalah tahun 1902 M iaitu ketika beliau berumur 10 tahun.

Pendidikan Syeikh al-Marbawi

Syeikh al-Marbawi memperolehi pelajaran dan didikan agama sejak awal lagi daripada keluarganya yang sentiasa mengambil berat terhadap pelajarannya dan memberikan perhatian yang cukup bagi memastikan kejayaannya dalam bidang pendidikan. Jika ditelusuri, proses pendidikan dan perkembangan ilmu Syeikh al-Marbawi melalui tiga peringkat iaitu peringkat pengajian di Mekah, pengajian di Tanah Melayu dan pengajian di Mesir.

i) Pengajian awal di Mekah

Pendidikan awal Syeikh al-Marbawi bermula di Mekah yang merupakan pusat perkembangan dan penataran ilmu pada waktu itu. Dalam usia empat tahun beliau sudah mampu menghafaz al-Qur'an. Dua tahun kemudian, beliau dihantar ke sekolah Masfalah di kota

¹ Ejaan Mohamed pada nama beliau adalah sebagaimana yang tercatat pada kad pengenalan beliau yang disimpan di Pusat Islam Malaysia (sekarang JAKIM). Lihat Ismail Ismail Mat Ludin (1991), "*Syeikh Idris Marbawi Dan Sumbangannya*" (Kertas Projek di Jabatan Pengajian al-Quran dan Sunnah, Universiti Kebangsaan Malaysia) h. 1

² Mohamed Idris 'Abd al-Raof al-Marbawi Dr (t.t), *Kamus Idris al-Marbawi Arabi-Melayu*, T.T.P: Dar al-Fikr, h. 292.

Mekah yang terletak berhampiran dengan rumahnya. Di sekolah tersebut beliau memperlihatkan komitmen yang tinggi dalam menghafaz al-Qur'an. Potensi beliau sebagai seorang bakal ulama terserlah dan terpancar melalui kekuatan ingatan beliau sehingga berjaya menghafaz enam belas (16) juzuk al-Qur'an ketika umurnya 10 tahun.¹

ii) Pengajian di Tanah Melayu

Di Tanah Melayu, al-Marbawi dan keluarganya menetap di Lubuk Merbau yang terletak di daerah Kuala Kangsar, Perak. Di Lubuk Merbau beliau telah dihantar belajar di Sekolah Melayu Lubuk Merbau bermula dari usianya 11 tahun sehingga beliau lulus darjah lima pada usianya 15 tahun.² Minat dan kecenderungan beliau dalam bidang pengajian Islam telah mendorong beliau untuk menyambung pengajiannya di pondok Syeikh Wan Muhammad yang terletak di Bukit Candan Kuala Kangsar, Perak. Syeikh Wan Muhammad merupakan mufti Perak pada waktu itu³ Setelah tiga tahun menimba ilmu pengajian Islam di pondok Syeikh Wan Muhammad, beliau kemudiannya berpindah ke pondok Tuan Hussein Nasir bin Muhammad Taib al-Mas 'udi di Kedah. Pengajian sistem pondok yang begitu intensif dan bersifat menyeluruh telah mendorong beliau untuk terus menjelajahi lautan ilmu dengan meneruskan pengembaraan ilmunya ke pondok Syeikh Ahmad Fatani di Padang Lalang Bukit Mertajam. Pengajian beliau di sana telah berlangsung selama empat tahun lamanya. Tidak cukup dengan ilmu yang

¹ Lihat Ismail Mat Ludin (1991), *op.cit.*, h. 7. Lihat Utusan Qiblat September 1980, Tahun Kesebelas Syawal/ Zulkaedah Bilangan 121 h. 5. Lihat Pengasuh, Januari –Mac 2001, bilangan 568. Lihat al-Qiyadah Julai 1990, Abu 'Arabi, Bintang Nusantara, Kuala Lumpur h. 33. Lihat Utusan Melayu 14 Ogos 1987, h.1

² Utusan Melayu 1975:14

³ Wan Muhammad bin Wan Husain berasal dari Kampung Saring, Mukim Merbol, Pasir Puteh Kelantan. Tidak dapat dipastikan bilakah beliau dilahirkan. Namun ada sumber menyatakan bahawa beliau meninggal dunia pada tahun 1348 H ketika usianya sudah menjangkau 80 tahun. Jika kenyataan tersebut benar, maka tarikh beliau dilahirkan ialah pada tahun 1268H /1852 M. Haji Wan Muhammad bukan sahaja seorang guru Sultan tetapi juga seorang guru pondok yang dihormati ramai. Antara pelajar-pelajar yang datang menuntut ilmu di tempat beliau ialah Haji Wan Muhammad bin Wan Puteh dari Pasir Puteh Kelantan, Haji Husain bin Awang Hamat dari Pengkalan Pauh Pasir Puteh Kelantan dan termasuklah al-Marbawi. Beliau meninggal dunia di Bukit Candan Kuala Kangsar pada 13 November 1929M dan meninggalkan hampir 40 orang anak. Salah seorang anaknya ialah Haji Wan Hasan iaitu Qadi Besar Kelantan yang pertama. Lihat Ismail Che Daud, (2001), *op.cit.*, h 652-656. Lihat juga al-Islam, Oktober 1987, h.50

dipelajari di tiga buah pondok sebelum itu, beliau kemudiannya menyambung pengajiannya di Pondok Tok Kenali, Kelantan¹

iii) Pengajian di Mesir

Pengajian beliau di Mesir bermula pada tahun 1924M. Kesungguhan dan iltizam beliau dalam menuntut ilmu di Universiti al-Azhar telah membuahkan hasil apabila beliau antara pelajar terawal yang berjaya mendapat Syahadah 'Aliyyah daripada universiti tersohor dalam bidang pengajian Islam itu. Antara guru-gurunya di Mesir yang sering beliau nyatakan dalam banyak karyanya ialah seperti berikut:

- 1- Syeikh Muhammad Ibrahim al-Samaluti
- 2- Syeikh Mahmud Ghunaym
- 3- Syeikh Muhammad Bahith
- 4- Syeikh Abu al-A'la al-Falaki
- 5- Al-'Allamah al-Makki al-Syeikh Muhammad 'Ali al-Maliki
- 6- Al-Ustaz 'Abdul Wasif bin Muhammad

Karya-karya Penulisannya

Tradisi menulis merupakan satu tradisi yang telah sebatikan dalam jiwa Syeikh al-Marbawi sejak di pondok Tok Kenali lagi. Melalui penulisannya yang beragam dan bervariasi beliau telah mewariskan idea dan gagasan pemikiran yang tidak ternilai dan sangat berharga. Jarang sekali terdapat ulama yang meninggalkan karya penulisan yang monumental yang menggabungkan dan menyepadukan antara ilmu agama dengan ilmu-ilmu moden. Karya-karya penulisan Syeikh al-Marbawi yang menjangkau tiga belas (13) buah tajuk buku dan ada di antaranya mencecah beratus-ratus halaman membuktikan kedudukan beliau sebagai seorang penulis yang prolifik, berdedikasi, tekun, cekal dan mempunyai daya ketahanan dan kesabaran yang tinggi.

Kebanyakan karya-karyanya diterbitkan oleh Percetakan Mustafa al-Babi al-Halabi wa Awladuhu dan Dar al-Fikr yang merupakan antara syarikat percetakan yang banyak menerbitkan karya penulisan

¹ Dewan Masyarakat 15 Julai 1980, h. 33

tokoh-tokoh ulama al-Azhar. Karya-karya penulisan beliau boleh dibahagikan kepada bidang-bidang seperti berikut:

1) Bidang yang berkaitan dengan Kamus dan Ensiklopedia

- i) Kamus al-Marbawi
- ii) Ringkasan Kamus Melayu-Arab Bergambar Dan Teladan Belajar Arabnya yang Senang
- iii) Al-Marbawi Qamus al-Jayb 'Arabi – Melayu Latin
- iv) Kitab Perbendaharaan Ilmu
- v) *Mu'jam al-Kainah*

2) Bidang Tafsir

- i) Tafsir Quran al-Marbawi –juzuk الم
- ii) Tafsir Surah Yasin Bahasa Melayu

3) Bidang Hadis

- i. *Bahr al-Madhi*
- ii *Kitab Idangan Guru Sahih al-Bukhari dan Muslim*
- iii- *Kitab Bulugh al-Maram Serta Terjemah Melayu*

4) Bidang Tauhid, Fiqh dan Tasawuf

- i) Punca Agama dan Pati Hukum Ibadat
- ii) *Nizam al-Hayat* (Peraturan Hidup Umat Islam)
- iii) Asas Islam

5) Majalah dan Akhbar

- i)Majalah Pengasoh
- ii) Seruan al-Azhar

Pengiktirafan Yang Diberikan Kepada Syeikh al-Marbawi

Kejayaan Syeikh al-Marbawi menghasilkan *Kamus al-Marbawi* dan *Bahr al-Madhi* melonjakkan nama beliau sehingga disebut-sebut bukan sahaja di Tanah Melayu tetapi di Singapura dan Selatan Thailand. Justeru itu tidak hairanlah beliau menerima pelbagai pujian dan pengiktirafan daripada pelbagai lapisan masyarakat. Antara

anugerah-anugerah yang pernah diterima oleh beliau adalah seperti berikut:

- a) Ijazah Kehormat Doktor Persuratan Universiti Kebangsaan Malaysia (1980)
- b) Anugerah Tokoh Maal Hijrah (1987)
- c) Anugerah Pingat Ahli Mahkota Perak (1988)
- d) Tokoh Anugerah Penulis Pentas Perak (2004)

Kematiannya

Syeikh al-Marbawi meninggal dunia pada 13 Oktober 1989 jam 8.30 pagi di Hospital Besar Ipoh, Perak ketika berumur 93 tahun. Beliau telah dimasukkan ke hospital tersebut selama 28 hari sebelum meninggal dunia kerana menghidap penyakit “ tidak boleh membuang air kecil”. Jenazah beliau dikebumikan di tanah perkuburan Islam Lubuk Merbau Kuala Kangsar bersebelahan dengan pusara isterinya yang meninggal dunia lima bulan sebelum itu. Beliau meninggalkan seorang balu Munirah bt Abdul Wahab, seorang anak perempuan, tiga cucu dan lima cicit.¹

Pengenalan Kitab *Bahr al-Madhi*

Nama kitab

Judul lengkap kitab *Bahr al-Madhi* ialah *Bahr al-Madhi: Li Syarh Mukhtasar Sahih al-Tirmidhi*. Judul tersebut dinyatakan dengan jelasnya oleh al-Marbawi dalam mukadimah kitabnya seperti berikut:

“ Maka dengan kenyataan yang di atas tadi dan lagi akan datang aku namailah kitab aku ini dengan nama *Bahr al-Madhi :Li Syarh Mukhtasar Sahih al-Tirmidhi*²

Jika diterjemahkan judul tersebut ke dalam Bahasa Melayu, kitab *Bahr al-Madhi* ialah sebuah kitab syarah kepada *Mukhtasar Sahih al-Tirmidhi*. Namun judul yang diletakkan oleh al-Marbawi di bahagian

¹ Temubual dengan Dato' Hj Mohd Ghazali menantu kepada Syeikh al-Marbawi pada 9 Disember 2004

² *Bahr al-Madhi*, j. 1, h. 3

kulit hadapan kitab lebih jelas berbanding judul yang terdapat pada mukadimah kitab iaitu *Mukhtasar Sahih al-Tirmidhi wa Syarhuhu Bi Lughah al-Jawi al-Malayu al-Musamma Bahr al-Madhi*. Terjemahan daripada judul di atas jelas menunjukkan bahawa *Bahr al-Madhi* merupakan sebuah kitab *ikhtisar* dan syarah kepada *Sahih al-Tirmidhi*.

Pengertian *Bahr al-Madhi*

Perkataan *Bahr* dalam *al-Qamus al-Muhit* bermaksud (الماء الكثير) iaitu lautan¹ Manakala perkataan *al-Madhi* menurut al-Fayruz Abadi bermaksud *al-'asal* iaitu madu². Daripada gabungan kedua-dua perkataan tersebut terbentuklah perkataan *Bahr al-Madhi* yang diterjemahkan sebagai lautan madu. Perkataan “Lautan Madu” ini pernah dinyatakan oleh Rasulullah ﷺ ketika menggambarkan keindahan syurga sebagaimana hadis berikut:

إن في الجنة بحر الماء وبحر العسل

Maksudnya:

*Sesungguhnya di dalam syurga terdapat lautan air dan lautan madu.*³

Perkataan lautan biasanya dikiaskan kepada ilmu sebagaimana ibarat (تبحر في العلم) yang bermaksud (تعمق وتوسع) iaitu seseorang yang mendalam dan luas ilmunya⁴ (Majd al-Din Muhammad bin Ya 'qub al-Fayruz Abadi 1998:347) Manakala madu pula dianalogikan kepada sesuatu yang baik, bernilai dan mendatangkan manfaat.

Daripada definisi di atas perkataan *Bahr al-Madhi* dapatlah dianalogikan sebagai lautan ilmu manakala madu pula diterjemahkan sebagai suatu yang bernilai dan mendatangkan manfaat dan kebaikan kepada manusia. Dapatlah dirumuskan di sini bahawa *Bahr*

¹ Majd al-Din Muhammad bin Ya'qub al-Fayruz Abadi (1998), *op.cit.*, h.346.

² Lihat juga *al-Munjid fi al-Lughah al-'Arabiyyah al-Mu'asirah* (2001), cet 2, Bayrut: Dar al-Masyriq, h.1328.

³ Muhammad bin 'Isa bin Sawrah al-Tirmidhi (1987), *Al-Jami' al-Sahih*, Kitab *Sifat al-Jannah*, Bab *Ma Ja'a fi Sifah Anhar al-Jannah*, no. hadis 2571

⁴ Majd al-Din Muhammad bin Ya 'qub al-Fayruz Abadi (1998), *op.cit.*, h. 347

al-Madhi merupakan sebuah kitab yang mengandungi pelbagai ilmu yang mendatangkan manfaat dan kebaikan kepada manusia.

Sebab penulisan /dorongan penulisan

Dorongan penulisan kitab *Bahr al-Madhi* dinyatakan oleh Syeikh al-Marbawi dalam mukadimah kitabnya seperti berikut:

“... ialah semata-mata ikhlas hatiku bagi wajah Allah kerana mensiarkan hadis Rasulullah dan meninggikan kalimah Allah هي العليا kepada segala saudaraku yang tiada tahu di dalam bahasa Arab dan dipohonkan pada Allah kiranya manfaat bagi umum umat Muhammad ﷺ dan harapkan jadi pertaruhan di sisi Allah bagi hari akhirat. Dan kiranya tiadalah ia hujjah ke atasku di sana¹

Tarikh penulisan

Kitab *Bahr al-Madhi* yang terdiri daripada dua puluh dua (22) juzuk ini mula dicetak buat kali pertama secara berperingkat-peringkat pada tahun 1933M oleh Syarikat Maktabah wa Matba'ah al-Babi al-Halabi wa Awladuhu. Juzuk pertama kitab ini mula dicetak pada tahun 1933M manakala juzuk terakhir iaitu juzuk dua puluh dua (22) pula dicetak pada bulan Ramadan 1379H bersamaan dengan bulan Mac 1960M.

Kandungan kitab *Bahr al-Madhi*

Kitab *Bahr al-Madhi* merupakan sebuah kitab syarahan hadis berbahasa Melayu yang mensyarahkan dua ribu tujuh ratus lapan puluh satu (2781) buah hadis yang terdapat dalam kitab *al-Jami'* oleh Imam al-Tirmidhi (m.279H). Kitab ini terdiri daripada dua puluh dua (22) juzuk dengan lima ribu enam puluh lapan (5068) halaman serta lapan ribu dua ratus lapan puluh dua (8282) masalah yang menyentuh pelbagai isu dan persoalan yang berkaitan dengan hadis-hadis nabi ﷺ

Penentuan Identiti Perawi dan Kepentingannya

¹ *Bahr al-Madhi*, j.1, h. 3

Penentuan identiti perawi merupakan salah satu aspek yang sentiasa diberi penekanan oleh ulama hadis. Melalui penentuan, identiti seseorang perawi dapat dikenalpasti seterusnya menjadi asas dalam menentukan hukum seseorang perawi dan hadis yang diriwayatkannya. Dalam erti kata yang lain penentuan perawi bermaksud mengenalpasti nama perawi supaya dapat dibezakan dengan perawi yang lain. Nama yang dimaksudkan di sini ialah nama perawi tersebut, gelarannya, keturunannya dan seumpamanya. Perkara ini sangat penting diketahui oleh para ulama kerana kadang kala seseorang perawi mempunyai nama yang sama dengan perawi yang lain. Sebagai contoh nama al-Khalil bin Ahmad dimiliki oleh seramai enam orang perawi. Penentuan perawi juga akan dapat mendedahkan nama-nama perawi yang menggunakan *kunyah* seperti Ibn Mahdi atau perawi yang meriwayatkan hadis daripada bapanya atau perawi yang meriwayatkan daripada bapanya daripada datuknya seperti 'Amru bin Shu'ayb daripada bapanya daripada datuknya atau perawi yang *mubham* dan seumpamanya

Faedah Penentuan Perawi

Penentuan perawi mempunyai beberapa faedah antaranya seperti yang berikut:

- a) Menghilangkan kekeliruan mengenai maklumat perawi dengan perawi yang lain terutamanya jika salah seorangnya *thiqah* dan yang lain daif.
- b) Membezakan perawi dengan perawi yang lain terutamanya seorang perawi yang disangka sebagai dua orang perawi yang berbeza. Ini berlaku jika perawi yang disebut pertama kali dengan namanya dan keduanya dengan keturunannya atau kunyahnya
- c) Menentukan perawi yang *mubham*

Kaedah Penentuan Perawi

Terdapat beberapa kaedah yang diaplikasikan oleh para ulama dalam menentukan identiti perawi antaranya seperti berikut:

- a) Menenalpasti guru perawi tersebut. Dalam hal ini kitab *Tahdhib al-Kamal* oleh al-Mizzi sesuai dijadikan rujukan. Ini adalah kerana kitab tersebut menyenaraikan nama guru-guru

bagi perawi-perawi *al-Kutub al-Sittah* secara komprehensif yang disusun mengikut huruf al-Mu'jam.

- b) Mengenalpasti nama anak-anak murid bagi seseorang perawi
- c) Menentukan *tabaqat* perawi dengan merujuk kepada kitab-kitab *Tabaqat* atau kitab yang menyatakan *tabaqat* perawi seperti kitab *Taqrib al-Tahdhib*. Ibn Hajar telah membahagikan *tabaqat* perawi dalam kitabnya kepada 12 *tabaqat*.
- d) Mengumpulkan *turuq al-hadis*. Ini boleh dilakukan dengan merujuk kepada kitab-kitab syarah hadis di mana pengarangnya menjelaskan nama-nama perawi seperti kitab *Fath al-Bari Sharh Sahih al-Bukhari* dan *Sharh al-Nawawi 'ala Sahih Muslim*. Kitab-kitab *al-Mustakhrajat* juga turut boleh digunakan dalam mengumpulkan *turuq al-hadis*.

Kaedah Penentuan Identiti Perawi

Berikut di bawah ini ialah beberapa kaedah yang diaplikasikan oleh ulama dalam menentukan identiti perawi

a) Perawi yang disebut dengan namanya sahaja

Terdapat di kalangan perawi yang dinyatakan namanya sahaja tanpa nama bapanya atau keturunannya. Nama sebegini memerlukan kepada penjelasan terutamanya jika nama tersebut dikongsi oleh orang lain seperti nama Sa'id atau 'Amru yang dimiliki oleh ramai perawi.

Contoh:

روى البخاري في صحيحه قال: حدثنا قتيبة بن سعيد ثنا اسماعيل بن جعفر عن عمرو بن سعيد بن أبي سعيد المقبري عن أبي هريرة رضي الله تعالى عنه أنه قال: قلت يا رسول الله (من أسعد الناس بشفاعتك يوم القيامة ؟ ... الحديث¹

Jika diperhatikan kepada sanad hadis ini didapati bahawa nama 'Amru tidak dijelaskan. Malah jika rujukan dilakukan terhadap kitab *Taqrib al-Tahdhib* didapati beberapa orang perawi mempunyai nama yang sama. Dalam hal ini, langkah pertama yang perlu dilakukan ialah menyelidik nama guru kepada 'Amru iaitu Sa'id bin Abu Sa'id al-

¹ Muhammad bin Isma'il al-Bukhari, *Sahih al-Bukhari*, Kitab al-Riqaq, Bab Sifat al-Jannah wa al-Nar, no hadis 6085

Maqburi dalam *Tahdhib al-Kamal*. Rujukan kepada *Tahdhib al-Kamal* menemui bahawa salah seorang anak murid kepada Sa'id ialah 'Amru bin Abi 'Amrin Mawla al-Matlab.¹ Dalam hal ini tiada Amru selainnya. Bagi menguatkan penemuan, Ismail bin Ja'far iaitu anak murid Amru juga perlu dikenalpasti. Rujukan kepada kitab *Tahdhib al-Kamal* mendapati antara gurunya ialah 'Amru bin Abi 'Amrin mawla al-Matlab.² Riwayat yang terdapat dalam *Sahih al-Bukhari* dan Ibn Abi 'Asim dalam *al-Sunnah* menjelaskan nama Amru bin Abi 'Amrin dengan lengkap.

b) Perawi yang disebutkan keturunannya sahaja

Kadangkala perawi disandarkan kepada keturunannya, kabilahnya, negerinya atau pekerjaannya dan seumpamanya tetapi tidak disebut namanya dalam sanad. Dalam hal ini kitab *al-Ansab* oleh al-Sam'ani atau kitab *al-Ansab al-al-Muttafaqah fi al-Khat al-Mutamathilah fi al-Naqt wa al-dabt* oleh Muhammad bin Tahir al-Maqdisi dapat membantu. Begitu juga kitab-kitab *tarajim* yang mengkhususkan bab tertentu untuk *al-ansab* di bahagian akhir kitab.

Contoh

روى ابن ماجه في سننه، قال: حدثنا محمد بن بشار ثنا الأنصاري ثنا المسعودي ثنا عبد الرحمن بن القاسم بن محمد بن أبي بكر الصديق عن أبيه عن عائشة أن رسول الله صلى الله عليه وسلم قال: الحية فاسقة...³

Jika dirujuk kepada kitab *al-Ansab*, didapati al-Ansari dalam sanad di atas merujuk kepada satu kumpulan antaranya sahabat dari sahabat daripada 'Urwah bin Ruwaym al-Lakhmi. Dikatakan sahabat yang dimaksudkan ialah Jabir bin Abd Allah. Al-Ansari juga merujuk kepada Muhammad bin Abd Allah dan Ishaq bin Musa.⁴ al-Ansari dalam sanad ini tidak mungkin merujuk kepada sahabat kerana al-Ansari yang terdapat dalam sanad berada pada *tabaqat* yang akhir. Manakala Muhammad berada pada *tabaqat* kesembilan dan meninggal dunia pada tahun 215H. Manakala Ishak berada pada *tabaqat* kesepuluh dan meninggal dunia pada tahun 244 H. Dalam hal ini pengenalpastian kepada Muhammad bin Basshar iaitu anak

¹ Yusuf bin Zakiy al-Mizzi (1980), *Tahdhib al-Kamal* tahqiq Dr. Basshar 'Awad Ma'ruf, Bayrut: Muassasah al-Risalah. J.10, hlm 469

² Ibid., j.3, hlm 58

³ Muhammad bin Yazid al-Qazwini, *Sunan Ibn Majah*, Kitab al-Sayd, Bab al-Ghurab, no hadis 3240.

⁴ Ahmad bin Ali bin Hajar, *Tahdhib al-Tahdhib*, Bayrut: Dar Sadir, j.12, hlm 319

murid al-Ansari akan dapat membantu. Rujukan kepada kitab *Tahdhib al-Kamal* mendapati di antara gurunya ialah Muhammad bin Abd Allah al-Ansari.¹ Pengenalpastian kepada terjemahan Muhammad bin 'Abd Allah al-Ansari mendapati antara anak muridnya ialah Muhammad bin Basshar (Bundar) dan antara gurunya ialah al-Mas'udi.² Maklumat sebegini tidak ditemui dalam terjemahan Ishaq bin Musa.

c) Perawi yang dikenali dengan *kunyahnya*

Perawi-perawi hadis kadang kala diperkenalkan dengan *kunyahnya* sahaja seperti Abu Fulan . Justeru bagi mengenalpasti siapakah yang dimaksudkan dengan *kunyah* tersebut perlu dilihat kepada kitab-kitab *Kuna* antaranya *al-Kuna* oleh Imam al-Bukhari, *al-Kuna* dan *al-Asma'* oleh Muslim , *al-Asami wa al-Kuna* oleh Imam Ahmad , *Asma' man yu'raf bi kuniyyatihi* oleh al-Azdi, *al-Kuna* oleh al-Dulabi dan seumpamanya . Terjemahan perawi ini juga boleh dirujuk di dalam kitab *al-tarajim* yang mengkhususkan di bahagian akhir kitab, bab mengenai perawi yang dikenali dengan *kunyahnya*.

Contoh

روى البخاري في صحيحه قال: حدثنا أبو الوليد ثنا شعبة عن خالد عن أبي قلابة عن أنس عن النبي (قال : لكل أمة أمين وأمين هذه الأمة أبو عبيدة بن الجراح³

Terdapat seorang perawi yang menggunakan *kunyahnya* dalam sanad ini iaitu Abu Qilabah . Justeru kitab *al-Kuna wa al-Asma'* oleh Imam Muslim boleh dijadikan rujukan dalam mengenalpasti siapakah Abu Qilabah . Maklumat yang ditemui menunjukkan Abu Qilabah disebut pada huruf qaf sebagai Abd Allah bin Zayd, mendengar hadis daripada Anas bin Malik , Malik bin al-Huwairith, diriwayatkan daripadanya Khalid al-Khiza' dan Ayyub.⁴ Maklumat tersebut dapat dibuktikan apabila rujukan dilakukan kepada terjemahan Abd Allah bin Zayd dalam *Tahdhib al-Tahdhib* yang menjelaskan bahawa antara

¹ Al-Mizzi, *Tahdhib al-Kamal*, j.24hlm 215

² Ibn Hajar, *Tahdhib al-Tahdhib*. j.9, h.274

³ Muhammad bin Isma'il al-Bukhari, *Sahih al-Bukhari*, kitab al-Maghazi, Bab Qissah Ahl Najran, no hadis 4031

⁴ Muslim bin al-Hajjaj al-Naysaburi (1404), *al-Kuna wa al-Asma'* tahqiq 'Abd al-Rahim al-Qashqari , Madinah, j.1,h.699

gurunya ialah Anas bin Malik dan di antara anak muridnya ialah Khalid al-Khiza'.¹

d) Perawi yang dikenali dengan *laqabnya*

Kadang kala perawi dikenali dengan *laqabnya* seperti al-A'mash atau al-A'raj atau Ghundar. Justeru antara kitab yang boleh dijadikan rujukan ialah *Nuzhat al-Bab fi al-Alqab* oleh Ibn Hajar, kitab *Kashf al-Niqab 'an Alqab* oleh Imam al-Suyuti dan kitab *al-tarajim* yang lain.

Contoh

روى ابن ماجة في سننه، قال: حدثنا دحيم ثنا الوليد بن مسلم ثنا الأوزاعي ح وحدثنا أبو بكر بن أبي شيبة ثنا محمد بن مصعب ثنا الأوزاعي ثنا يحيى بن أبي كثير ثنا أبو سلمة عن عمرو بن أمية قال: رأيت رسول الله يمسح على الخفين والعمامة²

Dalam sanad di atas terdapat seorang perawi yang menggunakan *laqab* Duhaym. Kajian menunjukkan terdapat ramai perawi yang menggunakan nama Duhaym. Ibn Hajar menjelaskan dalam kitabnya *Nuzhat al-Albab* bahawa Duhaym merupakan *laqab* kepada perawi yang ramai dan yang paling mashyur ialah 'Abd al-Rahman bin 'Ibad al-Dimashqi iaitu guru kepada Imam al-Bukhari, Abd al-Rahman bin 'Ibad Abu Ismail al-Maghuli, 'Abd al-Rahman bin Sulayman bin Bard bin Nujayh al-Basri, 'Abd al-Rahman bin Muhammad bin Musa al-Asadi, 'Imarah bin Sadaqah dan al-Hasan bin al-Qasim al-Dimashqi.³ Bagi mengenalapasti perawi yang dimaksudkan, rujukan boleh dilakukan kepada kitab *Taqrib al-Tahdhib* kerana perawi tersebut merupakan perawi dalam Sunan Ibn Majah. Didapati hanya seorang perawi sahaja yang menggunakan *laqab* tersebut iaitu 'Abd al-Rahim bin Ibrahim .

e) Perawi yang dinisbahkan kepada bapanya

Pencarian bagi terjemahan perawi yang disandarkan kepada bapanya boleh dilakukan dengan merujuk kepada kitab-kitab *al-Tarajim* yang mengkhususkan pada bahagian akhir kitab tersebut satu bab mengenai perawi yang disandarkan kepada bapanya,

¹ Ibn Hajar al-Asqalani , *Tahdhib al-Tahdhib* ,j.5 h.224.

² Ibn Majah, *Sunan Ibn Majah*, Kitab al-Taharah wa Sunanuha, Bab Ma Ja'a fi al-Mashi 'ala al-'Imamah, no hadis 555

³ Ahmad bin Ali bin Hajar al-'Asqalani (1991), *Nuzhat al-Albab fi al-Alqab*, Dar al-Jil , h.125

ibunya, datuknya, bapa saudaranya sebelah bapa atau bapa saudaranya sebelah ibu.

Contoh

روى النسائي في سننه، قال: أخبرنا اسحاق بن إبراهيم ثنا النضر بن شميل ثنا شعبة عن يزيد بن حمير قال سمعت حبيب بن عبيد يحدث عن جبير بن نفير عن ابن السمط قال: رأيت عمر بن الخطاب يصلي بذي الحليفة ركعتين فسألته عن ذلك فقال: إنما أفعل كما رأيت رسول الله (ﷺ) يفعل¹

Rujukan kepada bab *man nusiba ila abihi aw ummihi aw jaddihi* dalam kitab *Taqrib al-Tahdhib* huruf sin mendapati bahawa Ibn Hajar telah menyenaraikan tiga orang perawi yang dikenali dengan Ibn al-Samt iaitu Shurahbil, Thabit dan Yazid.² Sanad dalam hadis di atas menjelaskan bahawa Ibn al-Samt meriwayatkan daripada Umar bin al-Khattab. Rujukan kepada kitab *Tahdhib al-Tahdhib* mendapati bahawa perawi yang dimaksudkan ialah Shurahbil kerana beliau meriwayatkan daripada nabi s.a.w dan Umar bin al-Khattab dan perawi yang meriwayatkan hadis daripada beliau ialah Jubayr bin Nufayr.³

f) Perawi yang meriwayatkan hadis daripada bapanya atau daripada bapanya daripada datuknya

Terdapat perawi yang meriwayatkan daripada bapanya seperti Hisham bin 'Urwah daripada bapanya atau meriwayatkan daripada bapanya daripada datuknya . Dalam hal ini rujukan boleh dilakukan terhadap kitab *Idah al-Ishkal* oleh Muhammad bin Tahir al-Maqdisi dan kitab *man rawa 'an abihi 'an jaddihi* oleh Ibn Qatlubugha

g) Al-Muttafaq dan al-Muftaraq

Al-Muttafaq dan *al-Muftaraq* ialah perawi-perawi yang mempunyai nama yang sama dari sudut tulisan atau lafaz tetapi

¹ Ahmad bin Shu'ayb al-Nasai (1986), *Sunan al-Nasa'i*, tahqiq 'Abd al-Fattah Abu Ghuddah, Halb: Maktab al-Matbu'at al-Islamiyyah, j.3, h.118

² Ibn Hajar, *Taqrib al-Tahdhib* (1973), Hind: Dar Nashr al-Kutub al-Islamiyyah, h.438

³ Ibn Hajar, *Tahdhib al-Tahdhib* j.4, h.283

merupakan individu yang berbeza walaupun ramai menyangkanya sebagai individu yang sama. Masalah akan bertambah jika perawi-perawi tersebut berada dalam satu generasi atau *tabaqah* yang sama atau negeri yang sama. Dalam hal ini rujukan kepada kitab *Muwaddih Awham al-Jam' wa al-Tafriq* oleh al-Khatib al-Baghdadi atau kitab *Mushtabih Asami al-Muhaddithin* oleh al-Hirawi banyak membantu

Contoh

روى النسائي في سننه، قال: أخبرنا قتيبة ثنا ابن أبي فديك عن ابن أبي ذئب عن سعيد بن خالد عن سعيد بن المسيب عن عبد الرحمن بن عثمان " أن طبيبا ذكر ضفدعا في دواء عند رسول الله (، فنهى رسول الله) عن قتله¹

Rujukan kepada kitab *Taqrib al-Tahdhib* mendapati bahawa terdapat empat orang perawi mempunyai nama seperti Sa'id bin Khalid iaitu Sa'id bin Khalid bin Abu Tawil al-Qurashi daripada *tabaqah* keenam, Sa'id bin Khalid bin 'Abd Allah bin Qariz al-Kinani daripada *tabaqah* ketiga, Sa'id bin Khalid bin 'Amrin bin 'Uthman bin 'Affan daripada *tabaqah* keenam dan Sa'id bin Khalid al-Khuza'i daripada *tabaqah ketujuh*.² Memandangkan Sa'id bin Khalid yang terdapat dalam sanad meriwayatkan daripada Sa'id bin al-Musayyab daripada *tabaqah* kedua maka sudah tentu perawi yang mengambil riwayat daripadanya daripada *tabaqah* yang berhampiran. Maka dalam hal ini Sa'id bin Khalid yang dimaksudkan ialah Sa'id bin Khalid bin 'Abd Allah bin Qariz al-Kinani.

h) Perawi *al-Mubham*

Perawi *mubham* ialah perawi yang tidak dinyatakan namanya sama ada pada sanad atau matan hadis seperti daripada fulan atau daripada lelaki. Antara kitab yang boleh dijadikan rujukan ialah *Ghawamid al-Asma' al-Mubhamat* oleh Ibn Bashkawal dan kitab *al-Mustafad min Mubhamat al-Matn wa al-Isnad* oleh al-Waliy al-'Iraqi. Bahagian *al-Mubhamat* yang terdapat dalam kitab *Hadyu al-Sari Muqaddimah Fath al-Bari* juga turut boleh dijadikan rujukan.

¹ Al-Nasai, *Sunan al-Nasai*, Kitab al-Sayd wa al-Zabaih, Bab al-Difda' j.10 h. 210

² Ibn Hajar, *Taqrib al-Tahdhib*, h.120-121

حدثني يحيى عن مالك عن بن شهاب عن رجل من آل خالد بن أسيد: أنه سأل عبد الله بن عمر فقال: يا أبا عبد الرحمن إنا نجد صلاة الخوف وصلاة الحضر في القرآن ولا نجد صلاة السفر، فقال: بن عمر يا بن أخي إن الله عز و جل بعث إلينا محمدا (ولا نعلم شيئا، وإنما نفعل كما رأيناه يفعل¹

Ibn Bashkawal dalam kitabnya *Ghawamid al-Asma'* menjelaskan perawi *mubham* yang terdapat dalam sanad di atas ialah Umayyah bin 'Abd Allah bin Khalid bin Usayd.² Ia turut dinyatakan oleh Ibn Hibban dalam *sahihnya*³ dan Ibn 'Abd al-Bar dalam kitabnya *al-Tamhid*⁴

Penentuan Identiti Perawi dalam Kitab *Bahr al-Madhi*

Penentuan identiti perawi merupakan salah satu cabang dalam ilmu hadis riwayat yang sentiasa dititikberatkan oleh ulama-ulama hadis dalam kitab-kitab syarah hadis mereka. Namun penentuan yang diletakkan berbeza di antara seorang ulama dengan ulama hadis yang lain. Ada di kalangan mereka yang menterjemahkan dan menentukan seseorang perawi dengan panjang lebar melibatkan nama, keturunan, latar belakang pengajiannya, guru-gurunya, murid-muridnya sehinggalah ke tarikh wafatnya. Manakala ada pula di kalangan mereka yang menyentuh mengenai nama dan keturunan perawi sahaja. Antara kitab syarah hadis yang mengupas dengan panjang lebar mengenai terjemahan dan penentuan perawi ialah kitab *Fath al-Bari Syarh Sahih al-Bukhari* oleh Ibn Hajar al-'Asqalani (m.852H).

Al-Marbawi juga tidak ketinggalan menukulkan maklumat mengenai terjemahan dan penentuan perawi sebagaimana yang terdapat dalam kitabnya *Bahr al-Madhi*. Terjemahan dan penentuan perawi yang terdapat dalam kitab *Bahr al-Madhi* boleh dibahagikan kepada beberapa kategori seperti berikut:

i) Terjemahan sahabat

¹ Malik bin Anas, *Muwatta'* riwayat Yahya al-Laythi, Kitab Qasr al-Solat fi al-Safar, Bab Qasr al-Solat fi al-Safar, no hadis 334.

² Khalif bin 'Abd al-Malik Ibn Bashkawal, *Ghawamid al-Asma' al-Mubhamah*, tahqiq 'Iz al-Din al-Sayyid Dr, Bayrut: Dar 'Alam al-Kutub, j.2 h. 606

³ Ibn Hibban al-Busti, *Sahih Ibn Hibban bi tartib Ibn Balban* j.4 hlm 301 dan j.6 hlm 606

⁴ Yusuf bin 'Abd Allah bin 'Abd al-Bar, *al-Tamhid li ma fi al-Muwatta' min al-Ma'ani wa al-Asanid*, j.11, h. 161

Al-Marbawi kadangkala menterjemah seseorang perawi dari kalangan sahabat dengan terjemahan yang panjang melibatkan sejarah dan peristiwa yang dilalui oleh mereka terutamanya jika mempunyai kaitan dengan hadis yang dikemukakan. Terdapat pula dalam sesetengah keadaan terjemahan beliau dilihat terlalu ringkas dan tidak meluas. Antara contoh-contoh terjemahan perawi yang boleh dikemukakan di sini ialah seperti berikut:

Contoh 1

Bab pada menyatakan hadis bicara niat.

Ketika menterjemahkan Saidina 'Umar dalam "bab pada menyatakan hadis bicara niat" beliau telah meletakkan beberapa tajuk masalah khusus membicarakan sejarah hidup saidina 'Umar seperti berikut:¹

- 4- masalah: Tarikh hayat saidina 'Umar bin al-Khattab
- 5- masalah : Diperanakan saidina 'Umar.....
- 6- masalah : Apa sebab Islam saidina 'Umar ?
- 7- masalah : Saidina 'Umar mengajak nabi menzahirkan ugama Islam di hadapan Quraisy
- 8- masalah : Kerja saidina 'Umar di dalam Islam
- 9- masalah : Kegarangan saidina 'Umar
- 10- masalah : Peri kebahagiaan saidina 'Umar

Contoh 2

باب ما جاء في هي النساء عن تمنى ما فضل به الرجال، و ما نزل في ذلك،
عَنْ أُمِّ سَلْمَةَ أَنَّهَا قَالَتْ: يَغْزُو الرِّجَالُ وَلَا تَغْزُو النِّسَاءُ، وَإِنَّمَا لَنَا نَصْفُ
الْمِيرَاثِ، فَأَنْزَلَ اللَّهُ تَبَارَكَ وَتَعَالَى "وَلَا تَتَمَنَّوْا مَا فَضَّلَ اللَّهُ بِهِ بَعْضَكُمْ عَلَى
بَعْضٍ" قَالَ بِمَاجِدٍ : فَأَنْزَلَ فِيهَا : إِنَّ الْمُسْلِمِينَ وَالْمُسْلِمَاتِ، وَكَانَتْ أُمُّ
سَلْمَةَ أُولَى ظَعِينَةَ قَدِمَتْ الْمَدِينَةَ مَهَاجِرَةً

Tersebut di dalam kitab yang bernama *al-Isabah Fi Tamyiz al-Sahabah* ialah Ummu Salamah binti Abi Umayyah bin al-Mughirah bin 'Abd Allah bin 'Amrin bin Makhzum al-Qurasyiyah al-Makhzumiyah. Ialah Umm al-Mukminin yang telah jadi isteri Rasulullah ﷺ. Nama batang tubuhnya Hindun binti Abi

¹ Bahr al-Madhi j. 1, h. 5-8.

Umayyah bin Huzayfah. Dan suaminya yang pertama iaitu anak bapa saudaranya sebelah bapanya namanya Abu Salamah 'Abd Allah bin 'Abd al-Asad bin al-Mughirah. Dan adalah Ummu Salamah itu seorang perempuan yang telah Islam dahulu sama-sama orang-orang yang Islam di Mekah, telah Islam ia dengan suaminya, kemudian berpindah suami isteri ke negeri Habsyah kemudian kembali keduanya ke Mekah pula. Kemudian keluar ia dengan suaminya berpindah ke Madinah. Maka tatkala sampai suami isterinya di luar Mekah sudahlah ditahan kaum keluarganya tidak memberi Ummu Salamah dan anaknya yang bernama Salamah berpindah ke Madinah itu dan dapat lepas suaminya Abu Salamah berpindah dan tinggal ia sama-sama kaumnya hingga tiap-tiap hari ia menangis kerana bercerai dengan suaminya ...¹

Kajian yang dijalankan juga menunjukkan bahawa ketika melakukan penterjemahan perawi, al-Marbawi kadangkala merujuk kepada kitab *Usd al-Ghabah fi Ma'rifah al-Sahabah* oleh Ibn al-Athir al-Jazari (m.606H) dan *al-Isabah fi Tamyiz al-Sahabah* oleh Ibn Hajar al-'Asqalani (m.852H). Kadangkala pula beliau tidak menyatakan rujukan sama sekali.

Selain daripada bentuk-bentuk terjemahan di atas, al-Marbawi kadangkala memberikan sifat-sifat tertentu kepada perawi dari kalangan sahabat secara ringkas seperti contoh berikut:

Contoh 1

...diriwayatkan daripada saudara sepupu bagi nabi yang mahsyur alim sebesar-besar alim sahabat nabi namanya Saidina 'Abdullah bin 'Abbas²

¹ *Bahr al-Madhi* j. 21 h. 183. Sila lihat contoh lain pada j.16, h. 139 dan j. 21 h. 215.

² *Bahr al-Madhi* j. 12 h. 15

Contoh 2

...diriwayatkan daripada seorang perempuan yang terbilang masuk di dalam sahabat nabi namanya Khaulah binti Qays dan adalah ia di bawah yakni isteri bagi bapa penakan nabi yang bernama Saidina Hamzah.¹

Terjemahan juga kadangkala melibatkan sahabat yang disebutkan namanya dalam matan hadis seperti contoh berikut:

Contoh

باب ما جاء في الزوجين المشركين يسلم أحدهما، عَنْ عَمْرِو بْنِ شُعَيْبٍ عَنْ أَبِيهِ
عَنْ حَدِّهِ أَنَّ رَسُولَ اللَّهِ (رَدَّ ابْنَتَهُ زَيْنَبَ عَلَيَّ أَبِي الْعَاصِي بْنِ الرَّبِيعِ بِمَهْرٍ
حَدِيدٍ وَنِكَاحٍ حَدِيدٍ

229 masalah : Abu al-'As suami siti Zainab puteri nabi bagaimana tarikh kahwinnya dan cerainya (Kata Ibn al-Athir) di dalam Usd al-Ghabah – Abu al-'As itu ialah Ibn al-Rabi' bin 'Abd al-'Aziz bin 'Abd Syams bin 'Abd Manaf bin Qusay al-Qurasyi. Ialah menantu Rasulullah berkahwin dengan puterinya Siti Zainab anakanda baginda yang sulungnya. Maka menantu Rasulullah ini telah bersalah-salahan ulama pada namanya. Kata setengah orang namanya Laqit dan kata setengah orang Hasyim ada yang mengatakan mihsyam. Tetapi yang banyak orang katakan namanya ialah Laqit ...²

ii) Penterjemahan perawi selain perawi dari kalangan sahabat

¹ *Bahr al-Madhi* j. 16, h. 153. Sila lihat contoh lain pada j. 15, h. 50.

² *Bahr al-Madhi* j. 8, h. 146. Sila lihat contoh lain pada j. 21, h. 202 dan j. 2, h. 199.

Aspek penterjemahan dan penentuan perawi selain sahabat turut diberi penekanan oleh al-Marbawi. Walaupun beliau tidak memasukkan sanad-sanad hadis riwayat Imam al-Tirmidhi di dalam kitabnya *Bahr al-Madhi* namun aspek penterjemahan dan penentuan perawi selain perawi sahabat tetap tidak diabaikan. Dalam hal ini, beliau banyak menukilkan terjemahan perawi sebagaimana yang terdapat dalam kitab *al-Jami'*. Namun tidak semua perawi yang diterjemahkan oleh Imam al-Tirmidhi dalam kitab *al-Jami'* dinukilkan oleh al-Marbawi. Kebanyakan terjemahan perawi yang dinukilkan oleh beliau melibatkan perawi-perawi yang menggunakan *kunyah* (gelaran) sahaja.¹

Contoh 1

باب ما جاء في التجار وتسمية النبي (إياهم صَلَّى اللهُ عَلَيْهِ وَسَلَّمَ، قَالَ:
التَّاجِرُ الصَّدُوقُ الْأَمِينُ مَعَ التَّيِّبِينَ وَالصَّادِقِينَ وَالشُّهَدَاءِ

...(Kata Abu 'Isa) al-Tirmidhi bermula ini hadis *hasan* tiada kami ketahui akandia melainkan daripada ini wajah daripada hadis al-Thawri daripada Abu Hamazah. Dan Abu Hamazah itu namanya 'Abdullah bin Jabir maka ialah seorang syeikh di negeri Basrah.²

Al-Marbawi juga kadangkala menjelaskan status seseorang perawi yang dinyatakan dalam sesebuah matan hadis. Maklumat yang dikemukakan beliau akan dapat menjelaskan kedudukan perawi tersebut lebih-lebih lagi setelah sanad digugurkan.

¹ Kajian terhadap kitab *al-Jami'* menunjukkan penekanan Imam al-Tirmidhi kepada nama dan gelaran perawi (*al-asma' wa al-kuna*). Beliau akan memperkenalkan nama perawi jika disebut dengan gelarannya dan memperkenalkan gelaran perawi jika disebut dengan namanya. Imam al-Tirmidhi juga menekankan mengenai sejarah dan latarbelakang perawi (*Tarikh al-Rijal*) sama ada dari sudut waktu dan bila mendengar daripada guru, kelahiran dan sebagainya. Pengetahuan mengenai sejarah perawi akan dapat membantu dalam memastikan hadis yang bersambung atau terputus dan kesahihan hadis perawi atau *keda'ifannya*. Selain itu Imam al-Tirmidhi juga mengutamakan penjelasan terhadap *tabaqah* perawi sama ada dari *tabaqah* sahabat, tabiin atau sebagainya. Lihat Nur al-Din 'Itr Dr (1988), *op.cit.*, h. 222-224.

² *Bahr al-Madhi* j. 9 h. 89

Contoh 1

باب ما جاء في التغليس بالفجر، عَنْ عَائِشَةَ قَالَتْ: إِنَّ كَانَ رَسُولُ اللَّهِ (كَيْصَلِّي الصُّبْحَ فَيَنْصَرِفُ النِّسَاءُ قَالَ الْأَنْصَارِيُّ فَيَمُرُّ النِّسَاءَ مُتَلَفِّفَاتٍ بِمِرْوَطِهِنَّ مَا يُعْرِفْنَ مِنَ الْعَلَسِ)

Diriwayatkan daripada Siti 'Aisyah katanya bahawasanya adalah Rasulullah sembahyang Subuh ia dan sekalian kami ada hadir sama-samanya berjemaah. Apakala selesai sembahyang (فينصرف النساء) maka berpaling perempuan-perempuan, yakni mengizin akan kembali ke rumah masing-masing nabi akan sekalian perempuan (قال الأنصاري : فيمر النساء متلففات) kata guru Tirmidhi yang bernama Ishaq bin Musa al-Ansari pada riwayatnya maka lalulah segala perempuan yang berbulu dengan kain mereka itu pulang tiada dikenal akan mereka itu laki-lakikah atau perempuan daripada gelap hari oleh menunjukkan bersubuh amat nabi sembahyang itu sampai tiada berapa kenal seorang dengan seorang.¹

Dalam contoh di atas, al-Marbawi telah menterjemahkan al-Ansari sebagai guru Imam al-Tirmidhi yang bernama Ishaq bin Musa al-Ansari..

Contoh 2

باب ما جاء في الترجيع في الأذان

عَنْ أَبِي مَحْدُورَةَ أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ أَعَدَّهُ وَالْقَى عَلَيْهِ الْأَذَانَ حَرْفًا حَرْفًا قَالَ إِبْرَاهِيمُ مِثْلَ أَدَانَا قَالَ بَشْرٌ فَقُلْتُ لَهُ أَعِدْ عَلَيَّ فَوَصَفَ الْأَذَانَ بِالترْجِيعِ...صحيح

¹ Bahr al-Madhi j. 2 h. 16

Diriwayatkan daripada Abi Mahdhurah bahawasanya Rasulullah ﷺ menduduk ia akandia dan diajarnya atasnya akan bang sekalimah-sekalimah. Kata Ibrahim cicit kepada Abi Mahdhurah diajarnya semacam bang kita sehari ini. Kata Bisyr bin Mu'adh (guru Abu 'Isa al-Tirmidhi) maka aku kata baginya: Ya Ibrahim ulang olehmu akan ajar nabi atasku maka mensifat ia akan bang itu di dalam ajarannya dengan *tarji'*.¹

Dalam contoh di atas al-Marbawi telah menterjemahkan Ibrahim sebagai cicit kepada Abi Mahdhurah dan Bisyr bin Mu'adh pula sebagai guru Imam al-Tirmidhi.

iii) Terjemahan *al-Mubham*

Mubham merupakan *isim maf'ul* dari perkataan *ibham* yang membawa maksud *ghayru mubaiyyinin* ertinya yang tidak dijelaskan. Dari sudut istilah pula *mubham* bermaksud sebuah hadis yang terdapat pada matan atau sanadnya seseorang sama ada lelaki atau wanita yang tidak dijelaskan namanya.² Melalui terjemahan tersebut, sesebuah hadis itu akan dapat difahami dengan lebih mudah dan menyeluruh. Antara ulama hadis yang sentiasa komited dalam terjemahan *mubham* ialah Ibn Hajar al-'Asqalani (m.852H) dalam kitabnya *Fath al-Bari*.³

Bagi al-Marbawi, beliau sentiasa memastikan individu *mubham* ini diberikan pengenalannya sama ada maklumat tersebut dinukilkan daripada kitab *al-Jami'*, *Sahih al-Bukhari*, *'Aridah al-Ahwazi* dan sebagainya. Antara contoh-contohnya adalah seperti berikut:

¹ *Bahr al-Madhi* j. 2, h. 63-64. Sila lihat contoh lain pada j. 9, h. 15-16 dan j. 15, h. 137.

² Muhammad Abu al-Layth al-Khayr Abadi (2004), *Mu'jam al-Mustalahat al-Hadisiah*, Bangi: Dar al-Syakir, h. 74.

³ Muhammad Abu al-Layth al-Khayr Abadi Dr (2006), *Syarh al-Ahadis al-Nabawiyah: Ta'sis wa Tatbiq*, Prosiding Kertas kerja Seminar Antarabangsa mengenai metodologi pentafsiran al-Quran dan syarahan hadis di Universiti Islam Antarabangsa Malaysia pada 17 dan 18 Julai 2006, Kuala Lumpur: Jabatan al-Quran dan Sunnah Fakulti Ilmu Wahyu dan Kemanusiaan UIA. j. 3, h.1308.

Contoh 1

باب ما جاء في المداراة عن عائشة قالت استأذن رجل على رسول الله (، وأنا عنده، فقال: بئس ابن العشيرو أو أخو العشيرو، ثم أذن له فآلان له القول، فلما خرج قلت له يا رسول الله، قلت له ما قلت، ثم آلتت له القول، فقال يا عائشة إن من شر الناس من تركه الناس أو ودعه الناس أتقاء فحشيه

Diriwayatkan daripada seorang daripada isteri Rasulullah namanya Siti 'Aishah katanya telah minta izin masuk seorang laki-laki namanya 'Uyaynah bin Husnin bin Hudhayfah bin Badr al-Fizari (عيينة بن حصن بن حذيفة بن بدر الفزاري) dan juga dipanggil orang namanya *al-Ahmaq al-Muta* ' (الأحمق المطاع)¹

Contoh 2

باب ما جاء في الركعتين إذا جاء الرجل والإمام يخطب عن جابر بن عبد الله قال بينا النبي (يخطب يوم الجمعة إذ جاء رجل فقال النبي (أصليت قال لا قال قم فاركع

Diriwayatkan daripada seorang sahabat nabi bernama Jabir bin 'Abd Allah katanya di dalam antara nabi berkhotbah pada hari Jumaat tiba-tiba datanglah masuk seorang laki-laki kerana hadir Jumaat itu namanya Salik al-Ghatfani ...²

Penutup

Penghasilan kitab Bahr al-Madhi berjaya membuktikan ketokohan Sheikh al-Marbawi dalam bidang ilmu riwayat hadis antaranya berkaitan penentuan identiti perawi. Ilmu berkaitan penentuan identiti perawi merupakan salah satu ilmu di bawah ilmu riwayat hadis yang sentiasa diberi penekanan oleh ulama hadis

¹ Bahr al-Madhi j. 13, h. 207.

² Bahr al-Madhi j. 3, h. 216. Sila lihat contoh lain pada j. 20, h. 140 dan j. 3, h. 43.

dalam karya-karya penulisan mereka. Justeru ilmu tersebut wajar diberi perhatian oleh para ulama dalam menghasilkan karya-karya hadis. Kajian menunjukkan hampir tiada karya dalam bidang hadis karangan ulama nusantara yang menerapkan elemen ilmu riwayat hadis dalam karya-karya mereka. Berbeza dengan kitab Bahr al-Madhi, Sheikh al-Marbawi telah menunjukkan kesungguhannya dalam mengaplikasikan ilmu penentuan identiti perawi dengan menterjemahkan dan memperkenalkan perawi-perawi yang tidak jelas namanya dalam sanad ataupun matan.

KETOKOHAN SYEIKH MUHAMMAD YASIN AL-FADANI (1916 – 1990) DAN SUMBANGANNYA DALAM DISIPLIN PERIWAYATAN SANAD

Oleh :
Mohd. Khafidz bin Soroni¹
& Mohd. Norzi bin Nasir²

Abstrak

Di kalangan ilmuan hadis dari alam Melayu pada abad ke-20 dahulu, muncul nama Syeikh Muhammad Yasin al-Fadani yang keluarganya berasal dari Padang, Indonesia, namun beliau menghabiskan seluruh hayatnya di Hijaz, Arab Saudi. Namanya cukup dikenal pada zamannya sebagai pemegang sanad hadis tertinggi dan penyimpan hampir keseluruhan sanad-sanad keilmuan yang diwarisi oleh generasi zamannya. Gambaran kegigihan beliau menghimpun jalur-jalur pelbagai sanad keilmuan ini cukup jika dikatakan bahawa jumlah guru-gurunya sahaja mencecah sekitar 700 orang, suatu angka yang nadir didengar pada masa kini. Malah karya-karya beliau mengenainya sahaja berjumlah lebih kurang 70 buah buku. Artikel ini akan cuba memaparkan ketokohan dan sumbangan Syeikh Muhammad Yasin al-Fadani secara khusus dari sudut disiplin periwayatan sanad.

PENDAHULUAN

Mengenal dan meneladani visualisasi sebenar kehidupan dan keperibadian ulama merupakan antara kaedah penting dalam usaha melahirkan generasi qurani-sunni, bagi meniti kegemilangan ummah pada masa hadapan. Mereka merupakan kader-kader yang tetap teguh di atas asas-asas dan cabang-cabang agama sesuai dengan apa yang diturunkan oleh Allah SWT kepada Rasul-Nya, berdasarkan

¹ Pensyarah di Jabatan al-Quran dan al-Sunnah, Akademi Islam, Kolej Universiti Islam Antarabangsa Selangor.

² Pegawai Penyelidik di Institut Kajian Hadis Selangor (INHAD), dan Pensyarah di Jabatan al-Quran dan al-Sunnah, Akademi Islam, Kolej Universiti Islam Antarabangsa Selangor.

firman-Nya yang bermaksud: “Dan berpegang teguhlah kalian semua kepada tali Allah (al-Quran) dan janganlah berpecah-belah”¹. Ulama hadis secara khusus merupakan golongan yang memiliki tingkat kepercayaan yang paling tinggi dalam meyakini manhaj Rasulullah SAW yang cemerlang, serta berjalan di atas laluan yang ditempuh oleh para Sahabatnya, para Tabi’in dan juga Tabi’ al-Tabi’in. Melalui mereka hadis Rasulullah SAW terus dipelihara dan dikembangkan ke seluruh pelosok dunia. Semua gerak kerja yang dilakukan oleh mereka adalah demi mempertahankan hadis Rasulullah SAW dari diganggu-gugat oleh musuh-musuh Islam. Meskipun Alam Melayu agak kurang dikenali keterlibatannya dalam lapangan hadis di persada antarabangsa, namun tidak bermakna ia tidak memberikan sumbangan sama sekali terhadap kelangsungan disiplin ilmu hadis. Di kalangan barisan ilmuwan hadis dari Alam Melayu pada abad ke-20 dahulu, muncul nama Syeikh Muhammad Yasin al-Fadani, atau panggilan Melayunya ‘Syeikh Yasin Padang’ yang keluarganya berasal dari Padang, Sumatera, Indonesia, iaitu tokoh yang akan dibicarakan dalam tulisan ini serta sumbangan beliau dalam lapangan hadis, khususnya bidang periwayatan sanad.

SYEIKH MUHAMMAD YASIN AL-FADANI (1916 – 1990 M/1335 – 1410 H)

Biografi Ringkas

Nama penuh beliau ialah ‘Alam al-Din, Abu al-Fayd, Muhammad Yasin bin Muhammad ‘Isa bin Udik al-Fadani al-Makki al-Syafi’i. Gelaran al-Fadani adalah nisbah kepada daerah Padang, Indonesia, kerana keluarganya berasal dari sana. Beliau dilahirkan di al-Misfalah, Makkah al-Mukarramah pada tahun 1335H bersamaan 1916M. Syeikh Yasin al-Fadani mendapat pendidikan awal di Makkah daripada bapanya Syeikh Muhammad ‘Isa al-Fadani, dan bapa saudaranya Syeikh Mahmud al-Fadani yang melaluinya beliau belajar al-Qur’an al-Karim. Dalam usia yang awal, Syeikh Yasin al-Fadani telah menghafaz berbagai matan asas bagi ilmu-ilmu Islam.

¹ Surah Ali-‘Imran: ayat 103.

Kemudian beliau menyambung pelajarannya di Madrasah al-Saulatiyyah pada tahun 1346H.¹

Beliau merupakan dari kalangan ulama besar yang pernah mendapat pendidikan di Madrasah Saulatiyyah yang masyhur itu. Beliau kemudian berpindah belajar di Madrasah Dar al-'Ulum al-Diniyyah. Dikatakan beliau merupakan pencetus idea berdirinya madrasah tersebut dan sekaligus menjadi murid pertama madrasah itu di awal penubuhannya. Antara sebab tercetusnya idea untuk membangunkan madrasah berkenaan ialah disebabkan tindakan dan perlakuan mudir Madrasah Saulatiyyah ketika itu yang gemar menyinggung perasaan pelajar-pelajar yang datang dari Asia Tenggara. Hal ini terbukti dengan berpindahnya 120 orang pelajar dari Saulatiyyah ke Madrasah Dar al-'Ulum yang baru didirikan. Situasi seumpama ini hampir tidak pernah berlaku di mana-mana madrasah yang baru dibuka sebelumnya sehinggakan Dar al-'Ulum mendapat murid yang begitu ramai pada masa awal penubuhannya.²

Guru-Guru al-Fadani

Syeikh Yasin al-Fadani meneruskan pengembaraannya dalam menimba ilmu secara gigih. Selain menekuni pengajian di Madrasah Dar al-'Ulum, Makkah sehingga tamat pada tahun 1353H, beliau turut gigih bertalaqqi dari ramai ulama yang mengajar di Masjid al-Haram dan juga ulama-ulama yang datang berziarah ke Tanah Suci. Syeikh Yasin al-Fadani mempunyai bilangan guru yang sangat ramai, antaranya beliau telah belajar dengan Syeikh 'Umar Hamdan al-Mahrisi, Syeikh Muhammad 'Ali bin Husain al-Maliki, Syeikh 'Umar Ba-junaid, mufti Syafi'iyah Makkah, Syeikh Sa'id bin Muhammad al-Yamani, dan Syeikh Hassan al-Yamani. Beliau juga menimba ilmu

¹ Lihat: Yusuf al-Mar'asyli, Dr., 2006, *'Iqd al-Jawhar fi 'Ulama' al-Rub' al-Awwal min al-Qarn al-Khamis 'Asyar*, berserta kitab: *Nathr al-Jawahir wa al-Durar fi 'Ulama' al-Qarn al-Rabi' 'Asyar*, Beirut: Dar al-Ma'rifah, jld. 2, hlm. 2147. Ramzi Dimasyqiyah, 1997, mukadimah *al-Fawa'id al-Janiyyah*, Beirut, Lubnan: Dar al-Fikr, cet. 1, hlm 5. Anas Ya'qub Kutubi, "*Lamahat min Hayat al-Shaykh Muhammad Yasin al-Fadani*", dalam akhbar al-Madinah al-Munawwarah, bil. 9567, bertarikh 10 Safar 1414H.

² Lihat: Solah Nawadi, "Syeikh Muhammad Yasin 'Isa al-Fadani", dalam: <http://solahnawadi.blogspot.com/2007/06/yasin-padang.html>, juga dalam blog Taman Ulama : <http://tamanulama.blogspot.com/2008/05/syeikh-yasin-isa-al-fadani-dalam.html> . Martin van Bruinessen (1999), *Kitab Kuning, Pesantren, dan Tarekat: Tradisi-Tradisi Islam di Indonesia*, cet. 3. Bandung, Indonesia: Penerbit Mizan, h. 36-37.

dari Syeikh Muhsin bin 'Ali al-Musawa al-Falimbani, Sayyid 'Alawi bin 'Abbas al-Maliki al-Makki (bapa kepada al-Marhum Sayyid Muhammad bin 'Alwi al-Maliki al-Makki), Syeikh Hasan al-Masysyat, Syeikh Ahmad al-Mukhallalati, Syeikh Muhammad al-'Arabi al-Tabbani, Syeikh Muhammad Nur Sayf, Syeikh Amin Kutubi al-Hasani, Syeikh Ibrahim al-Fatani, dan ulama-ulama berpengaruh yang lain.

Manakala antara mereka yang dari luar Tanah Suci pula ialah Syeikh Ahmad bin Rafi' al-Tahtawi, Syeikh Muhammad Ibrahim al-Samaluti, Syeikh Muhammad Bakhit al-Muti'i, Syeikh Muhammad Hasanayn Makhluaf, Syeikh Muhammad al-Hafiz al-Tijani, Syeikh Muhammad al-Khidr Husayn, Syeikh Mahmud bin Muhammad al-Dumi, Syeikh Muhammad Anwar Syah al-Kasymiri, Syeikh Asyraf 'Ali al-Tahanawi, Syeikh Mufti Syafi' al-Deobandi, Syeikh Ahmad al-Siddiq al-Ghumari, Syeikh 'Abdullah al-Siddiq al-Ghumari, Syeikh 'Abd al-Hayy al-Kattani, dan ramai lagi, semoga Allah merahmati mereka semua.¹

Murid-Murid al-Fadani

Dalam memberi sumbangan keilmuan, Syeikh Yasin al-Fadani aktif mengajar dan memberi kuliah di Masjidil Haram dan juga Dar al-'Ulum al-Diniyyah, terutama disiplin ilmu hadis. Setiap kali tiba bulan Ramadan, beliau selalu membaca dan mengijazahkan salah satu di antara *al-Kutub al-Sittah* (enam kitab utama hadis). Aktiviti pengajaran ini berlangsung lebih kurang hampir selama 20 tahun.²

Murid-murid Syeikh Yasin al-Fadani yang mengambil sanad dari beliau amat ramai jumlahnya. Di antara mereka adalah al-Habib 'Umar bin Muhammad (Yaman), Syeikh Muhammad 'Ali al-Sabuni (Syam), Dr. Muhammad Hasan al-Dimasyqi, Dr. 'Ali Jum'ah (Mufti Mesir), Syeikh Isma'il Zayn Al-Yamani, Syeikh Hasan Qatirji, H. M. Zaini Abdul Ghani (Kalimantan), Tuan Guru Haji Abdullah bin Abdul Rahman (Pondok Lubuk Tapah, Kelantan), Tuan Guru Haji Hashim bin Haji Abu Bakar (Pondok Pasir Tumboh, Kelantan), Syeikh Muhammad

¹ Lihat juga senarai kesemua mereka seramai 700 orang dalam: Muntadayat Rawd al-Rayyahin, <http://cb.rayaheen.net/showthread.php?tid=23012>.

² Anas Ya'qub Kutubi, *op.cit.*

Nuruddin Marbu al-Banjari al-Makki (Maahad Az Zein, Bogor) dan sebagainya.

Kebanyakan murid Syeikh Yasin al-Fadani selain mengambil sanad hadis, secara ijazah am dan khas, mereka juga diberi keizinan untuk mengajar di Dar al-'Ulum. Antara mereka ialah H. Sayyid Hamid Al-Kaff, Dr. Muslim Nasution, H. Ahmad Damanhuri, H. M. Yusuf Hasyim, H. M. Abrar Dahlan dan Dr. Sayyid Agil Husain al-Munawwar, Ustaz Sukarnawadi bin Husnuddu'at, dan lain-lain.¹

Pujian Para Ulama Terhadap Syeikh Yasin al-Fadani

Keilmuan dan kehebatan Syeikh Yasin al-Fadani mendapat pujian dari ramai para ulama. Kebanyakan mereka memberikan sanjungan tinggi kepada beliau, bahkan ada yang mengubah bait-bait syair untuk mengungkapkan kekaguman mereka terhadap beliau.

Syeikh Zakariyya 'Abdullah Bila, salah seorang ulama Makkah yang masyhur berkata: "Sewaktu saya mengajar *Qawa'id al-Fiqh* di Saulatiyyah, saya seringkali mendapat kesulitan yang memaksa saya menyelak satu demi satu helaian kitab-kitab yang besar bagi merungkai kesulitan tersebut. Namun setelah terbit kitab *al-Fawa'id al-Janiyyah* karangan Syeikh Yasin al-Fadani, segala kesukaran menjadi mudah semuanya, dan bebanan dalam mengajar menjadi ringan".²

Dr. 'Abd al-Wahhab Abu Sulaiman, pensyarah pengajian tinggi Universiti Umm al-Qura di dalam kitabnya *al-Jawahir al-Thaminah fi Bayan Adillah 'Alim al-Madinah* berkata: "Syeikh Yasin adalah seorang muhaddith, faqih, mudir Madrasah Dar al-'Ulum, pengarang banyak kitab dan salah seorang ulama Masjid al-Haram".

Syeikh 'Umar 'Abd al-Jabbar melalui pernyataannya dalam akhbar *al-Bilad* terbitan Jumaat, 24hb. Zulkaedah 1379H/1960M berkata:

¹ Solah Nawadi, *op.cit.*

² *Ibid.*

“...Bahkan yang terbesar dari amal bakti Syeikh Yasin al-Fadani adalah membuka madrasah puteri (*al-banat*) pada tahun 1362H. Meskipun perjalanannya selalu menghadapi rintangan, namun beliau dapat mengatasinya dengan penuh kesabaran dan ketabahan...”.

Sayyid ‘Abd al-Rahman bin Muhammad bin ‘Abd al-Rahman al-Ahdal, salah seorang mufti Yaman pernah menggubah sebuah syair yang dikhususkan memuji Syekh Yasin al-Fadani. Dalam salah satu bait syairnya dia berkata:

أنت في العلم والمعاني فريد * وبعقد الفخار أنت الوحيد

“Engkau tiada taranya dari segi ilmu dan *ma‘ani*, di antara banyak kejayaan yang dibangun orang, kaulah satu-satunya yang berjaya”.

Dr. Yusuf ‘Abd al-Razzaq, pensyarah Fakulti Usuluddin, Universiti al-Azhar, Mesir juga memuji beliau melalui bait syairnya yang bermaksud : “Engkau di tengah kami seorang terpilih dari orang-orang terhormat, yang tak pernah mata melihat manusia seumpama mereka.”

Dr. ‘Ali Jum‘ah, Mufti Mesir sekarang dalam kitabnya *Hasyiah al-Imam al-Bayjuri ‘ala Jawharah al-Tawhid* yang ditahkiknya mengatakan bahawa beliau pernah menerima ijazah sanad dari Syeikh Yasin al-Fadani yang digelarinya sebagai *Musnid al-Dunya*.

Al-Habib Saqqaf bin Muhammad al-Saqqaf (m. 1373H), seorang tokoh ulama dari Hadramaut menceritakan kekaguman beliau terhadap Syeikh Yasin al-Fadani, dan menjulukinya sebagai ‘*Suyuti Zamanihi*’.

Selain yang tersebut di atas, terdapat banyak lagi pujian para ulama lain terhadap keilmuan dan kehebatan Syeikh Yasin al-Fadani.¹

¹ *Ibid.*

Karya-Karya Syeikh Yasin al-Fadani

Syeikh Yasin al-Fadani termasuk dalam golongan ulama yang mempunyai hasil penerbitan yang sangat banyak, ada yang berjilid-jilid besar dan ada yang hanya berupa risalah kecil sahaja. Karya-karya tersebut pula di dalam berbagai bidang ilmu. Disenaraikan di bawah karya-karya beliau dalam bidang-bidang ilmu selain hadis seperti fiqh, balaghah, usul, falak, mantik dan sebagainya, manakala berkaitan bidang hadis pula akan diperincikan secara khusus dalam bahagian kedua artikel ini:

- 1- إتخاف الخللان شرح تحفة الإخوان في علم البيان
- 2- الكوكب الساطع نظم جمع الجوامع إضاءة النور اللامع شرح
- 3- بلغة المشتاق في علم الاشتقاق الشيرازي
- 4- بغية المشتاق شرح لمع الشيخ أبي إسحاق
- 5- تميم الدخول: تعليقات على مدخل الوصول إلى علم الأصول
- 6- تشنيف السمع مختصر في علم الوضع
- 7- تعليقات على شرح منظومة الزمزمي في أصول التفسير
- 8- تعليقات على لمع أبي إسحاق الشيرازي في الأصول
- 9- تقريب المسلك لمن أراد علم الفلك
- 10- جنى الثمر شرح منظومة منازل القمر
- 11- حاشية على الأشباه والنظائر في فروع الفقه الشافعي للسيوطي
- 12- حاشية على التلطف شرح التعرف في أصول الفقه
- 13- حاشية على رسالة حجر زاده في علم الوضع
- 14- حاشية على القواعد الكبرى للعز بن عبد السلام
- 15- حسن الصياغة شرح كتاب دروس البلاغة
- 16- الحميلة شرح متوسط على ثمرات الوسيلة
- 17- الدر النضيد حواشٍ على كتاب التمهيد للإسنوي في أصول الفقه الشافعي
- 18- الرسالة البيانية في علم البيان على طريقة السؤال والجواب
- 19- رسالة في المنطق
- 20- الرياض النضرة شرح نظم اللآلي المنتثرة في المقولات العشرة
- 21- شرح على رسالة العضد في الوضع
- 22- شرح على منظومة الرُّبْد لابن رسلان في الفقه الشافعي
- 23- الفوائد الجميلة شرح كبير على ثمرات الوسيلة

- 24 - الفوائد الجنية حاشية على المواهب السنّية على القواعد الفقهيّة
- 25 - الكوكب الأنور في أسماء النجوم السماوية
- 26 - المختصر المهذب في استخراج الأوقات والقبلة بالربع المُجيب
- 27 - منهل الإفادة حواش على رسالة آداب البحث والمناظرة لطاش كبري زاده
- 28 - نيل المأمول حاشية على لب الأصول وشرحه غاية الوصول
- 29 - المواهب الجزيلة من أزهار الخميّة على ثمرات الوسيلة

Kewafatan dan Kesimpulan

Setelah kehidupan yang penuh dengan ibadah dan sumbangan ilmiah, Syeikh Yasin al-Fadani telah wafat pada pagi hari Jumaat, 28hb. Zulhijah 1410H, bersamaan dengan 21hb. Julai 1990M. Jenazah beliau telah dimakamkan selepas solat Juma'at di permakaman Ma'la, Makkah.¹ Semoga Allah SWT mencucuri rahmat-Nya yang luas ke atas roh beliau, amin.

Sebagai kesimpulan, dapat dikatakan keperibadian tokoh hadis ini dapat dianggap mirip dengan visualisasi keperibadian ulama-ulama hadis yang terdahulu. Kewujudan para ulama hadis sepanjang zaman merupakan satu kurniaan istimewa dari Allah SWT dalam menjaga syariat Nabi-Nya. Sumbangan tidak ternilai mereka yang berupa penyusunan pelbagai kaedah dan metod dalam lapangan ilmu hadis telah berjaya dijadikan garis panduan oleh seluruh sarjana Islam dan digunakan secara ilmiah untuk meneliti kesahihan sesuatu fakta.

Keahlian dan keilmuan Syeikh Yasin al-Fadani dalam lapangan hadis merupakan hasil dari pengetahuan dan pemahaman yang mendalam merentasi pelbagai disiplin ilmu tersebut seperti *naqd al-hadis*, *al-jarh wa al-ta'dil*, *ruwat al-hadis*, *'ilal al-hadis*, *fiqh al-hadis* dan lain-lain, dan bukan dari sebuah kejumudan pemikiran dan pemahaman yang dangkal terhadap *turath*. Usaha yang disumbangkan oleh Yasin

¹ Lihat : Ramzi Dimasyqiyah, 1997, mukadimah *al-Fawa'id al-Janiyyah*, Beirut, Lubnan: Dar al-Fikr, cet. 1, hlm 25. Fayad al-'Absu, *al-Syaykh Muhammad Yasin al-Fadani al-Makki (1916-1990)*, <http://favad-maktoobblog.com/>, Muhammad 'Ali Yamani, *al-Syaykh Muhammad Yasin al-Fadani (1335-1410)*, <http://www.makkawi.com/Articles/show.aspx?id=323>, Dr. Yahya al-Ghawthani, *Tarjamah Mukhtasarah li Musnid al-'Asr al-Shaykh Muhammad Yasin al-Fadani*, <http://montada.gawthany.com/vb/showthread.php?t=20557&highlight=%C7%E1%DD%C7%CF%C7%E4%ED>.

al-Fadani dan ulama-ulama lain seumpamanya melalui karya-karya agung mereka adalah bukti secara langsung bahawa mereka amat gigih mempertahankan sunnah Rasulullah SAW, sebagai penyampai terakhir wahyu Allah melalui lidah, perbuatan, pengakuan, dan akhlak baginda.

KETOKOHAN DAN SUMBANGAN SYEIKH YASIN AL-FADANI DALAM DISIPLIN PERIWAYATAN SANAD

Kewibawaan al-Fadani Dalam Ilmu Hadis

Ilmuwan hadis Nusantara ini mempunyai kepakaran kelas pertama dalam bidang hadis, selain bidang-bidang ilmu *usul al-hadis*, *usul tafsir*, *fiqh*, *usul al-fiqh* dan ilmu falak. Namanya setanding dengan nama-nama ulama hadis terkenal lain, seperti Syeikh Abu al-Tayyib Syams al-Din al-'Azim Abadi, pengarang kitab *'Awn al-Ma'bud* dan Syeikh Muhammad Khalil al-Saharanfuri, pengarang kitab *Badhl al-Majhud*. Kedua-duanya merupakan syarah kitab *Sunan Abi Dawud* yang tidak asing kepada guru-guru, para pelajar dan seluruh pencinta ilmu yang membawa banyak barakah dalam bidang ini. Syeikh Yasin al-Fadani juga turut mensyarah kitab *Sunan Abi Dawud* yang diberi judul *al-Durr al-Mandud*, yang dikatakan setebal 20 jilid. Keluasan ilmu yang dianugerahkan kepadanya dalam bidang hadis, terutama dalam pengkhususan sanad dan *musalsalat* menjadikan beliau digelar sebagai *Musnid al-'Asr* (penyimpan sanad pada zaman ini). Justeru, tidak hairan jika Syeikh Yasin al-Fadani pada masa hayatnya sering menjadi buruan pencinta sanad hadis untuk mendapatkan silsilahnya yang lebih tinggi.¹

Disiplin Periwatyan Sanad

Sebagaimana diketahui, para ulama telah membahagikan pengajian ilmu hadis kepada dua bahagian, iaitu: ilmu *riwayah al-hadis* dan ilmu *dirayah al-hadis*.² Terdapat beberapa takrifan yang diberikan

¹ Abdul Hayei Abdul Sukor, Dr., *Muhammad Yassin Isa al-Fadani 1916–1990M/1335–1410H*, <http://www.drhayei.com/2010/07/tokoh-islam.html>

² Lihat contohnya : Muhammad ibn Sa'id ibn al-Akfani (1994), *Irsyad al-Qasid ila Asna al-Maqasid*, Jeddah: Dar al-Qjblah, h. 102. al-Imam Jalal al-Din 'Abd al-Rahman al-Suyuti (1993), *Tadrib al-Rawi fi Syarh Taqrib al-Nawawi*, tahkik Syeikh 'Irfan 'Abd al-Qadir Hassunah, Beirut: Dar al-Fikr, h. 12-13. Muhammad Jamal al-Din al-Qasimi (1993), *Qawa'id al-Tahdith min Funun Mustalah al-Hadis*, tahkik

oleh para ulama bagi kedua-dua jenis ilmu ini. Namun di sini secara rumusan, penulis memilih takrifan Dr. Muhammad Abu al-Layth al-Khayr Abadi kerana berpendapat takrifan tersebut lebih tepat. Menurut beliau, ilmu *riwayah al-hadis* ialah; ‘ilmu mengenai kaedah-kaedah yang dapat diketahui dengannya hal keadaan perawi dan hadis yang diriwayatkan’.¹ Manakala takrifan yang tepat bagi ilmu *dirayah al-hadis* menurut beliau ialah ; ‘ilmu yang membahaskan tentang makna yang difahami daripada lafaz-lafaz hadis, dan tentang maksud daripadanya, berdasarkan kaedah-kaedah bahasa Arab dan batasan-batasan syar’i, serta bersesuaian dengan hal ehwal Nabi SAW’.²

Secara ringkas berdasarkan takrifan-takrifan tersebut, ilmu *riwayah al-hadis* ialah ilmu yang berkaitan dengan sanad dan matan hadis. Manakala ilmu *dirayah al-hadis* pula ialah ilmu yang berkaitan dengan matan hadis semata-mata, iaitu secara khusus berkaitan tentang fiqh/kefahaman teks hadis.³ Dalam tulisan ini pula akan membincangkan ketokohan dan sumbangan Syeikh Yasin al-Fadani khusus dalam bidang periwayatan sanad yang merupakan sebahagian dari ilmu *riwayah al-hadis*. Beliau telah menghasilkan sekitar 70 buah karya berkaitan tentangnya yang akan dibincangkan dalam tulisan ini. Manakala dalam ilmu *dirayah al-hadis* pula, Syeikh Yasin al-Fadani telah menghasilkan beberapa buah kitab yang sebahagiannya agak besar berjilid-jilid, iaitu;

- ١ - الدر المنضود شرح سنن أبي داود
- ٢ - فتح العلام شرح بلوغ المرام من أدلة الأحكام لابن حجر العسقلاني
- ٣ - شرح الجواهر الثمين في أربعين حديثاً من أحاديث سيد المرسلين للعجلوني
- ٤ - شرح المسلسل بالعترة الطاهرة

Muhammad Bahjah al-Baytar, Beirut: Dar al-Nafa’is, c. 2, h. 77. Haji Khalifah (1992), *Kasyf al-Zunun ‘an Asami al-Kutub wa al-Funun*, Beirut : Dar al-Kutub al-‘Ilmiyyah, j. 1, h. 635. Siddiq Hasan Khan al-Qinnawji (1987), *al-Hittah fi Dhikr al-Sihah al-Sittah*, Beirut : Dar al-Jil, h. 140.

¹ Dr. Muhammad Abu al-Layth al-Khayr Abadi (2003), *‘Ulum al-Hadis Asiluha wa Mu’asiruha*, Selangor: Dar al-Syakir, h. 7.

² *Ibid.*, h. 9.

³ *Ibid.* Di antaranya ialah ilmu *mukhtalif al-hadis* (percanggahan antara hadis), ilmu *musykil al-hadis* (kemusykilan pada hadis), ilmu *nasikh al-hadis* dan *mansukh al-hadis* (hadis yang memansuh dan yang dimansuh), ilmu *gharib al-hadis* (kalimah-kalimah janggal dalam hadis), ilmu *asbab wurud al-hadis* (sebab-sebab pengucapan hadis) dan ilmu *al-bu’d al-zamani wa al-makani fi al-hadis* (kondisi masa dan tempat dalam hadis).

Namun sayangnya, kitab syarah beliau *al-Durr al-Mandud*, yang dikatakan setebal 20 jilid telah hilang semasa hayat beliau lagi. Menurut Syeikh Mahmud Sa'id Mamduh dalam *Tasynif al-Asma' bi Syuyukh al-Ijazah wa al-Sama'*: "Saya pernah melihat sebahagian darinya di dalam perpustakaan peribadi beliau".¹

Ketokohan Dan Sumbangan al-Fadani

Berpandukan takrifan ilmu *riwayah al-hadis* di atas, iaitu; 'ilmu mengenai kaedah-kaedah yang dapat diketahui dengannya hal keadaan perawi dan hadis yang diriwayatkan', dapat difahami bahawa skop ilmu ini adalah lebih luas berbanding ilmu *dirayah al-hadis*, dan termasuk juga padanya ilmu *mustalah al-hadis*. Namun, huraian perbahasan dalam tulisan ini adalah mengenai ketokohan dan kewibawaan Syeikh Yasin al-Fadani dalam salah satu cabang ilmu tersebut, iaitu disiplin periwayatan sanad. Justeru penekanan perbahasannya adalah tertumpu kepada ilmu sanad, periwayatannya serta cabang-cabangnya, iaitu makna zahir dari segi bahasa bagi ilmu *riwayah al-hadis*. Maka dengan maksud tersebut, ketokohan dan sumbangan Syeikh Yasin al-Fadani ini dapat dilihat daripada sudut-sudut berikut;

1. Kegigihan bertalaqqi dengan guru dan menghimpun sanad-sanad mereka

Syeikh Yasin al-Fadani adalah seorang yang gigih bertalaqqi (berguru secara berhadapan) dalam menimba ilmu dan menghimpunkan sanad-sanad periwayatan daripada alim ulama di zaman beliau. Tinggalnya beliau di Tanah Suci Makkah memudahkan beliau bertemu dengan ramai alim ulama Islam, sama ada dari Tanah Suci sendiri mahupun dari pelbagai pelosok dunia yang datang ke Tanah Suci, seperti dari Syria, Lubnan, Palestin, Yaman, Mesir, Maghribi, Iraq, Pakistan, Rusia, India, Indonesia dan juga Malaysia sehingga terkumpul di sisi beliau pelbagai macam sanad periwayatan ilmu dan hadis. Dikatakan, keseluruhan guru-guru yang beliau pernah temui atau beliau utuskan surat untuk meminta ijazah berjumlah

¹ Lihat : Mohd. Khafidz bin Soroni, *Juhud al-'Ulama' al-Muslimin fi Syarh Kutub al-Hadis fi al-Qarn al-Rabi' 'Asyar al-Hijri*, dalam Prosiding Mu'tamar 'Alami 'an Manahij Tafsir al-Qur'an wa Syarh al-Hadis, 21-22 Jamadil Akhir 1427H, UIAM.

sekitar 700 orang.¹ Menurut Dr. Yahya al-Ghawthani, beliau memperoleh isnad hadis daripada lebih 700 syeikh, dan ia merupakan satu jumlah yang memang sukar ditandingi.

Jumlah yang besar ini menjadikan ketokohan Syeikh Yasin al-Fadani dalam ilmu *riwayat al-hadith* tidak ada tolok bandingnya di kalangan ulama mutaakhirin dunia Islam, kecuali Syeikh ‘Abd al-Hayy bin ‘Abd al-Kabir al-Kattani (m. 1382H), seorang ahli hadis besar daripada Maghribi. Dikatakan kedudukan beliau adalah sebagai pengganti selepas daripada Syeikh ‘Abd al-Hayy bin ‘Abd al-Kabir al-Kattani, yang juga merupakan gurunya dan pengarang kitab *Fihris al-Faharis wa al-Athbat*, di mana guru-guru ijazah beliau berjumlah sekitar 500 orang.² Maka tidak hairanlah jika ada yang menjoloki Syeikh Yasin al-Fadani dengan gelaran ‘*Musnid al-Dunya*’ atau ‘*Musnid al-‘Asr*’.

Mengetahui hal tersebut, maka ramailah para penuntut ilmu yang datang kepada beliau bagi bertalaqqi dan mendapatkan sanad-sanad periwayatan. Ratusan, bahkan ribuan murid-murid beliau, sama ada dari dalam mahupun dari luar Tanah Suci kemudian bertebaran di berbagai pelosok dunia membawa sanad-sanad periwayatan daripada beliau menjadikan namanya cukup dikenali di kalangan pencinta-pencinta sanad. Sebagai rekod dan penghargaan, ada di antara mereka yang mendokumenkan *manaqib* dan sanad-sanad periwayatan beliau di dalam buku-buku khusus, antaranya ialah;

- 1 - إعلام القاصي والداني ببعض ما علا من أسانيد الفاداني، جمعه تلميذه محمود سعيد ممدوح.
- 2 - تشنيف الأسماع بشيوخ الإجازة والسماع، أو إمتاع أولي النظر ببعض أعيان القرن الرابع عشر، جمعه تلميذه محمود سعيد ممدوح (وهو في تراجم بعض مشايخ الفاداني وقد حوى 230 ترجمة)
- 3 - بلوغ الأماني في التعريف بشيوخ وأسانيد مسند العصر الشيخ محمد ياسين محمد عيسى الفاداني، جمعه تلميذه محمد مختار الدين الفلمباني.

¹ Anas Ya’qub Kutubi, “*Lamahat min Hayat al-Syaykh Muhammad Yasin al-Fadani*”, dalam akhbar al-Madinah al-Munawwarah, bil. 9567, bertarikh 10 Safar 1414H. Mukadimah Dr. Yusuf al-Mar’asyli bagi kitab *al-Rawd al-Fa’ih wa Bughyah al-Ghadi wa al-Ra’ih fi Ijazah Muhammad Riyad al-Malih* oleh Syeikh Muhammad Yasin al-Fadani. Lihat juga senarai kesemua mereka dalam: Rawd al-Rayyihin, <http://cb.rayaheen.net/showthread.php?tid=23012>

² ‘Abd al-Hayy bin ‘Abd al-Kabir al-Kattani, 1982, *Fihris al-Faharis wa al-Athbat*, c. 2, tahqiq: Dr. Ihsan ‘Abbas, Beirut: Dar al-Gharb al-Islami, j. 1, h. 58.

4- الثمر الداني في مقروءات ومسموعات ومرويات شيخنا الفاداني، بقلم الدكتور يحيى بن عبد الرزاق الغوثاني.

5- إتحاف الخاص والعام باتصالات الفاداني بشيوخ الشام، للدكتور يحيى الغوثاني

2. Penyusunan, penyelenggaraan dan penerbitan kitab-kitab berkaitan sanad-sanad periwayatan

Sanad merupakan suatu keistimewaan khusus bagi ummah ini. Jika tujuan sanad pada awal dahulu adalah untuk memastikan kesahihan riwayat sesuatu hadis, namun ilmu sanad kemudiannya berkembang sama sepertimana ilmu-ilmu Islam yang lain, sehingga ia menjadi suatu seni yang tersendiri. Cuma bezanya, syarat yang ketat dan penelitian yang tegas terhadap perawi-perawi pada peringkat awal dahulu telah dilonggarkan pada peringkat mutakhir, iaitu apabila kebanyakan hadis sudah direkod dan dibukukan oleh para ulama hadis. Justeru kemudiannya, ramai ulama mutaakhirin yang membenarkan pengijazahan sanad serta meriwayatkannya berdasarkan ijazah tersebut semata-mata tanpa perlu bertalaqqi penuh.

Tradisi periwayatan secara bersanad diteruskan sehingga kini kerana ia adalah satu kemuliaan dan keistimewaan bagi umat Islam (خصوصية) yang dapat dilihat dari sudut-sudut berikut;

1. Merupakan satu kemuliaan dalam rantaian pertalian yang bersambungan sampai kepada Rasulullah SAW, sebagaimana dikatakan; (وكفى في الاتصال بالحبيب شرفاً).
2. Merupakan satu *iqtida'* (mencontohi) dengan para salafus-soleh dalam tradisi belajar dan mengajar, sebagaimana dikatakan; (إنَّ التشبه بالكرام فلاح).
3. Merupakan satu syiar agama dan kebanggaannya, serta ia menjadi suatu jati diri dan ikatan ilmu yang hanya dimiliki oleh umat Islam, sebagaimana dikatakan; (الإستناد من الدين).
4. Merupakan satu jalinan kukuh bagi khazanah ilmu Islam, sebagaimana dikatakan; (إنَّ الأسانيد أنساب الكتب).

5. Merupakan satu rahmat dan barakah, sebagaimana dikatakan; (عند ذكر الصالحين تنزل الرحمة).

Realiti menyaksikan usaha memelihara kesinambungan sanad ini yang mudah-mudahan berterusan sehingga ke hari kiamat kelak. Antara bukti menunjukkan bahawa para ulama semenjak dahulu mengambil berat mengenai periwayatan sanad ialah perbincangan tentang ilmu *al-tahammul wa al-ada'* (pembawaan dan penyampaian riwayat) dalam ilmu *ulum al-hadis*, serta turut dibincangkan juga tentang adab-adab muhaddith dan juga penuntut hadis. Perkara ini dapat dirujuk dalam hampir kesemua kitab-kitab *ulum al-hadis* yang disusun. Hanya pengembaraan-pengembaraan getir ahli hadis dalam mencari sanad sahaja yang berakhir, iaitu dalam kurun ke-6 hijrah, di mana semua riwayat telah dibukukan dalam *al-Jawami'*, *al-Sihah*, *al-Sunan*, *al-Masanid*, *al-Ma'ajim*, *al-Ajza'*, *al-Fawa'id*, *al-Masyakhah* dan lain-lain.

Setelah kurun itu, para ulama hadis terus berusaha memelihara sanad ini sehingga ada sebahagian mereka yang membukukannya di dalam kitab-kitab khusus. Perhatian terhadap pengumpulan sanad ini kemudian terus bertambah di kalangan ulama hadis sehingga dikatakan hampir tiada seorang ulama hadis pun melainkan ia mempunyai kitab sanad yang merekodkan sanad-sanadnya dan juga biografi semua atau sebahagian syeikhnya. Kitab-kitab mereka ini disebut dengan berbagai istilah iaitu *masyakhah*, *barnamij*, *fihris*, *thabat* dan juga *mu'jam*. Riwayat-riwayat mereka dalam mempelbagaikan kesenian sanad tidak hanya sekadar pada kitab-kitab hadis sahaja, malah ia melangkaui sehingga pada kitab-kitab tafsir, fiqh, usul, akidah, tasawuf dan lain-lain.¹

Syeikh Yasin al-Fadani telah menyusun banyak kitab berkaitan sanad-sanad periwayatan pada masa hidupnya. Kebanyakannya beliau terbitkan dengan menggunakan pembiayaan sendiri. Ada sekitar 70 buah karya yang telah disusunnya berhubung perkara ini. Karya-

¹ Lihat: Mukadimah Syeikh Muhammad Yasin al-Fadani ke atas kitab: *Riyad Ahl al-Jannah bi Athar Ahl al-Sunnah*, 1985, Dimasyq: Dar al-Basa'ir, h. 8-9.

karya ini membuktikan kemahiran dan kebijaksanaan Syeikh Yasin al-Fadani dalam bidang ilmu sanad. Ia turut mempamerkan kekreatifan beliau dalam sudut kepelbagaian seni sanad. Dan pada perbincangan seterusnya dalam artikel ini, insya Allah, akan mendedahkan sudut berkenaan secara panjang lebar.

Antara kitab-kitab sanad yang telah disusun oleh beliau, dan di antaranya ada yang berjilid-jilid tebalnya;

- 1- إتخاف البررة بأسانيد الكتب الحديثية العشرة
- 2- أسانيد الكتب الحديثية السبعة
- 3- الأسانيد المكية لكتب الحديث والسير والشمال المحمدية
- 4- بغية المرید فی علوم الأسانید (وهو ثبته الكبير في 4 أجزاء)
- 5- تنوير البصيرة بطرق الإسناد الشهيرة
- 6- الدر الفريد من درر الأسانيد
- 7- العقد الفريد من جواهر الأسانيد
- 8- الكواكب السيارة في الأسانيد المختارة

3. Keprihatinan terhadap sanad-sanad tokoh-tokoh tertentu

Di kalangan tokoh-tokoh ulama yang memiliki sanad-sanad periwayatan, ada di antara mereka yang membuku atau merekodkannya di dalam kitab sanad (seperti *thabat*), dan ada antara mereka yang tidak merekodkannya dalam sebarang buku, namun sanad-sanad tersebut kemudian ditulis dan dihimpunkan oleh murid-murid mereka atau *musnid-musnid* yang prihatin melalui usaha ikhtiar sendiri. Ada juga tokoh yang mempunyai kitab sanad, namun ianya tidak lengkap atau tidak tersusun, maka murid-muridnya atau *musnid-musnid* yang datang kemudian mengemaskini sanad-sanad yang diriwayatkannya. Ada juga yang cuba merekodkan jaringan sanad-sanad kepada seseorang tokoh itu.

Inilah antara yang dilakukan oleh Syeikh Yasin al-Fadani terhadap beberapa tokoh ulama yang memiliki sanad, seperti al-Kuzbari, Ibn Hajar al-Haytami, 'Abd al-Baqi al-Ba'li, Khalifah al-Nabhan, Sayyid

Muhsin al-Musawwa, Muhammad 'Ali al-Maliki, 'Umar Hamdan dan Ahmad al-Mukhallalati. Karya-karya tersebut adalah seperti berikut;

- 1- بأسانيدي إلى الوجيه الكُزْبَرِي إتخاف الطالب السري
- 2 - أسانيد الفقيه أحمد بن محمد بن حجر الهيتمي المكي (ت 974هـ)، وهي إجازة للشيخ فضل بن محمد بن عوض بافضل الترمي.
- 3 - الوصل الراقي في ترجمة وأسانيد الشهاب أحمد المخلاقي
- 4 - فيض الإله العلي في أسانيد عبد الباقي العلي الحنبلي
- 5 - فيض الرحمن في ترجمة وأسانيد الشيخ خليفة بن حمد آل نيهان
- 6 - فيض المهمين في ترجمة وأسانيد السيد محسن
- 7 - المسلك الجلي في أسانيد محمد علي بن حسين المالكي
- 8 - مطمح الوجدان في أسانيد الشيخ عمر بن حمدان - 3 أجزاء،
- 9- إتخاف الإخوان باختصار مطمح الوجدان من أسانيد الشيخ عمر حمدان

4. Keprihatinan terhadap pengijazahan sanad dan pandangan mengenainya

Syeikh Yasin al-Fadani mempunyai kekreatifan tersendiri dalam soal pengijazahan sanad, sama ada yang berbentuk ijazah khas, ijazah am ataupun ijazah mutlak. Berhubung ijazah khas, beliau didapati memberi perhatian istimewa kepada sebilangan tokoh ulama dan orang tertentu yang dirasakan kewibawaan mereka oleh beliau dengan menyusun kitab-kitab ijazah sanad yang khusus buat mereka. Antara mereka ialah ; Dr. Muhammad bin 'Alawi al-Maliki, Syeikh Ayman Suwaid, Dr. Yahya Ghawthani, Syeikh 'Abdullah al-Jarafi, Syeikh Muhammad Riyad al-Malih, al-'Allamah Muhammad Zabarrah, al-Sayyid Abu Bakr al-Habsyi, Syeikh Isma'il Zain, al-Qadi Muhammad al-'Umari, Syeikh Muhammad Taqiy al-'Uthmani, al-Mufti al-Sayyid Ibrahim bin 'Aqil, Dr. Mahmud Sa'id Mamduh, Syeikh Zakariyya Bila, al-Sayyid Muhammad al-Hasyimi dan lain-lain.

Beliau telah menyusun kitab-kitab ijazah sanad yang khusus buat mereka dan setiap satunya pula memiliki ciri-ciri yang tidak ada pada lainnya. Sebagai contoh, ijazah beliau kepada Syeikh Muhammad Riyad al-Malih yang berjudul *al-Rawd al-Fa'ih*, di mana beliau telah menghimpunkan di dalam kitab tersebut secara khusus semua

gurunya yang berasal dari Syam (yakni Syria, Lubnan, Palestin dan Jordan sekarang) sahaja yang berjumlah seramai 101 orang syeikh serta kesemua sanad mereka.

Kitab-kitab ijazah khas yang tersebut ialah;

- 1- إتحاف المستفيد بغرر الأسانيد (ويسمى إتحاف أولي النهى بإجازة الأخ الشيخ محمد طه)
- 2- إجازة السيد محمد علوي المالكي
- 3- إجازة الشيخ أئمن سويد
- 4- إجازة الشيخ يحيى غوثاني
- 5- تذاكر المصافي بإجازة الفخر عبد الله بن عبد الكريم الجراي والصفى أحمد بن أحمد الجراي.
- 6- الواي بذيل تذاكر المصافي بإجازة الفخر عبد الله الجراي والصفى أحمد الجراي.
- 6- الروض الفاتح وبغية الغادي والراتح بإجازة الأستاذ محمد رياض المالح
- 7- السلاسل المختار بإجازة العلامة السيد محمد زبارة
- 8- سلسلة الوصلة: مجموعة مختارة من الأحاديث المسلسلة (إجازة للقاضي السيد أبي بكر الحبشي)
- 9- عقود اللجين في إجازة الشيخ إسماعيل عثمان زين
- 10- فتح الرب المجيد فيما لأشياخي من فرائد الإجازات والأسانيد (وهي إجازة كبرى للنايعة القاضي محمد العمري).
- 11- النفحة المسكية في الأسانيد المكية (إجازة للنايعة القاضي محمد بن عبد الله العمري)
- 12- فيض الباري بإجازة الوجيه السيد عبد الرحمن الأنباري
- 13- الفيض الرحمان بإجازة الشيخ محمد تقي العثماني
- 14- فيض المبدي بإجازة الشيخ محمد عوض منقش الزبيدي
- 15- فرة العين بإجازة الأستاذين
- 16- القول الجميل في إجازة سماحة المفتي السيد إبراهيم بن عمر بن عقيل
- 17- الكواكب الدراري في إجازة محمود بن سعيد القاهري
- 18- المواهب الجزيلة والعقود الجميلة في إجازة العلامة الباحثة المشارك الشيخ أبي يحيى زكريا بن عبد الله بيلا
- 19- نهج السلامة في إجازة الصفى أحمد أحمد سلامة
- 20- الوصل السامي بإجازة السيد محمد الهاشمي

Karya-karya ini membuktikan bahawa Syeikh Yasin al-Fadani berjaya mencantumkan dan menggabungkan sanad-sanad periwayatan yang diterima daripada guru-guru beliau yang sangat ramai jumlahnya.

Beliau seringkali menggunakan simbol huruf *ha'* (ح) bagi menunjukkan perpindahan kepada sanad-sanad yang lain disebabkan banyaknya sanad-sanad periwayatan yang beliau miliki bagi sesuatu riwayat itu.

Manakala berhubung ijazah am pula, Syeikh Yasin al-Fadani boleh dikatakan seorang ahli hadis yang tidak lokek. Berulang kali beliau menyebut dalam beberapa kitab sanadnya pernyataan tentang pengijazahan sanad kepada semua orang yang hidup di zamannya, dengan objektif untuk memberi manfaat kepada para penuntut ilmu dan menyebarkan sanad-sanad periwayatan. Sebagai contoh, di akhir kitab *Waraqat fi Majmu'ah al-Musalsalat wa al-Awa'il wa al-Asanid al-'Aliyyah* beliau menyebut :

هذا، وقد أجزنا بما في هذه ((الورقات)) كلَّ مَنْ أَرَادَ رَوَايَةَ ذَلِكَ عَنَّا مِنْ أَدْرَاكِ حَيَاتِنَا، وَكَذَا غَيْرِهِ، مِمَّا تَجُوزُ لَنَا رَوَايَتُهُ، وَتَثْبِتُ عِنَّا مَعْرِفَتَهُ وَدِرَايَتَهُ.

Terjemahan: “Demikianlah, dan kami telah ijazahkan dengan apa yang terkandung dalam kitab *al-Waraqat* ini semua orang yang ingin meriwayatkannya dari kami dari kalangan orang yang hidup semasa hayat kami, demikian juga yang lain, dari apa yang harus bagi kami meriwayatkannya, dan sabit pengetahuan dan pemahamannya dari kami”.¹

Di akhir kitab *al-'Ujalah fi al-Ahadis al-Musalsalah* beliau menyebut :

وقد أجزت بما جميع أهل عصري ووقتي، مِمَّنْ أَرَادَ الرَوَايَةَ عَنِّي. اهـ

Terjemahan: “Aku telah ijazahkan dengannya akan semua orang yang di zamanku dan masaku, dari kalangan orang yang ingin meriwayatkannya dariku”.²

¹ Muhammad Yasin al-Fadani, 1401H, *Waraqat fi Majmu'ah al-Musalsalat wa al-Awa'il wa al-Asanid al-'Aliyyah*, Kaherah: al-Matba'ah al-Salafiyyah, h. 31.

² Muhammad Yasin al-Fadani, 1985, *al-'Ujalah fi al-Ahadis al-Musalsalah*, c. 2, Dimasyq: Dar al-Basa'ir, h. 122.

Manakala di akhir kitab *al-Nafhah al-Miskiyyah* pula, ibarat ijazah beliau lebih luas lagi seperti berikut;

وقد أجزت بالأوائل السنبلية خاصة، وبهذه النفحة المسكية بأسانيدنا المتصلة بها، وكذا بجميع مؤلفاتي ومروياتي، كل من أراد جميع ذلك ممن أدرك حياتي، أو وُلد في السنين المتممة لعقد وفاتي. اهـ.

Terjemahan: "Aku telah ijazahkan dengan *al-Awa'il al-Sunbuliyyah* ini secara khusus, dan dengan *al-Nafhah al-Miskiyyah* dengan sanad-sanad kami yang bersambung dengannya, dan demikian juga semua karanganku dan riwayatku, akan semua orang yang inginkan semua itu dari kalangan orang yang hidup semasa hayatku, atau dilahirkan dalam tahun-tahun yang melengkapinya dekad kewafatanku".¹

Pandangan beliau ini tampaknya bertentangan dengan pendapat yang tidak mengharuskan ijazah am kepada semua orang yang masih hidup tanpa sebarang penentuan secara khusus. Secara ringkasnya, ia adalah masalah yang diperselisihkan oleh para ulama, dan secara zahir pula, Syeikh Yasin al-Fadani memilih pandangan yang mengharuskannya. Namun, majoriti berpendapat bahawa ijazah sebegini adalah jenis ijazah yang paling lemah.²

¹ Muhammad Yasin al-Fadani, *al-Nafhah al-Miskiyyah fi al-Asanid al-Muttasilah bi al-Awa'il al-Sunbuliyyah*, <http://montada.gawthany.com/VB/showthread.php?t=20269>.

² Berkenaan dengan ijazah am/umum kepada semua orang yang hidup pada masa hayat seseorang ahli hadis itu, al-Hafiz Ibn al-Salah menyebut dalam kitab *Muqaddimah*nya:

"النوع الثالث من أنواع الإجازة: أن يجيز لغير معين بوصف العموم، مثل أن يقول: "أجزت للمسلمين، أو: أجزت لكل أحد، أو: أجزت لمن أدرك زمانى"، وما أشبه ذلك، فهذا نوع تكلم فيه المتأخرون من حوز أصل الإجازة، واحتلوا في حوزة: فإن كان ذلك مقيداً بوصف حاصر أو نحوه فهو إلى الجواز أقرب. ومن حوز ذلك كله الخطيب أبو بكر الحافظ، وروينا عن أبي عبد الله بن منده الحافظ، أنه قال: أجزت لمن قال: لا إله إلا الله، وحوز القاضي أبو الطيب الطبري، أحد الفقهاء المحققين - فيما حكاه عنه الخطيب - الإجازة لجميع المسلمين، من كان منهم موجوداً عند الإجازة. وأجاز أبو محمد بن سعيد، أحد الجلة من شيوخ الأندلس: لكل من دخل قرطبة من طلبة العلم. ووافق على جواز ذلك منهم أبو عبد الله بن عتاب، رضى الله عنهم. وأنبأني من سأل الحازمي أبا بكر عن الإجازة العامة هذه، فكان من جوابه: أن من أدركه من الحافظ - نحو أبي العلاء الحافظ الهمداني العطار وغيره - كانوا يميلون إلى الجواز، والله أعلم. قال: ولم نر ولم نسمع عن أحد ممن يقتدى به أنه استعمل هذه الإجازة فروى بها، ولا عن الشرذمة المستأجرة الذين سوغوها. والإجازة في أصلها ضعف، وتزداد بهذا التوسع والاسترسال ضعفاً كثيراً لا ينبغي احتمالها، والله أعلم". انتهى

قال كاتب هذه السطور: هكذا قال ولكن الحق أن كثيرين ممن يقتدى بهم استعملوها ورووا بها، ومنهم غير من ذكره: أبو طاهر السلفي، وأبو الفتح نصر المقدسي، وعبد العزيز الكناي، وعبد الغني المقدسي، وأبو بكر ابن خير الإشبيلي، وأبو الفتح المستملي، وابن دحية، وأبو الحسن القفطي، أبو الوليد ابن رشد المالكي، والنووي، والدمياطي، وابن دقيق العيد، وابن كثير، وابن الحاجب، وابن جماعة، وأبو الحجاج المزني، والفخر ابن البخاري، وأبو سعيد العلائي، والنجم ابن فهد الهاشمي، والقطب محمد بن أحمد القسطلاني، والسبوطي، وابن حجر الهيتمي وإبراهيم بن حسن الكوراني ومحمد عابد السندی وآخرون - رحمهم الله -، وقال السخاوي في "فتح المغيث" (416/2): "حين أنه لكثرة من حوزها؛ أقردهم الحافظ أبو جعفر محمد بن الحسين البغدادي الكاتب في تصنيف رتبهم فيه على حروف المعجم،

5. Keprihatinan terhadap kitab-kitab periwayatan sanad, khususnya *awa'il, thabat, dan arba'inat*

Kitab yang menghimpunkan sanad-sanad periwayatan seseorang alim hadis disebut dengan berbagai istilah, seperti *thabat* (jamaknya *athbat*), *fahrasah* atau *fihris* (jamaknya *faharis*), *mu'jam* (pluralnya *ma'ajim*), *barnamij*, dan *masyyahah*. Menurut Syeikh 'Abd al-Hayy bin 'Abd al-Kabir al-Kattani, orang terdahulu memberikan istilah *masyyahah* bagi kitab yang menghimpunkan nama-nama guru dan riwayat-riwayat seseorang ahli hadis, kemudian mereka menamakannya pula selepas itu sebagai *mu'jam* kerana nama-nama guru disusun mengikut huruf hija'iyah. Maka, banyakkah digunapakai istilah *mu'jam* dengan *masyyahah* ini. Penduduk Andalus pula mengunapakai istilah *barnamij*. Kemudian pada abad-abad kebelakangan, ahli *masyriq* (dunia Islam sebelah timur) sehingga sekarang menyebutnya sebagai *thabat*, manakala ahli *maghrib* (dunia Islam sebelah barat) pula sehingga sekarang menyebutnya sebagai *fahrasah*.¹

Syeikh Yasin al-Fadani mempunyai banyak riwayat bagi kitab-kitab seumpama ini. Beliau juga memberi perhatian khusus kepada beberapa buah darinya, di mana beliau menerbitkannya semula sama ada dalam bentuk ringkasan, takhik, tashih ataupun ulasan ke atasnya. Antaranya ialah;

- 1- اختيار واختصار رياض أهل الجنة بآثار أهل السنة لعبد الباقي البعلبي
- 2- تعليقات على ثبت الشنواني
- 3- تعليقات على ثبت الشيراوي
- 4- تعليقات على ثبت الكزبري الحفيد
- 5- تعليقات على "حسن الوفا لإخوان الصفا، ثبت الشيخ فالح بن محمد الظاهري المهتوي" (ت 1328هـ).

وكذا جمعهم أبو رشيد ابن الغزال الحافظ (631هـ) في كتاب سماه: الجمع المبارك". اهـ، فقد تورع أئمة من أهل الحديث عن إجازة أهل العصر مع عدم إنكارها، كالعراقي، وتلميذه ابن حجر العسقلاني، وتلميذه السخاوي؛ كل ذلك منهم خوفاً من التوسع فيها، لا لعدم جوازها، والله تعالى أعلم. وقد صنّف السيد عبدالرحمن بن طه الحيشي - حفظه الله - كتاباً سماه: "وَيْلُ الْغَمَامَةِ فِي ذِكْرِ مَنْ أَحْزَرَ أَهْلَ عَصْرِهِ إِجَازَةَ عَامَةً"، وهو يقع في أكثر من 400 صفحة.

¹ 'Abd al-Hayy bin 'Abd al-Kabir al-Kattani, 1982, *Fihris al-Faharis wa al-Athbat*, c. 2, tahqiq: Dr. Ihsan 'Abbas, Beirut: Dar al-Gharb al-Islami, j. 1, h. 67.

- 6- " تعليقات على كفاية المستفيد لما علا من الأسانيد للترمسي ".
 7- الدر الثير في الاتصال بثبت الأمير.
 8- الروض النضير في اتصالاتي ومجموع إجازات مشايخي بثبت الأمير
 9- نهاية المطلب تعليقات على " سد الأرب في علوم الإسناد والأدب للأمير المالكي " ، أو إتخاف السمير بأوهام ما في ثبت الأمير.
 10- المقتطف من " إتخاف الأكابر بأسانيد المفتي عبد القادر " ، تخريج محمد هاشم بن عبد الغفور السندي.
 11- " الجامع الحاوي في مرويات الشرقاوي " ، عبد الله بن حجازي (ت 1227هـ).

Kitab-kitab yang disebut *awa'il*¹ juga dapat dimasukkan dalam kumpulan kitab di atas. Kitab *awa'il* yang paling masyhur ialah kitab *al-Awa'il al-Sunbuliyyah* susunan Syeikh Muhammad Sa'id Sunbul (m. 1175H) yang telah mendapat tumpuan ramai ahli ilmu dan para pencinta sanad. Bukti kemasyhurannya dapat dilihat di dalam riwayat Syeikh Muhammad Yasin al-Fadani, di mana beliau telah meriwayatkan kitab ini daripada 39 orang syeikh yang dihimpunkan kesemua sanad mereka di dalam risalah kecil berjudul *al-Nafhah al-Miskiyyah fi al-Asanid al-Muttasilah bi al-Awa'il al-Sunbuliyyah*. Jumlah keseluruhan perawi yang terdapat di dalam risalah ini adalah sekitar 190 orang, iaitu antara murid-murid Syeikh Muhammad Sa'id Sunbul sehingga guru-guru Syeikh Muhammad Yasin al-Fadani. Kebanyakan mereka terdiri daripada alim ulama besar yang berasal dari berbagai tempat di dunia Islam seperti Hijaz, Syria, Mesir, Maghribi, Yaman, India, dan juga Nusantara. Selain dari risalah berkenaan, beliau turut menyusun karya-karya berikut:

- 1- تعليقات على الأوائل السنبلية
- 2- العجالة المكية في أسانيد سعيد سنبل إلى مؤلفي الكتب الحديثية في أوائله
- 3- تعليقات على الأوائل العجلونية

¹ *Al-Awa'il* ialah sejenis kitab yang menghimpunkan hadis-hadis pertama yang terdapat dalam beberapa atau sejumlah kitab-kitab hadis. Tujuan kitab *al-Awa'il* disusun ialah bagi memudahkan penyusunnya mengijazahkan kitab-kitab hadis yang diriwayatkan dengan bersanad kepada murid-muridnya atau sesiapa sahaja yang ingin meminta ijazah daripadanya serta layak untuk menerimanya. Maka sesiapa yang meriwayatkan kitab *al-Awa'il* ini bermakna sanadnya bersambung secara langsung dengan penyusun-penyusun kitab-kitab hadis tersebut, dan seterusnya bersambung dengan Rasulullah SAW.

Syeikh Yasin al-Fadani turut mengambil berat terhadap kitab-kitab *arba'inat*, iaitu kitab yang menghimpunkan 40 buah hadis di dalamnya berdasarkan objektif tertentu. Beliau telah menyusun banyak siri *arba'inat*. Antara yang dihasilkan dan diterbitkan oleh beliau secara berasingan;

- 1-الأربعون البلدانية : أربعون حديثاً عن أربعين شيخاً من أربعين بلداً
- 2-أربعون حديثاً مسلسلته بالنحاة إلى الجلال السيوطي
- 3-الأربعون حديثاً من أربعين كتاباً عن أربعين شيخاً
- 4-شرح الجواهر الثمين في أربعين حديثاً من أحاديث سيد المرسلين للعجلوني
- 5-ورقات على الجواهر الثمين في أربعين حديثاً من أحاديث سيد المرسلين للعجلوني

6. Keprihatinan terhadap riwayat-riwayat musalsal dan sanad-sanad 'ali.

Hadis *musalsal* ialah hadis yang diriwayatkan secara berantai-rantai dengan sesuatu ciri, sifat atau situasi yang sama daripada awal sanad sehinggalah ke akhirnya. Jenis hadis ini mendapat perhatian istimewa di kalangan ulama mutaakhirin sehingga disusun kitab-kitab khusus untuknya. Ia turut diberi perhatian istimewa oleh Syeikh Yasin al-Fadani. Selain terhimpun dalam banyak karya-karyanya, beliau juga telah menghasilkan secara khusus beberapa buah kitab yang berkaitan dengannya, iaitu;

- 1-إتحاف أولي الهمم العلية بالكلام على الحديث المسلسل بالأولية
- 2-أربعون حديثاً مسلسلته بالنحاة إلى الجلال السيوطي
- 3-سلسلة الوصلة: مجموعة مختارة من الأحاديث المسلسلة (إجازة للقاضي السيد أبي بكر الحيشي)
- 4-شرح المسلسل بالعترة الطاهرة
- 5-العُجالة في الأحاديث المسلسلة
- 6-ورقات في مجموعة المسلسلات والأوائل والأسانيد العاليات

Beliau telah meriwayatkan hadis-hadis *musalsal* ini daripada ramai guru, serta lengkap dengan semua amali periwayatannya. Sebagai contoh hadis *musalsal* riwayat Syeikh Yasin al-Fadani, diberikan di

bawah hadis *musalsal* yang paling sahih sekali di sisi ulama hadis dari riwayat beliau, iaitu hadis *musalsal* dengan Surah al-Saff;¹

الحديث المسلسل بسورة الصف

أنا بما جمع من الأئمة، منهم: الشيخ عمر حمدان المحرسي والشيخ خليفة بن محمد النبهاني والشيخ علي بن فالخ الظاهري، عن والد الأخير الشيخ فالخ بن محمد الظاهري المدني، عن الشريف محمد بن علي السنوسي الخطّابي، عن علي الميلي الأزهرري، عن السيد مرتضى الزبيدي عن نور الدين أبي الحسن بن مكرم الله العدوي، عن الشمس محمد بن عقيلة، عن أحمد بن محمد النخلي، عن الفقيه المحدث الشمس محمد بن علاء الدين البابلي، عن أحمد بن محمد الشلي الخنفي، عن النجم محمد بن أحمد الغيطي، عن الشيخ زكريا الأنصاري، عن الحافظ أبي التّعيم رضوان بن محمد العقي، أنا أبو إسحاق التنوخي، أنا أحمد بن أبي طالب، أنا أبو المنجا ابن عمر اللّبي البغدادي، أنا أبو الوقت السجزي، أنا أبو الحسن الداودي، أنا أبو محمد السرخسي، أنا أبو عمران السمرقندي، أنا أبو محمد الدارمي في مسنده، أنا محمد بن كثير، عن الأوزاعي، عن يحيى هو ابن أبي كثير، عن أبي سلمة هو ابن عبد الرحمن بن عوف، عن عبد الله بن سلام قال: قعدنا نفرًا من أصحاب رسول الله ﷺ فتذاكرنا، فقلنا: لو نعلم أي الأعمال أقرب إلى الله عز وجل لعملناه. فأنزل الله عز وجل: {سَبِّحْ لِلَّهِ مَا فِي السَّمَاوَاتِ وَمَا فِي الْأَرْضِ وَهُوَ الْعَزِيزُ الْحَكِيمُ، يَا أَيُّهَا الَّذِينَ آمَنُوا لِمَ تَقُولُونَ مَا لَا تَفْعَلُونَ}، حتى ختمها. قال عبد الله بن سلام: قرأها علينا رسول الله حتى ختمها. قال أبو سلمة: فقرأها علينا ابن سلام حتى ختمها. وهكذا قال كل واحد من الراوة حتى وصل إلينا، فقرأها علينا أشياخنا المذكورون حتى ختموها.

Perhatian istimewa juga diberikan oleh ulama mutaakhirin terhadap sanad-sanad yang *'ali* (tinggi). Sanad *'ali* ialah sanad sebuah riwayat yang sedikit bilangan perawi di dalam rantaianya iaitu antara seseorang perawi hingga sampai kepada Rasulullah SAW, di mana jika ramai bilangan perawi di dalam rangkaian sanad tersebut pula, maka ia dinamakan sebagai sanad *nazil* (rendah). Syeikh Yasin al-Fadani turut memberikan perhatian kepada riwayat jenis ini. Selain

¹ Muhammad Yasin al-Fadani, 1985, *al-'Ujalah fi al-Ahadis al-Musalsalah*, c. 2, Dimasyq: Dar al-Basa'ir, h. 22.

terhimpun dalam banyak karya-karyanya, beliau juga telah menyusun kitab (الرياض النضرة في أسانيد عالية للكتب الحديثية العشرة). Dikatakan, sanad 'ali ulama Hijaz berakhir kepada tiga orang tokoh yaitu, pertama; Syeikh Mulla Ibrahim al-Kurani, kedua; Syeikh Falih al-Zahiri, dan ketiga; Syeikh 'Umar Hamdan al-Mahrisi.¹ Sanad ketiga-tiga mereka ini semua dimiliki oleh Syeikh Yasin al-Fadani. Sanad-sanad 'ali beliau ini juga telah direkodkan oleh muridnya, Syeikh Mahmud Sa'id Mamduh di dalam kitab: (إعلام القاصي والداني ببعض ما علا من (أسانيد الفاداني).

Justeru, kewafatan beliau menjadikan jarak sanad hadis melalui jalan beliau lebih jauh satu peringkat dengan Rasulullah SAW berbanding sebelumnya. Justeru, tidak terkejut jika Syeikh Yasin al-Fadani pada masa hayatnya selalu diburu oleh pencinta sanad hadis untuk mendapatkan silsilahnya yang lebih tinggi. Menurut pengajian ini, semakin kurang jumlah periwayat dalam isnad semakin tinggi nilai kesahihan sesebuah hadis dan semakin akrab pula dengan Rasulullah SAW.²

7. Pandangan dalam pentashihan dan pentad'ifan hadis-hadis

Pentashihan dan pentad'ifan hadis-hadis bukanlah suatu tugas yang enteng. Seseorang pengkritik hadis sebelum melakukan pentashihan dan pentad'ifan hadis mestilah mahir menguasai semua disiplin 'ulum al-hadis (ilmu-ilmu hadis) supaya hukum yang dikeluarkan olehnya dianggap autentik dan bernilai. Meskipun begitu, ada tiga jenis pengkritik hadis yang wujud di kalangan ulama ;

1. Golongan *mutasyaddid*, iaitu mereka yang agak keras dan ketat dalam soal pentashihan dan pentad'ifan.
2. Golongan *mutawassit*, iaitu mereka yang agak sederhana dalam soal pentashihan dan pentad'ifan.
3. Golongan *mutasahil*, iaitu mereka yang agak longgar dalam soal pentashihan dan pentad'ifan.

¹ Anas Ya'qub Kutubi, 1993, *A'lam min Ard al-Nubuwwah*, al-Madinah al-Munawwarah: t.n.p., j. 1, h. 176.

² Abdul Hayei Abdul Sukor, Dr., *Muhammad Yassin Isa al-Fadani 1916–1990M/1335–1410H*, <http://www.drhayei.com/2010/07/tokoh-islam.html>

Dalam berhadapan masalah *pentashihan* dan *pentad'ifan* ini, ada tiga macam pula pendirian ulama terhadapnya;

- 1- Ada ulama yang hanya berpada dengan hukum-hukum hadis yang telah dikeluarkan oleh ulama-ulama hadis terdahulu.
- 2- Ada sebahagian ulama pula tidak hanya berpada dengan hukum-hukum hadis yang telah dikeluarkan oleh ulama-ulama hadis terdahulu, lantas mereka mengkaji dan menyelidik setiap hadis yang digunakan serta mengeluarkan sendiri hukumnya.
- 3- Ada sebahagian lagi, mereka berpada dengan hukum-hukum hadis yang telah dikeluarkan oleh ulama-ulama hadis terdahulu pada suatu ketika, dan pada ketika yang lain pula mereka melakukan kajian ke atas hadis-hadis yang digunakan serta mengeluarkan sendiri hukumnya menurut keperluan.

Meneliti kepada karya-karya Syeikh Yasin al-Fadani, barangkali beliau dapat dikelaskan dalam kategori ketiga di atas. Ini kerana beliau adakalanya berpada dengan hukum-hukum hadis yang telah dikeluarkan oleh ulama-ulama hadis terdahulu, dan adakalanya pula beliau melakukan kajian ke atas hadis-hadis yang digunakan serta mengeluarkan sendiri hukumnya. Bagaimanapun, kedudukan beliau barangkali dapat dikategorikan berada di antara golongan *mutawassit* dan golongan *mutasahil* sekaligus kerana ciri kedua-dua golongan tersebut dapat kita temukan apabila kita meneliti hasil tulisan-tulisan beliau.

Contoh 1:

Ulasan Syeikh Yasin al-Fadani pada hadis:

لا تقوم الساعة حتى لا تنطح ذاتُ قرنٍ كمْاء.

Terjemahan: "Tidak akan berlaku kiamat sehinggalah seekor kambing yang bertanduk tidak lagi menanduk kambing yang tidak bertanduk".

Hadis yang hasan *isnadnya*. Diriwayatkan oleh Ahmad dalam *Musnadnya* dari ‘Ammar.¹

Contoh 2:

Ulasan Syeikh Yasin al-Fadani pada hadis:

مَنْ صَافَحَنِي أَوْ صَافَحَ مَنْ صَافَحَنِي إِلَى يَوْمِ الْقِيَامَةِ دَخَلَ الْجَنَّةَ.

Terjemahan: “Barangsiapa yang bersalam (berjabat tangan) denganku, atau bersalam dengan orang yang bersalam denganku sehingga ke hari kiamat, akan masuk ke syurga”.

Sangat daif. Kata al-Hafiz Ibn Hajar: Semua jalan-jalan riwayatnya tidak sunyi dari keraguan, walaupun al-Mu‘ammar sendiri (sk). Namun, tidak mengapa berdasarkan berbaik sangka bagi menyebutnya dan menyandarkan jalan-jalan riwayatnya.²

Namun sebagai manusia biasa tentunya tidak lari dari kekurangan-kekurangan, ini kerana adakalanya beliau tidak memberikan sebarang hukum kepada hadis-hadis yang dimuatkan dalam karya-karyanya, dan hadis-hadis tersebut terus ditinggalkan tanpa sebarang hukum ke atasnya, sama ada sahih ataupun tidak. Maka hal ini perlu diberi perhatian oleh mereka yang ingin menelaah dan mengkaji karya-karya beliau.

8. Keprihatinan terhadap ilmu *al-rijal* dan *al-ruwat*

Ilmu *al-rijal* dan *al-ruwat* adalah antara elemen penting dalam kajian sanad. Ilmu *al-rijal* asalnya secara khusus adalah berkaitan tentang hadis bagi memastikan sejauhmana tahap kebolehpercayaan terhadap para perawi yang meriwayatkan hadis-hadis Nabi SAW. Ilmu ini kemudian berkembang dengan meluas sehingga bukan sekadar terbatas kepada bidang periwayatan hadis semata-mata, bahkan mencakupi bidang-bidang ilmu lain yang turut dinukilkan

¹ Muhammad Yasin al-Fadani, 1401H, *Waraqat fi Majmu‘ah al-Musalsalat wa al-Awa‘il wa al-Asanid al-‘Aliyyah*, Kaherah: al-Matba‘ah al-Salafiyyah, h. 12.

² *Ibid.*

secara periwayatan dan bersanad. Tentunya dengan mengetahui kedudukan para perawi atau tokoh-tokoh dalam bidang-bidang tersebut dapat mengukuhkan lagi tahap kebolehpercayaan kita terhadap keaslian dan ketulenannya.

Menelaah karya-karya Syeikh Yasin al-Fadani, baik yang disusun sendiri mahupun yang ditahkik olehnya, tidak syak lagi membuktikan bahawa beliau adalah seorang yang mahir dengan seni ilmu *al-rijal* dan *al-ruwat*, terutamanya berhubung para perawi mutaakhirin. Sebagai misalnya, beliau telah merekodkan biografi 40 orang guru Syeikh 'Umar Hamdan (m. 1368H) berserta sanad-sanad mereka di dalam kitab *Matmah al-Wijdan fi Asanid al-Syaykh 'Umar Hamdan* yang setebal 3 juzuk, dan oleh kerana kitab tersebut terlalu besar, beliau telah meringkaskannya pula di dalam kitab *Ithaf al-Ikhwān bi Ikhtisar Matmah al-Wijdan*.¹ Dalam ijazahnya kepada Syeikh Muhammad Taqiy al-'Uthmani pula, beliau telah menyenaraikan 75 orang gurunya berserta kedudukan ilmiah dan tarikh kewafatan setiap seorang daripada mereka.²

Begitu juga penekanan diberikan kepada tokoh-tokoh yang berumur panjang dengan gelaran *al-mu'ammār* (المُعَمَّر) di awalnya, dan dalam membaris nama-nama dan gelaran-gelaran para perawi dalam sanad agar tidak tersalah sebutannya. Contoh-contoh sebegini banyak ditemukan dalam karya-karya Syeikh Yasin al-Fadani yang membuktikan bahawa beliau amat prihatin terhadap para perawi yang terdapat di dalam sanad-sanadnya. Ini menunjukkan bahawa beliau bukanlah sekadar seorang perawi biasa yang meriwayatkan sanad-sanad tanpa mengambil berat terhadap siapa perawi-perawi di dalam rantaianya atau bagaimana kedudukan mereka, tetapi sebaliknya beliau adalah seorang pakar dalam ilmu sanad dan juga *al-rijal*.

Sedikit sebanyak usaha para ulama seumpama beliau ini mengingatkan kita kepada peranan tokoh-tokoh besar ilmu *al-rijal*

¹ Muhammad Yasin al-Fadani, *Ithaf al-Ikhwān bi Ikhtisar Matmah al-Wijdan*, Beirut: Dar al-Basa'ir, h. 15.

² Muhammad Yasin al-Fadani (1986), *al-Fayd al-Rahmani bi Ijazah al-Shaykh Muhammad Taqiy al-'Uthmani*, Beirut: Dar al-Basya'ir al-Islamiyyah, h. 4.

dan *al-ruwat* dahulu seperti al-Khatib al-Baghdadi, Ibn 'Asakir, al-Mizzi, al-Dhahabi, al-Hafiz Ibn Hajar, al-Suyuti dan lain-lain, dalam merekodkan maklumat dan biografi kesemua tokoh-tokoh ilmuwan Islam. Ini kerana dikatakan kecemerlangan ilmu hadis mula malap pada kurun ke-10 Hijrah. Maka dengan usaha para ulama seperti Syeikh Yasin al-Fadani ini kita tidak kehilangan maklumat atau biografi tokoh-tokoh mutaakhirin, terutamanya selepas kurun ke-10 Hijrah yang merupakan kesinambungan daripada tokoh-tokoh sebelum kurun berkenaan. Dengan rekod ini, kita mampu membuktikan kepada masyarakat dunia bahawa pertalian ilmu-ilmu Islam ini sebenarnya tidak pernah terputus walau sedikit pun.

Meskipun Syeikh Yasin al-Fadani tidak menyusun sebuah kitab ilmu *al-rijal* dan *al-ruwat* dalam bidang hadis secara khusus, kecuali barangkali kitab *Qurrah al-'Ain fi Asanid A'lam al-Haramain* yang belum dapat ditelaah, namun beliau telah menyusun beberapa buah kitab yang berkaitan mengenainya dalam bidang-bidang disiplin yang lain, iaitu fiqh, usul, falak dan juga bahasa Arab. Karya-karya berkenaan ialah;

1- طبقات الشافعية الصغرى

2- طبقات الشافعية الكبرى

3- طبقات علماء الأصول والقواعد الفقهية

4- طبقات علماء الفلك والميقات

5- طبقات مشاهير النحاة وتسلسل أخذهم

9. Keprihatinan terhadap hadis dan tokoh-tokohnya di Nusantara.

Mungkin dapat dikatakan bahawa Syeikh Yasin al-Fadani adalah antara orang terawal yang mengambil berat mengenai kedudukan sanad-sanad hadis Nusantara dan juga tokoh-tokohnya. Tanpa usaha beliau barangkali masyarakat luar alam Melayu tidak mengenali sama sekali peranan dan sumbangan tokoh-tokoh dari Nusantara. Syeikh Yasin al-Fadani telah memelihara dan merekodkan sanad-sanad Nusantara ini di dalam karya-karya beliau, ataupun dengan menyelenggara dan menerbitkan kitab-kitab sanad mereka.

Melaluinya perawi-perawi Arab dan bukan Melayu mengenal istilah '*kiyahi*' dalam bahasa Jawa yang bermakna; syeikh, ustaz, atau orang alim, nama-nama tempat dan nama-nama tokohnya seperti ; Syeikh Nawawi bin 'Umar al-Bantani, Syeikh 'Abd al-Samad bin 'Abd al-Rahman al-Falimbani, Kiyahi Hasyim bin Asy'ari al-Jombang, 'Aqib bin Hasan al-Din al-Falimbani, Kiyahi Jam'an bin Samun al-Tanqarani, Uhaid @ Ahyad bin Idris al-Bogori, Kiyahi Ma'sum bin Ahmad al-Lasami, Kiyahi Baydawi bin 'Abd al-'Aziz al-Lasami, Kiyahi Baqir bin Nur al-Jogjawi, Mahfuz bin 'Abdullah al-Tarmasi, Kiyahi Khalil bin 'Abd al-Latif al-Bankalani, Kiyahi 'Abd al-Muhit bin Ya'qub al-Sidarjawi, Kiyahi 'Umar bin Salih al-Samarani, 'Ali bin 'Abdullah al-Banjari, Hasan bin 'Abd al-Syakur al-Sarbawi, Zain al-Din al-Sumbawi, Mahmud bin Kenan al-Falimbani, Arsyad bin 'Abd al-Samad al-Banjari, Tayyib bin Ja'far al-Falimbani, 'Abdullah bin Azhari al-Falimbani, Kiyahi Ahmad Marzuki bin Hamid al-Suwahani, Kiyahi Muhammad bin Yasin al-Fakalonkani, Haji 'Abd al-Hamid bin Zakaria al-Betawi, Syeikh Muhsin bin Raden Muhammad al-Sirangi, Kiyahi Siddiq bin 'Abdullah al-Lasami, Kiyahi Hasan bin Kiyahi Syams al-Din al-Qanquni, Kiyahi Bakri bin Sida al-Bantani, Qadhi Musa bin Ibrahim al-Melakawi, Qadhi Abu Bakar bin Hasan al-Muari, Syeikh 'Uthman bin 'Abd al-Wahhab al-Sarawaqi, Syeikh Muhammad Salih bin Idris al-Kelantani dan lain-lain.

Ada juga tokoh Nusantara yang dijoloki oleh Syeikh Yasin al-Fadani dengan gelaran ahli hadis seperti *Muhaddith Surabaya* bagi Syed Syeikh bin Ahmad Bafaqih. Menurut beliau, *muhaddith* di zaman mutakhir, dengan makna seorang *musnid* yang luas perwayatannya, dan memperoleh banyak kitab sanad dan *fihris* secara bersambung daripada tokoh-tokoh timur dan barat, dapat diungkapkan kepada kira-kira 130 orang alim ulama Nusantara. Antara yang paling banyak sanad perwayatannya ialah Muhaddith Syeikh 'Aqib bin Hasan al-Din al-Falimbani (m. 1182H), Syeikh 'Abd al-Samad bin 'Abd al-Rahman al-Falimbani (m. 1211H), Syeikh 'Abd al-Ghani bin Subuh al-Bimawi, Syeikh Mahfuz bin 'Abdullah al-Tarmasi (m. 1338H), Syeikh 'Abd al-

Hamid Kudus, Syeikh Mukhtar bin 'Atarid al-Bogori dan Syed Salim Jindan.¹

Berikut adalah contoh *sanad musalsal* dengan perawi-perawi Indonesia bagi *thabat* Syeikh Muhammad bin 'Ala' al-Din al-Babili:²

علي بن عبد الله البنجري وحسن بن عبد الشكور السرياوي، كلاهما مسلسلًا
بالإندونيسيين، عن زين الدين الصومباوي، عن المعمر نوي بن عمر البنتي، عن
محمود كنان الفلمباني وأرشد بن عبد الصمد البنجري، كلاهما عن المعمر عبد
الصمد بن عبد الرحمن الآشي الفلمباني، عن المعمر عاقب بن حسن الدين
الفلمباني نزيل المدينة المنورة، عن عمّه طيب بن جعفر الفلمباني، عن أبيه جعفر بن
محمد بن بدر الدين الفلمباني، عن المسند الشمس محمد بن علاء الدين البابلي بما
في ثبته. اهـ

10. Keprihatinan terhadap *sanad* ilmu-ilmu lain selain hadis

Para ulama bukan sahaja mengambil berat mengenai sanad-sanad hadis, malah mereka juga terutama ulama mutaakhirin mengambil berat mengenai sanad-sanad ilmu-ilmu lain seperti al-Quran, qiraat, fiqh, akidah, tasawuf, bahasa Arab dan sebagainya. Antara karya-karya berkaitan yang disusun oleh Syeikh Yasin al-Fadani ialah;

- 1-الكتب النحوية والصرفية الإرشادات السووية في أسانيد
- 2-الخزاعي في القراءات أسمى الغايات في أسانيد الشيخ إبراهيم
- 3- تشنيف المسامع بختتم كتاب جمع الجوامع للسبكي
- 4-طبقات مشاهير النحاة وتسلسل أخذهم
- 5-مشجرة بأسانيد الفقه الشافعي

Sanad-sanad ilmu-ilmu lain ini juga terdapat dalam kitab-kitab sanad yang disusun dan diriwayatkan oleh Syeikh Yasin al-Fadani, antaranya seperti dalam kitab رياض أهل الجنة للعلامة عبد (، بغية المرید فی علوم الأسانید) (الباقی البعلی dan lain-lain) (الوافي بذيل تذكّار المصافي) (، كفاية المستفيد للشيخ الترمسي) (، الباقي البعلی

¹ Lihat ulasan Muhammad Yasin al-Fadani dalam: *Kifayah al-Mustafid lima 'Ala min al-Asanid* oleh Syeikh Mahfuz bin 'Abdullah al-Tarmasi, Beirut: Dar al-Basya'ir al-Islamiyyah, h. 6.

² Muhammad Yasin al-Fadani, 1401H, *Waraqat fi Majmu'ah al-Musalsalat wa al-Awa'il wa al-Asanid al-'Aliyyah*, Kaherah: al-Matba'ah al-Salafiyah, h. 29.

PENUTUP

Dalam membicarakan ketokohan dan sumbangan Syeikh Yasin al-Fadani dalam disiplin ilmu hadis secara lengkap sebenarnya tidak dapat diungkapkan dalam sebuah artikel ringkas seperti ini. Ia dianggap hanya sekadar mampu mendedahkan sebahagian kecil sahaja daripadanya, tanpa menafikan kekurangan yang ada seperti pengulangan fakta yang sama dalam beberapa buah kitab, meskipun ia memberi faedah khusus yang lain. Walaubagaimana secara umum, sehingga kini, menurut pengamatan penulis belum ada lagi tokoh dari alam Melayu yang dapat menandingi ketokohan Syeikh Yasin al-Fadani dari sudut ilmu *riwayah al-hadis*, terutamanya bidang periwayatan sanad, bahkan tidak ramai pun tokoh dunia Islam yang seperti beliau. Dengan usaha tokoh-tokoh hadis seperti beliau inilah, umat Islam pada hari ini dapat berbangga dengan warisan khazanah pelbagai ilmu, khususnya ilmu hadis, yang kita warisi secara bersambung-sambung daripada nenek moyang kita, dari satu generasi ke satu generasi, yang tidak kita temukan tolok bandingnya pada umat-umat lain. Pemeliharaan sanad adalah satu seni ilmu dan sejarah yang wajar kita banggakan. Kalaulah tidak ada faedah lain daripada usaha tersebut kecuali barakah daripada Allah Taala semata-mata, nescaya itu sudah memadai. Namun, bagaimana tidak, sedangkan ianya mempunyai banyak faedah lain yang dapat diperolehi bagi mereka yang mampu meneliti dengan lebih halus dan teliti.¹ Wallahu a'lam.

Rujukan:

- 'Abd al-Baqi al-Ba'li al-Dimasyqi, 1985, *Riyad Ahl al-Jannah bi Athar Ahl al-Sunnah*, ikhtisar: Syeikh Muhammad Yasin al-Fadani, Dimasyq: Dar al-Basa'ir.
- Abdul Hayei Abdul Sukor, Dr., *Muhammad Yassin Isa al-Fadani 1916–1990M/1335–1410H*, <http://www.drhayei.com/2010/07/tokoh-islam.html>
- 'Abd al-Hayy bin 'Abd al-Kabir al-Kattani, 1982, *Fihris al-Faharis wa al-Athbat*, c. 2, tahqiq: Dr. Ihsan 'Abbas, Beirut: Dar al-Gharb al-Islami.
- Fayad al-'Absu, *al-Syaykh Muhammad Yasin al-Fadani al-Makki (1916-1990)*, <http://fayad-maktooblog.com/>
- Muhammad Abu al-Layth al-Khayr Abadi, Dr. (2003), *'Ulum al-Hadis Asiluhu wa Mu'asiruha*, Selangor: Dar al-Syakir.
- Mahfuz bin 'Abdullah al-Tarmasi, *Kifayah al-Mustafid lima 'Ala min al-Asanid*, ta'liq: Muhammad Yasin al-Fadani, Beirut: Dar al-Basya'ir al-Islamiyyah.

¹ Kewujudan sanad sehingga ke hari ini, bukan sekadar untuk *tabarruk* (mengambil berkat) dan *zikra* (kenangan) semata-mata. Ia adalah sirah, sejarah, anugerah, fadhilat, rahmat, toma'ninah, *khauf wa raja'* (takut dan harap), adab, syiar, iktibar, *sakinah* (ketenangan), *'izzah* dan lain-lain faedah ilmu dan rohani buat kita. *Wal-hamdulillah*.

- Martin van Bruinessen (1999), *Kitab Kuning, Pesantren, dan Tarekat: Tradisi-Tradisi Islam di Indonesia*, cet. 3. Bandung, Indonesia: Penerbit Mizan.
- Muhammad 'Ali Yamani, *al-Shaykh Muhammad Yasin al-Fadani (1335-1410)*, <http://www.makkawi.com/Articles/show.aspx?id=323>
- Muhammad Yasin al-Fadani, 1401H, *Waraqat fi Majmu'ah al-Musalsalat wa al-Awa'il wa al-Asanid al-'Aliyyah*, Kaherah: al-Matba'ah al-Salafiyyah.
- Muhammad Yasin al-Fadani, 1985, *al-'Ujalah fi al-Ahadis al-Musalsalah*, c. 2, Dimasyq: Dar al-Basa'ir.
- Muhammad Yasin al-Fadani, *Ithaf al-Ikhwan bi Ikhtisar Matmah al-Wijdan*, Dimasyq: Dar al-Basa'ir.
- Muhammad Yasin al-Fadani, 1997, *al-Fawa'id al-Janiyyah*, dengan mukadimah Ramzi Dimasyqiyyah, Beirut, Lubnan: Dar al-Fikr.
- Muhammad Yasin al-Fadani, 2008, *Asanid wa Ijazat wa Musalsalat al-Fadani*, Beirut: Dar al-Basya'ir al-Islamiyyah.
- Yahya al-Ghawthani, Dr., *Tarjamah Mukhtasarah li Musnid al-'Asr al-Syaykh Muhammad Yasin al-Fadani*, <http://montada.gawthany.com/vb/showthread.php?t=20557&highlight=%C7%E1%DD%C7%CF%C7%E4%ED>
- Yusuf al-Mar'asyli, Dr., 2006, *'Iqd al-Jawhar fi 'Ulama' al-Rub' al-Awwal min al-Qarn al-Khamis 'Asyar*, Beirut: Dar al-Ma'rifah.

Syeikh Abdullah Basmeih bin Muhammad Basmeih: Kajian Terhadap Mastika¹ Hadis²

Oleh: Mohd Farid Ravi Abdullah

(Institut Kajian Hadis, KUIS)

PENGENALAN

Selain mentafsir al-Quran al-Karim Sheikh Abdullah Basmieh juga giat menghasilkan kitab hadis yang menjadi nadi kepada al-Quran al-Karim. Menyedari akan kepentingan kedudukan hadis selepas al-Quran, Sheikh Abdullah Basmeih menghabiskan baki usianya untuk berkhidmat memasyarakatkan sunnah Rasulullah SAW. Para ulama telah mentakrifkan hadis dengan ucapan, perbuatan dan perakuan Nabi saw melalui jalan riwayat yang sahih. Ulama Islam sepakat menyatakan bahawa al-Quran hendaklah ditafsirkan dengan hadis-hadis Rasulullah SAW yang sahih yang merupakan dua beradik kembar yang tidak mungkin dipisahkan. Firman Allah s.w.t:

﴿يَتَفَكَّرُونَ وَلَعَلَّهُمْ إِلَيْهِمْ نُزِّلَ مَا لِلنَّاسِ لِيُبَيِّنَ الذِّكْرَ إِلَيْكَ وَأَنْزَلْنَا وَالزُّبُرِ بِالْيَتَنَّبِتِ﴾

Bermaksud: “... dan Kami turunkan kepadamu (wahai Muhammad) al-Quran yang memberi peringatan supaya engkau menerangkan kepada manusia apa yang telah diturunkan kepada mereka dan supaya mereka memikirkannya.”³

Allah SWT berfirman lagi:

﴿لَمْ يَأْمُرْكُمْ بِالْحِكْمَةِ وَالِاتِّقَابِ وَيُعَلِّمُكُمُ وَيُزَكِّيَكُمُ ءَايَاتِنَا عَلَيْكُمْ يَتْلُوا مِنْكُمْ رَسُولًا فِيكُمْ أَرْسَلْنَا كَمَا

﴿تَعْلَمُونَ تَكُونُوا﴾

Maksudnya: “Samalah seperti (nikmat) Kami mengutuskan kepada kamu seorang Rasul daripada kalangan kamu (Muhammad SAW), yang membacakan ayat-ayat Kami kepada kamu, membersihkan kamu (dari amalan syirik dan maksiat), dan mengajarkan kamu kitab

¹ Maksudnya: (Mastika) Permata yang bernilai, rupa atau kelakuan atau perkataan yang baik, lihat Kamus Dewan, edisi keempat, Noresah Baharom, 2005, Dawama Sdn. Bhd, Kuala Lumpur, hlm:1028.

² Dari sudut bahasa الحديث dan jamaknya أحاديث bermaksud baharu dan khabar (pemberitahuan). Ia adalah lawan bagi perkataan القديم lama. Dari sudut istilah: Ia adalah apa yang disandarkan kepada Nabi SAW sama ada perkataan, perbuatan, pengakuan, sifat jasmani atau rohani, atau sesuatu yang disandarkan kepada sahabat atau tabiin daripada perkataan atau perbuatan. (Syed Abdul Majid Ghouri, *Mu'jam al-Mustalahat al-Hadisyyah*, Dar Ibn Kathir, 2007, hlm: 303)

³ al-Nahl: 44

al-Quran serta hikmah (kebijaksanaan) dan mengajarkan kamu apa yang kamu tidak ketahui.”¹

Secara kesimpulannya, fahamlah kita bahawa tugas Rasulullah s.a.w adalah membimbing umat ini kejalan yang diredai oleh Pencipta. Untuk itu baginda berusaha menjelaskan tuntutan syariah berasaskan al-Quran dan turut menjelaskan persoalan-persoalan yang tidak diketemukan di dalam al-Quran, ini kerana baginda adalah *musyarri'* (yang mensyariatkan) perkara yang tidak ada dalam al-Quran².

Bagi masyarakat Malaysia yang beragama Islam membaca terjemahan al-Quran semata-mata pastinya tidak akan menemui pemahaman yang sempurna, ini kerana dalam banyak keadaan ayat-ayat al-Quran yang diterjemahkan masih sukar untuk difahami. Kegagalan memahami al-Quran bermaksud gagal memahami Islam dengan sepenuhnya.

Alhamdulillah, dengan adanya terjemahan kitab-kitab tafsir dari Bahasa Arab ke Bahasa Malaysia menjadi penawar bagi umat Islam dalam memahami *kalamullah*. Juga tidak ketinggalan sumbangan ulama nusantara dalam menyumbang karya-karya tafsir mereka, seperti Tafsir al-Azhar, karangan Pak Hamka, Tafsir Abr al-Ahtir oleh al-Marhum Syeikh Sonhadji (Meninggal 2010).

Namun demikian, ketiadaan karya-karya hadis dalam Bahasa Malaysia yang disusun dalam bentuk yang sistematik masih menjadi satu kekurangan yang sangat dirasai pada waktu itu. Menyedari hakikat ini maka Perdana Menteri ketika itu Tun Hj Abdul Razak Bin Datuk Husain telah mengarahkan BHEIS menerbitkan kitab hadis yang boleh membantu masyarakat Islam memahami Islam dengan lebih mendalam. Bagi merealisasikan tanggungjawab ini BHEIS telah meminta al-Marhum Syeikh Abdullah Basmieh menghasilkan kitab hadis yang menghimpun hadis-hadis Rasulullah saw yang kelak menjadi rujukan umat Islam di Malaysia. Amanah dan

¹ al-Baqarah: 151

² Lihat HAMKA, Tafsir al-Azhar, Pustaka Nasional PTE LTD, Singapura, 2007, jld:1, hlm: 345.

tanggungjawab ini telah digalas oleh Syeikh Abdullah Basmieh dengan penuh dedikasi dengan niat ingin terus menyumbang ilmu melalui hadis-hadis Rasulullah SAW. Maka terhasillah tiga jilid kitab Mastika Hadis yang telah sampai kepada seluruh masyarakat Islam di Malaysia.

BAHAGIAN A: BIOGRAFI SHEIKH ABDULLAH BASMEIH

1- Nama dan Keturunan

Nama penuh beliau ialah ^عAbdullah Basmeih bin Muhammad Basmeih¹. Ayah beliau Sheikh Muhammad Beameih bin Salleh. Basmeih berasal dari Hadramawt dan menetap di Mekah setelah Salleh Basmeih berhijrah ke sana. Manakala ibu beliau bernama Aisyah binti ^عAbdullah bin Hammad berbangsa arab yang berasal dari wilayah Bishah, Arab Saudi². Sebelum mengahwini Aisyah binti ^عAbdullah bin Hammad, Sheikh Muhammad Basmieh pernah berkahwin dengan seorang perempuan Melayu. Perkahwinan ini berlaku ketika Shiekh Mummad Basmeih ke tanah Melayu dan menjadi anak angkat kepada Cikgu Abdul Jalil yang tinggal di Melaka. Oleh kerana terlalu sayang kepada Syeikh Muhammad Basmeih cikgu Abdul Jalil mengahwinkannya dengan seorang perempuan Melayu dan memperolehi seorang anak perempuan. Walau bagaimanapun, beberapa bulan sekembalinya mereka ke Mekah, kedua-duanya telah meninggal dunia akibat demam panas. Selepas itu barulah ayah Muhammad Basmeih berkahwin dengan ibunya Aisyah binti Abdullah Hammad.

2- Kelahiran

Sheikh Abdullah Basmeih telah dilahirkan pada 29 Disember 1913³. Dalam catatan lain beliau dikatakan dilahirkan pada tahun 1915, ini kerana umur beliau sewaktu berhijrah ke Tanah Melayu pada tahun

¹ Basmeih atau asal sebutannya Basumaih, باسميح adalah di antara gelaran yang diberikan kepada golongan peniaga yang berasal dari Hadramawt, salah sebuah wilayah yang terletak di Yaman.

² Tanpa Pengarang, Kertas kerja Biodata Sheikh Abdullah Basmeih, t.t., Kuala Lumpur, JAKIM, hlm:1.

³ Tarikh yang dicatat di atas adalah berdasarkan kepada ingatan Abdullah Basmeih dan tidak ditulis di mana-mana sijil lahir.

1927 ialah 12 tahun¹. Beliau dilahirkan di kawasan bernama Ma'abdhah yang terletak berhampiran dengan Mekah. Beliau dibesarkan di bumi Mekah al-Mukarramah sehinggalah berhijrah ke Tanah Melayu selepas itu kerana mengikut bapa beliau.

Ibu Sheikh Abdullah Basmeih telah meninggal dunia semasa beliau berumur kurang dari dua tahun. Selepas itu beliau dijaga dan dibesarkan oleh ibu saudara beliau Khadijah Hammad². Khadijah Hammad dipanggil beliau sebagai “ ‘ammati wa khalati” iaitu yang bermaksud ibu saudara sebelah bapaku dan ibu saudara sebelah ibuku kerana beliau mempunyai hubungan kekeluargaan dengan kedua-dua belah pihak iaitu di pihak ayah dan ibu Sheikh Abdullah Basmeih³.

Sheikh Abdullah Basmeih hanya mempunyai dua orang adik beradik lelaki sebapa iaitu Sheikh Said dan Sheikh Salim. Kedua-duanya adalah hasil daripada perkongsian hidup Sheikh Muhammad Basmeih dengan wanita Melayu (isteri kedua) yang bernama Yang Chik binti Haji Kesah yang berasal dari Kampung Sungai Kertah Pengkalan Balak, Melaka⁴ yang dinikahinya ketika berulang alik ketanah Melayu menguruskan jemaah haji Malaysia.

3- Pendidikan

Sheikh Abdullah Basmeih adalah seorang tokoh ilmuwan terulung namun sejarah pendidikannya tidaklah sepertimana kebanyakan ulama' lain. Pendidikan awal Sheikh bermula semasa beliau kecil lagi iaitu semasa berada di Mekah al-Mukarramah. Semasa di sana beliau telah sempat belajar di Suq al-Layl. Beliau telah dihantar oleh ayah beliau untuk belajar agama di masjid Mekah semasa berumur 7

¹ Lihat Wan Ramizah binti Hasan, Sumbangan Sheikh Abdullah Basmeih dalam Bidang Tafsir: Kajian Khusus Terhadap kitab Tafsir Pimpinan al-Rahman, Tesis MA, University Malaya, Kuala Lumpur, 2000, hlm:112.

² Khadijah Hammad cukup dikenali di kampung kerana sering diundang untuk bersyair di majlis-majlis perkahwinan. Beliau tidak berumahtangga dan telah mengambil seorang anak angkat untuk dibela setelah Sheikh telah dibawa ayahnya ke Melaka. Beliau meninggal dunia pada tahun 1982 dan ahanya diketahui Sheikh ketika berkunjung ke Mekah pada tahun 1990.

³ Ibid.

⁴ Ibid.

tahun¹. Pembelajaran beliau ini hanyalah sekejap sahaja kerana semasa beliau berumur 12 tahun ayah beliau telah membawa beliau bersama berhijrah ke Malaysia di Pengkalan Balak Melaka. Bermula dari perpindahan itu, beliau telah dididik mengikut suasana masyarakat tempatan pada masa itu. Ini bermakna beliau ini sempat mempelajari ilmu agama di Mekah lebih kurang empat tahun sahaja. Kesimpulannya, pendidikan asas yang didapati sewaktu berada di Mekah serta penguasaan yang baik dalam bahasa arab adalah kunci sebenar kepada kejayaannya menterjemah sebahagian besar artikel-artikel dan kitab-kitab arab yang berbahasa arab².

Beliau telah dimasukkan ke sekolah Melayu Pengkalan Balak Melaka dan telah belajar sehingga lulus darjah empat³. Hasil daripada persekolahan dan persekitaran yang baik telah membolehkan beliau untuk menguasai bahasa Melayu dengan baik.

Selepas daripada itu beliau tidak dapat meneruskan pengajian ke peringkat lebih tinggi disebabkan masalah kewangan. Walaubagaimanapun beliau tetap gigih menimba ilmu dengan berusaha membaca sendiri antaranya Majalah Guru, hasil-hasil karangan pendita Zaaba dan sebagainya⁴. Beliau sendiri turut menyebut bahawa guru-guru beliau adalah buku-buku dan kemahuan yang mendalam.⁵

4- Perkerjaan

Sheikh Abdullah Basmeih adalah seorang yang gigih. Sejak kematian ayah beliau, beliau telah bertanggungjawab untuk berusaha mencari rezeki bagi meringankan beban ibu tiri beliau walaupun pada masa

¹ Lihat Wan Ramizah, 2000, op.cit, hlm: 112.

² Utusan Zaman, 9 Disember 1972, hlm: 9.

³ Lihat Wan Ramizah, 2000, op.cit, hlm: 116.

⁴ Wan Ramizah Hasan (2000), op.cit., hlm: 117-118.

⁵ Utusan Zaman, op.cit., hlm: 9.

itu beliau masih bersekolah¹. Beliau pernah menjual nasi lemak, menoreh getah, bersawah, menjual buah dan ikan².

Selain daripada itu, Sheikh juga pernah bekerja sebagai buruh di Triang Pahang, pembantu tukang masak di kantin Sekolah Inggeris Bandar Hilir Melaka, buruh di kilang getah Belanda di Pasir Panjang, peniaga kain dan pembuat dan penjual rojak.³

Semasa beliau berniaga rojak beliau telah berjinak-jinak dengan dunia penulisan. Artikel beliau pernah tersiar dalam akhbar Warta Malaya. Kebolehan beliau ini disedari oleh pengarang akhbar Utusan Melayu Haji Mohammad Dahlan Masood (Hamdan). Beliau telah memberi kepercayaan kepada Sheikh untuk menterjemah rencana-rencana agama daripada Majalah al-Musawwar untuk dimuatkan ke dalam Utusan Melayu. Selepas itu beliau terus serius berkecimpung di dalam dunia penulisan dan penterjemahan. Beliau pernah bekerja dengan Syarikat Qalam Press dan Syarikat Utusan Melayu⁴. Beliau juga pernah bekerja sebagai penulis dan penterjemah bebas⁵.

5- Perkahwinan

Pada tahun 1937, Sheikh telah berhijrah ke Singapura setelah merasai kurang selesa berkerja di Melaka. Di Singapura beliau berkerja sebagai buruh di salah sebuah kilang getah Belanda di pasir panjang dengan mendapat gaji 12 ringgit sebulan. Setelah jemu menjadi buruh beliau telah mencuba nasibnya dalam bidang perniagaan dengan menjaja kain dari rumah ke rumah berbekalkan modal 40 ringgit yang diberikan oleh ibu tirinya, Yang Chik binti haji Kesah⁶. Di Singapura seorang ahli perniagaan di Geylang Road, Haji Ali bin Mohd tahir telah banyak membantu dan membimbing Sheikh dalam bidang perniagaan. Melihat kepada ketekunan dan

¹ Ibid. Lihat juga Berita Minggu, 29 April 1984, hlm: 12.

² Jaafar Abdul Rahim, (1979), "Tokoh Bulan Ini, Sheikh Abdullah Basmeih Pengarang Yang Tidak Pandai Menaip", Majalah Dewan Siswa, Julai 1979, hlm: 5.

³ Jaafar Abdul Rahim (1979), *op.cit.*. Lihat juga Kertas Kerja Biodata, *op.cit.*, hlm: 2.

⁴ Ibid.

⁵ Ibid.

⁶ Lihat Majalah Dewan Siswa, *op.cit.*, hlm: 4.

kesungguhan pemuda ini Haji Ali telah mengajaknya tinggal di rumahnya. Pada tahun 1939, beliau mendirikan rumahtangga dengan anak haji Ali yang bernama Hajah Hawa Puteh¹. Umur Sheikh ketika itu lebih kurang 26 tahun, sementara umur Hajah Hawa baru berusia 16 tahun iaitu sepeluh tahun lebih muda dari Sheikh. Hasil perkongsian hidup dengan Hajah Hawa, Sheikh telah dikurniakan 23 orang anak namun yang hidup hanyalah 14 orang iaitu 6 lelaki dan 8 perempuan. Apabila ditanyakan kepada Sheikh tentang ramainya anak, beliau menjawab: “Yang penting ialah ramai anak melalui seorang isteri, bukan ramai anak yang dihasilkan melalui empat isteri².” Setelah hidup bersama selama 49 tahun Hajah Hawa terlebih dahulu kembali kerahmatullah meninggalkan Sheikh pada tahun 19 Julai 1987. Namun demikian Sheikh tidak sampai setahun menduda, malahan selang beberapa bulan telah mendirikan rumahtangga dengan Hajah Rahmah binti Abu Taib³. Mereka berdua telah diijab kabulkan pada 8 Februari 1988⁴. Namun hasil perkongsian hidup bersama, mereka berdua tidak dikurniakan anak. Walaupun demikian, anak-anak Sheikh dari hasil perkahwinan dengan al-Marhumah Hajah Hawa merasakan bahawa Hajah Rahmah adalah pengganti ibu mereka yang terbaik.⁵

6- Karya Sheikh Ketika Bertugas Di Malaysia

Sepanjang penglibatan Sheikh di dalam bidang penulisan, beliau telah banyak menghasilkan karya-karya yang amat berharga.

Antaranya ialah :

- i. Tafsir Pimpinan Ar-Rahman
- ii. Pengertian Ayat-ayat al-Quran (naskhah jawi dan naskhah rumi)

¹ Ibid.

² Lihat Berita Minggu, 29 April, 1984.

³ Puan Hajah Rahmah binti Abu Taib merupakan anak sulung daripada empat beradik, dilahirkan pada tahun 8 September 1939(tahun perkahwinan Sheikh), lihat Tanpa Pengarang, Hajjah Rahmah Abu Taib Bersara, Berkhidmat Lebih 13 Tahun, Majalah Menara, bil: 55, Jun 1996, hlm: 46.

⁴ Lihat Wan Ramizah, op.cit., Wawancara dengan Hajah Rahmah pada 30 Mei 1998, hlm: 147.

⁵ Lihat Wan Ramizah, op.cit., Wawancara dengan Puan Siti Aishah pada 2 Januari 1999, hlm: 148.

- iii. Mukadimah Mastika Hadis
- iv. Mastika Hadis Rasulullah s.a.w (iman- tauhid)
- v. Mastika Hadis Rasulullah s.a.w (sembahyang)
- vi. Khutbah Haji *Wada*^c- Khutbah Rasulullah s.a.w.
- vii. Panduan Mengurus Jenazah
- viii. Kedudukan Masjid Dalam Islam
- ix. Sejarah Hidup Siti Aisyah (1950)
- x. Sejarah Hidup Abu Bakar al-Siddik (1951)
- xi. Sejarah Hidup Nabi Muhammad (1952-1953)
- xii. Panduan Kanak-kanak Sembahyang
- xiii. Muqaddam al-Quran
- xiv. Hikayat Salahuddin al-Ayyubi

7- Karya Sheikh Ketika Bertugas Di Qalam Press, Singapura (1950- 1962)

Kebolehan Sheikh turut menaraik perhatian Syed Abdullah Hamid Al-Idrus, tuan punya penerbitan Qalam. Di sini Sheikh telah ditawarkan jawatan sebagai Pembantu Pengarang untuk majalah bulanan agama penerbitan Qalam. Dalam tempoh dua belas tahun Sheikh bertugas di Qalam Press beliau telah berjaya menterjemahkan lebih daripada 30 buah buku meliputi riwayat hidup Rasulullah s.a.w, isteri-isteri baginda, puteri-puteri baginda dan juga sahabat-sahabat baginda. Antara karya beliau yang dapat dijejaki ialah¹:

- i. Sejarah Hidup Siti Aisyah- Isteri Nabi SAW (2 Penggal- 1950)
- ii. Sejarah Hidup Baginda Ali (2 Penggal- 1950)
- iii. Sejarah Hidup Abu Bakar al-Siddiq (2 Penggal- 1951)
- iv. Sejarah Hidup Nabi Muhammad s.a.w (4 Penggal- 1952)
- v. Perempuan Islam (1952)

¹ Tanpa pengarang, Kertas Kerja Biodata Sheikh Abdullah Basmeih bin Mohd Basmeih, t.t, Kuala Lumpur, JAKIM, lihat juga, Jaafar Abdul Rahim, Tokoh Bulan Ini, Sheikh Abdullah Basmeih Pengarang Yang Tidak Pandani Menaip, Majalah Dewan Siswa, Julai, 1979, hlm: 5, lihat juga, Ahmad Idris, Abdullah Bameih Wartawan Ganas? Majalah Qiblat, Oktober, 1975, hlm: 4

- vi. Perempuan Dan Pilihanraya- Fatwa Ulama al-Azhar (1952)
- vii. Puteri Sepanyol (2 Penggal- 1952)
- viii. Sejarah Hidup Umar bin Al-Khattab (4 Penggal)
- ix. Sejarah Hidup Uthman bin Affan (2 Penggal – 1953)
- x. Sejarah hidup Saidina Husein Di Padang Karbala (2 penggal- 1953)
- xi. Berjihad Pada jalan Allah – diterjemah bersama rakan (1953)
- xii. Allah jalla Jalaluhu- Tauhid (1953)
- xiii. Qadha dan Qadar – Menurut Sayyid Jamal al-Din al-Afghaniy (1953)
- xiv. Taasub – Menurut Pandangan Syeikh Muhammad Abduh (1953)
- xv. Kesatuan Hukum-hukum Islam (1953)
- xvi. Wakil Rakyat Dalam Islam – diterjemah bersama rakan (1953)
- xvii. Sejarah hidup Bilal Tukang Bang Rasulullah s.a.w (1955)
- xviii. Puteri-puteri Nabi (1957)
- xix. Sejarah hidup Khalid al-Walid (1957)
- xx. Isteri-isteri Nabi (1958)

8- Anugerah Dan Bintang Kebesaran

Sumbangan dan khidmat Sheikh tidak dapat disangkal, hal ini sangat termaklum di kalangan umat Islam di Malaysia. Seorang yang sangat komited dengan ilmu pengetahuan, kebanyakan masanya dihabiskan dengan menulis dan menterjemah kitab-kitab agama yang menjadi rujukan asas umat Melayu pada ketika itu, dan sehingga sekarang kitab-kitab karangan Sheikh menjadi bacaan dan rujukan umat Islam terutamanya di Malaysia. Lebih-lebih lagi kejayaan beliau menterjemahkan al-Quran al-Karim. Lalu, bagi mengenang semua apa yang disumbangkan oleh Sheikh kepada agama dan negara maka beliau dianugerahkan beberapa bintang kebesaran, antaranya ialah pingat Ahli Mangku Negara (AMN) oleh yang dipertuan Agong

TuanKu Abdul Halim Mu'adzam Shah Ibn Al-Marhum Sultan Badlishah, Yang Dipertuan Agong Kelima pada tahun 1973¹. Manakala pada tahun 1989 pula, Sheikh telah dianugerah pingat Kesatria Mangku Negara (KMN) dari Yang Dipertuan Agong ketika itu ialah al-Mutawakkil cAlallah Sultan Iskandar². Pada tahun 1994, sekali lagi Sheikh menerima pingat anugerah Johan Mangku Negara (JMN)daripada al-Marhum TuanKu Ja'afar di Istana Negara³. Sheikh juga telah dianugerahkan sebagai Tokoh Maal Hijrah 1415 bersamaan 1994 peringkat Wilayah Persekutuan⁴.

9- Kewafatan

Sheikh telah kembali ke rahmatullah pada 14 Julai 1996 di rumah beliau yang terletak di Jalan Enggang Selatan, Taman Keramat. Pada ketika itu beliau berumur 84 tahun⁵. Sesungguhnya pemergian beliau merupakan satu kehilangan yang amat besar kepada negara kita lebih-lebih lagi apabila mengenangkan sumbangan beliau sebagai penterjemah al-Qur'an.

BAHAGIAN B : METODE SHEIKH ABDULLAH BASMEIH DI DALAM KITAB MASTIKA HADIS

1- Pengenalan Kitab

Selain dari menterjemahkan al-Quran al-Karim, serta buku-buku bahasa arab yang lain Sheikh juga telah diminta oleh kerajaan untuk mensyarahkan hadis-hadis Rasulullah SAW dan siri-siri hadis yang dipilih dan disyarahkan oleh Sheikh diberi nama Mastika Hadis Rasulullah SAW Usaha menterjemah hadis adalah suatu yang sangat sukar, kerana hadis-hadis ini perlu dipilih terlebih dahulu sebelum kerja-kerja terjemahan dibuat. Arahan bagi menyiapkan kitab hadis ini dibuat oleh Perdana Menteri Malaysia pada waktu itu Tun Abdul

¹ Majalah Dakwah, op. cit., hlm: 4-5.

² Ibid. hlm: 5.

³ Utusan Malaysia, 31 hb. Ogos 1994, hlm:

⁴ Ibid. lihat juga Tanpa Pengarang, Syeikh Abdullah Basmeih Tokoh Maal Hijrah 1415, Majalah Menara, bil. 49, September 1994, hlm: 8-9.

⁵ Utusan Melayu, 15 Julai 1996, hlm:

Razak bin Datuk Husain, agar diterbitkan sebuah buku hadis yang mengandungi pilihan-pilihan hadis yang sesuai sebagai bahan bacaan masyarakat di negara ini. Terdapat tiga jilid yang sempat disiapkan oleh Sheikh, manakala jilid keempat beliau hanya sempat mengumpulkan hadis-hadis yang berkaitan dengan ibadat haji tetapi tidak sempat menyiapkannya. Dalam jilid yang pertama beliau telah sertakan dengan muqadimah bagi Mastika Hadis, dengan memulakan penyusunan hadis-hadis yang berkaitan dengan istilah ilmu hadis, takrif hadis Nabi s.a.w dan hadis qudsi serta perbezaannya, turut membincangkan secara ringkas mengenai bahagian hadis dan kategorinya. Jilid pertama telah difokuskan dalam memuatkan hadis-hadis yang berkaitan dengan iman. Manakala jilid kedua mengandungi hadis-hadis yang secara khusus membincangkan solat yang menjadi tiang agama. Adapun jilid ketiga mengandungi hadis-hadis Nabi SAW yang berhubung dengan ibadat puasa, zakat dan sedekah. Ketiga-tiga jilid mastika hadis menjadi wahana kepada pembangunan kualiti hidup umat Islam, lebih-lebih lagi di dalam memahami dan menghayati Islam¹.

2- Fiqh Penyusunan Tajuk Dalam Mastika Hadis

Setiap kitab hadis yang dikarang oleh para ilmuan dan pakar dalam bidang hadis sudah pasti akan menyusun kitab mereka mengikut manhaj yang tertentu bagi memperlihatkan pendekatannya dalam menyampaikan hadis-hadis Rasulullah SAW secara tersusun dan mudah difahami oleh pembaca. Cara penyusunan itu, sebenarnya mencerminkan pemahaman mereka terhadap hadis-hadis yang mereka kumpulkan dalam kitab mereka. Imam Bukhari umpamanya terkenal dengan fiqhnya dalam menyusun kitab dan bab dalam sahihnya, begitunya dengan imam Muslim, serta *ashab al- kutub al-Sittah* dan selain dari mereka juga mempunyai pendekatan yang sama tapi tidak serupa.

Sepanjang penelitian terhadap kitab Mastika Hadis penulis dapati Sheikh Abdullah Basmeih telah menyusun bab-bab dan tajuk-tajuk

¹ Sheikh Abdullah Basmeih dan rakan, muqadimah Jilid: 1, tanpa halaman.

kecil di dalam setiap bab mengikut urutan yang mengikut urutan yang mudah difahami. Penyusunun ini juga adalah hasil selepas diambil kira keadaan masyarakat serta keperluan semasa. Jika ditinjau metode penyusunan Sheikh Abdullah Basmeih ianya bermula dengan memberi tajuk bab, kemudian disusuli dengan menterjemahkan bab samada dengan terjemahan ayat al-Quran atau terjemahan hadis Rasulullah SAW. Metode ini sangat mirip kepada metode Imam al-Bukhari di dalam sahihnya. Contohnya dalam bab yang pertama selepas memberi tajuk Sheikh Abdullah Basmeih membawa terjemahan ayat-ayat suci al-Quran. Misalnya dalam bab pertama jilid 1;

Sebenar-benar Perkataan Dan Sebaik-baik Jalan Pimpinan,

Firman Allah SWT, maksudnya: “ ... dan siapakah yang lebih benar perkataanya daripada Allah?... ”¹

*“ Allah telah menurunkan sebaik-baik perkataan iaitu kitab suci al-Quran...”*²

*“...dan sesungguhnya engkau (wahai Muhammad) tetap memimpin kejalan yang lurus.”*³

*“ Dialah yang telah mengutus rasul-Nya (Muhammad) dengan membawa hidayah petunjuk dan agama yang benar (Agama Islam)...”*⁴

Setelah itu barulah disusuli dengan hadis Rasulullah s.a.w. dalam bab dan disyarahkan dengan terperinci. Manhaj Sheikh dalam menghuraikan satu-satu hadis bab sangat menarik, seolah-olah beliau menyusun satu bentuk pedagogi pengajian yang mesra

¹ al-Nisa: 87

² al-Zumar: 23

³ al-Shura': 52

⁴ al-Fath: 28

dengan setiap lapis masyarakat. Menyelusuri metode Sheikh dalam Mastika Hadis ada lima peringkat seperti berikut;

- i- Terjemahan bab dengan ayat suci al-Quran
- ii- Hadis bab
- iii- Kandungan hadis
- iv- Huraian setiap kandungan
- v- Lampiran (jika perlu maklumat tambahan) contohnya, lampiran alif penulisan hadis Rasulullah SAW¹.

Pendekatan yang sebegini akan menjadikan pembaca dan yang mempelajari kitab ini secara bertalaqqi² akan terpandu dan terarah maklumat yang dibaca dan yang dipelajari, dengan demikian ilmu yang diterima akan membentuk pemahaman yang tuntas³.

3- Rujukan

Sheikh Abdullah Basmeih telah merujuk beberapa buah kitab hadis yang utama yang berkaitan bagi memastikan sumber rujukan yang benar-benar sahih dalam bidang hadis. Kelaziman seorang pengarang yang sentiasa mengambil berat mengenai kesahihan pendapat dan fakta pasti akan berhati-hati dalam mengeluarkan pandangan dan pendapat lebih-lebih lagi dalam dalam tulisan. Ini kerana apa yang dinukilkan dalam tulisan akan menjadi hujjah dan pengagangan, orang Islam apatah lagi pendapat itu berkaitan dengan ibadat. Justeru, bagi memastikan isi kandungan serta huraian hadis yang menepati kehendak atau hampir kepada kehendak dan maksud yang ingin disampaikan oleh Nabi SAW, maka hendaklah benar-benar dipastikan sumber rujukannya. Untuk itu, Sheikh telah merujuk kitab-kitab hadis yang muktabar sebelum membuat ulasan dari beliau. Usaha ini adalah semata-mata menjaga keharmonian sabda Nabi s.a.w dari disalah erti atau salah tafsir. Penulis mendapati Sheikh menggunakan rujukan yang berbeza dalam setiap jilid menghurai

¹ Lihat Sheikh Abdullah Basmeih, Mastika Hadis, JAKIM, Putrajaya, 2007, jld: 1, hlm: 13.

² Mengaji kitab secara berguru, guru membaca hadis dan mensyarahkan hadis anak murid mengikuti bacaan dan syarahan guru melalui kitab.

³ Maksud Tuntas ialah, menyeluruh, sempurna, komprehensif, ia jua bermaksud; singkat dan tegas.

hadis-hadis Nabi SAW. Contohnya dalam menyiapkan Muqaddimah Mastika Hadis di dalam jilid pertama sebanyak 42 dua hadis yang disyarahkan beliau telah merujuk sebanyak 26 kitab-kitab hadis yang muktabar¹.

Bil	Judul kitab	Pengarang
1	Sahih al-Bukhari	Muhammad bin Ismail al-Bukhari
2	Fath al-Bari	Ibn Hajar al- ^ʿ Asqalani
3	Irsyad al-Sari	Shihab al-Din al-Qathalani
4	^ʿ Umdah al-Qari	Badr al-Din al- ^ʿ Aini
5	Hidayah al-Bari	^ʿ Abd al-Rahim ^ʿ Anbar al-Thahthawi
6	Sahih Muslim	Muslim bin al-Hajjaj al-Qusyairi
7	Sahih Muslim Bi Syarh al-Nawawi	Muhy al-Din al-Nawawi
8	Al-Lu'lu' Wa al-Marjan Fima Ittafaqa ^ʿ Alaih al-Syaikhhan	Muhammad Fuad 'Abdul Baqi
9	Zad al-Muslim Fima Ittafaqa ^ʿ Alaih al-Bukhari Wa Muslim	Muhammad Anuar bin Anuar al-Syanqithi
10	Fath al-Mulhim	Syabir Ahmad al-Dyubandi al- ^ʿ Uthmani
11	Jami ^ʿ al-Tirmidzi	Al-Tirmidzi
12	Tuhfah al-Ahwazi	Abu al- ^ʿ Ali Muhammad 'Abd al-Rahman al-Mubarakfuri
13	Sunan Abi Daud	Abu Daud
14	^ʿ Aun al-Ma ^ʿ bud	Muhammad Syams al-Haq al- ^ʿ Azim Abadi
15	Sunan al-Nasaey	Abu ^ʿ Abd al-Rahman al-Nasaey
16	Sunan Ibn Majah	Ibn Majah
17	Al-Muwatta	Malik bin Anas
18	Tanwir al-Hawalik	Jalal al-Din al-Suyuti
19	Al-Musnad	Ahmad bin Hanbal
20	Misykah al-Masabih	Wali al-Din al-Tibrizi
21	Mirqah al-Mafatih	^ʿ Ali bin Sultan Muhammad al-Qari
22	Al-Taj al-Jami ^ʿ Li al-Usul	Mansur ^ʿ Ali Nasif
23	Faidh al-Qadir Syarh al-Jami ^ʿ al-Saghir	Al-Munawi
24	Al-Arba ^ʿ in al-Nawawiyyah	Muhy al-Din al-Nawawi
25	Syarh Al-Arba ^ʿ in	Ibn al-Hajar al-Mahthami
26	Syarh Al-Arba ^ʿ in	Ibn Rejab

Selain itu ada kitab-kitab yang lain yang menjadi rujukan Sheikh seperti berikut;

1	Al-Zawajir	Ibn Hajar al- ^ʿ Asqalani
2	Is'af Ahl al-Iman	Hasan Myishat
3	Tahzhib al-Furuq	^ʿ Ali Malikiy
4	Ihya' ^ʿ Ulum al-Din	Imam al-Ghazaliy

¹ Sheikh Abdullah Basmeih, Mastika Hadis, jld: 1, hlm: tanpa halaman.

Sebanyak 30 buah karya primeir telah dirujuk oleh Sheikh demi memastikan maklumat yang disampaikan adalah pandangan dan pendapat muktabar dari kalangan jumbuh ulama muktabar. Selepas membaca dan memahami kitab Mastika Hadis sebanyak 3 jilid penulis mendapati bahawa rujukan bagi setiap jilid dalam Mastika Hadis ada perbezaan dan penambahan. Apa yang telah dipraktikkan oleh Sheikh ialah bagi jilid pertama di dalam muqadimah beliau telah menggunakan 30 rujukan, manakala dalam jilid yang pertama sebanyak 46 buah kitab utama telah dijadikan sebagai rujukan yang meliputi kitab-kitab hadis, kitab-kitab tafsir dan kitab-kitab akidah. Di dalam jilid yang kedua yang terfokus kepada perihal taharah dan solat Sheikh telah merujuk sebanyak 45 buah kitab yang merangkumi kitab-kitab tafsir, hadis, feqah dan tasau¹. Manakala jilid ketiga yang membincangkan persoalan puasa, zakat dan sedakah Sheikh telah merujuk kepada 39 buah buku yang merangkumi kitab-kitab tafsir, hadis, feqah dan tasau².

4- Keistimewaan Kitab Mastika Hadis

Kitab Mastika Hadis yang telah diusahakan penulisannya oleh Sheikh Abdullah Basmeih dengan sokongan kuat dari Bahagian Hal Ehwal Islam, Jabatan Perdana Menteri ada keunikan dan keistimewaannya yang tersendiri dari sudut susunan, huraian dan kupasan. Lebih-lebih lagi belum ada sebuah kitab hadis yang seumpamanya pada masa itu. Pendekatan yang digunakan oleh Sheikh adalah pendekatan yang sesuai dengan segenap lapisan masyarakat yang dahagakan ilmu agama. Penjelasan-penjelasan mengenai hukum sesuatu masalah juga diperjelaskan dengan begitu baik dan mudah difahami. Sehingga setiap cetakannya pasti mendapat sambutan yang laur biasa dan diulang cetak bebarapa kali. Apa yang menariknya lagi ialah apabila kitab itu masih menjadi kitab pengajian di kebanyakan masjid di negara ini. Justeru, melihat dan meneliti kelebihan dan keistimewaan kitab-kitab Mastika Hadis adalah sangat perlu demi memastikan kitab ini terus didampingi kaum muslimin bagi menambahkan pengetahuan dan penghayatan terdahad agama Islam.

¹ Sheikh Abdullah Basmeih, Mastika Hadis, jld: 2, hlm: tanpa halaman (helaian rujukan hadapan)

² Sheikh Abdullah Basmeih, Mastika Hadis, jld: 2, tanpa halaman.

i- Muqaddimah Mastika Hadis dan Jilid Pertama

Muqaddimah Mastika Hadis telah diterbitkan pada 1973 sempena Pertandingan Membaca Al-Quran Peringkat Kebangsaan dan Antarabangsa. Ia diusahakan oleh Sheikh bersama dengan Dato' Haji Muhammad Noor Haji Ibrahim dan Tuan Haji Ismail bin Haji Yusof¹. Hadis-hadis yang terhimpun di dalam muqaddimah ini ialah sebanyak 42 hadis, disusun dalam 10 bab dengan harapan akan menjadi asas bagi hadis yang akan disusun dalam jilid-jilid akan datang. Di dalam bab pertama Sheikh dan rakan-rakannya telah membincangkan kedudukan sabda Nabi s.a.w yang dalam syariat Islam. Bab pertama ini dijudulkan dengan "Sebenar-benar Perkataan Dan Sebaik-baik Jalan Pimpinan". Turut dibincangkan dalam bab ini ialah sejarah penulisan hadis-hadis Rasulullah s.a.w. Bab kedua telah dibincangkan mengenai kewajipan berpegang teguh kepada kitab Allah dan jalan pimpinan Rasulullah s.a.w. di dalam bab ini telah dibincangkan kewajipan berpegang kepada al-Quran yang menjadi rujukan utama umat Islam. Manakala dalam bab yang ketiga Sheikh dan rakan telah memperhaluskan huraian mengenai agama yang benar-benar diredai Allah ialah Islam. Seterusnya di dalam bab yang yang keempat telah diteruskan perbincangan mengenai kelebihan agama Islam. Manakala dalam bab yang berikutnya, iaitu bab yang kelima telah dihuraikan rukun-rukun tiang agama yang meliputi persoalan iman, Islam dan ihsan. Di dalam bab yang keenam iman dan Islam menjadi tumpuan perbincangan bagi mencapai iman dan Islam yang sempurna. Bab ketujuh membincangkan kewajipan menuntut ilmu agama dan kelebihannya. Bab kelapan pula menfokuskan kewajipan menyampaikan ilmu agama dan kelebihannya. Bab kesembilan membincangkan kewajipan bersikap ikhlas dalam menuntut ilmu dan dalam mengerjakan sesuatu amal ibadat atau taat. Manakala di dalam bab yang terakhir, bab yang kesepuluh, mengajak setiap orang muslim agar membetulkan niat ini kerana nilai segala amalan adalah berdasarkan niat. Jelasnya, Sheikh dan rakan-rakannya telah meletakkan satu asas yang sangat penting di dalam beragama dengan memuatkan bab-bab yang menjadi tunjang utama kepada

¹ Sheikh Abdullah Basmeih, Mastika Hadis, Muqaddimah dan Jilid 1, hlm: 5-6.

ajaran agama Islam. Kegagalan seseorang muslim memahami tuntutan-tuntutan yang asas penyariatannya dari al-Quran dan sunnah yang telah dibincangkan dalam muqaddimah, akan memberi impak yang negatif dalam memahami Islam dan segalauntutannya.

Mastika Hadis jilid pertama mengandungi hadis-hadis yang berkaitan dengan iman atau ilmu tauhid. Ianya juga dihasilkan oleh Sheikh bersama dengan Datuk Haji Muhammad Noor dan Tuan Haji Ismail bin Yusof. Memandangkan jilid pertama menjadi tunjang kepada jilid-jilid berikutnya maka dalam muqaddimah jilid pertama ini mereka telah mengakui bahawa usaha mengumpul dan mensyarahkan hadis-hadis Rasulullah s.a.w bukanlah suatu yang mudah lebih-lebih lagi mereka bukan dari kalangan ahli dalam bidang hadis. Namun demikian mereka tidak mahu menyerah kalah sebelum berusaha ke arah itu. Memetik kata-kata mereka dalam muqaddimah:

“ kami sedar akan ceteknya kebolehan kami, khasnya dalam ilmu hadis Rasulullah s.a.w yang amat luas itu, meskipun demikian, kami beranikan juga diri kami dengan memasukinya dengan kaut bertawakkal kepada Allah serta memohon limpah taufik dan hidayah daripada Allah azza wa jalla¹”

Dalam jilid ini juga turut dijelaskan metode pengumpulan hadis. Hadis-hadis yang terkandung di dalam kitab Mastika Hadis ini mulanya dikumpulkan setelah itu diterjemahkan dan diikuti pula dengan huraian-huraian maksudnya, dengan berpandukan kitab-kitab huraian hadis dan pendapat-pendapat ulama yang difikir sesuai dengan keadaan masyarakat tanah air ini

ii- Mastika Hadis Jilid 2 (Ibadah)

Setelah muqaddimah dan jilid satu mendapat sambutan yang amat menggalakkan dari masyarakat Islam di Malaysia, maka jilid serusnya telah dapat disiapkan dalam bulan Disember 1983 dan dicetak pada Januari 1984. Berlainan daripada yang sebelumnya, jilid kedua ini

¹ Sheikh Abdullah Basmeih, Mastika Hadis Rasulullah s.a.w (edisi jawi), 2007, JAKIM, Putrajaya, cet:1, jld: 1, tanpa halaman.

dusahakan oleh Sheikh seorang diri. Walau bagaimanapun kitab ini disemak dan disahkan oleh S.S Tan Sri Dato Sheikh Abdul Muhsin al-Haj Saleh, Mufti Wilayah Persekutuan waktu itu. Ia dimulakan dengan kata-kata aluan oleh YAB Dato' Seri Mahatir Muhammd Perdana Menteri pada ketika itu. Di dalam kata-kata aluan YAB Perdana Menteri telah menzahirkan keperluan umat Islam kepada kitab syarahan hadis seperti Mastika Hadis ini di Malaysia bagi mempertingkatkan kefahaman yang sebenar. Di antara perkara yang penting lain yang disebut oleh YAB Perdana Menteri ialah kelak Mastika Hadis ini akan menjadi sebuah Inseklopedia hadis yang julung kali diterbitkan dalam bahasa Malaysia. Beliau turut menekankan usaha menerbitkan hadis-hadis Rasulullah s.a.w adalah bagi mengembangkan ilmu pengetahuan dengan jalan membasmi buta huruf dan buta agama¹.

Jilid kedua Mastika Hadis telah diterbitkan pada tahun 1984 manakala jilid pertama pada tahun 1973, ini bermakna setelah sebelas tahun barulah terhasilnya jilid kedua. Pada asalnya Sheikh Abdullah Basmeih bercadang mengumpulkan hadis-hadis yang berkaitan dengan hukum-hukum syarak yang meliputi, ibadah, muamalah (jual beli), munakahat, jenayah dan lain-lain soal masyarakat. Malangnya tidak dapat dikumpulkan kerana Sheikh dapati perbincangannya terlalu luas². Oleh yang demikian Sheikh hanya menghimpun dan menghurai hadis-hadis yang berkaitan dengan taharah yang menjadi kunci solat, dan membincang secara terperinci mengenai solat. Sheikh merancang untuk memuatkan hadis-hadis yang berkaitan dengan muamalah, munakahat dan jenayah di dalam jilid yang ketiga, tetapi ini tidak berlaku, apa yang dilakukan ialah jilid ketiga membincangkan ibadah puasa, zakat dan sedekah sahaja. Sheikh juga bercadang untuk menghimpun hadis-hadis yang berhubung dengan Ihsan (akhlak dan asuhan budi). Namun, Sheikh hanya sempat menyiapkan jilid yang ketiga sahaja³.

¹ Lihat Sheikh Abdullah Basmeih, Mastika Hadis, jld: 2, hlm: 4.

² ibid

³ ibid

Bagi menyiapkan kitab Mastika Hadis jilid kedua ini Sheikh telah merujuk 4 kitab tafsir yang muktabar, 19 buah kitab hadis, 17 kitab feqah yang kebanyakannya dari mazhab al-Syafiey dan kitab-kitab yang lain 5 buah. Sebanyak 260 hadis yang telah dimuatkan dalam jilid kedua ini, ini tidak termasuk dengan terjemahan hadis-hadis yang menyokong kepada hadis dalam bab atau hadis dalam tajuk-tajuk kecil¹.

Di dalam jilid kedua juga, Sheikh telah memulakan dengan pendahuluan dengan membicarakan Islam dan hukum-hukumnya. Di dalam pendahuluan ini beliau telah menjelaskan sumber hukum dalam Islam, pembahagiannya serta pengertian ibadah yang sebenarnya. Dengan pendekatan ini para pembaca dan pengkaji dapat meletakkan asas yang betul dan jelas sebelum perbincangan mengenai ibadah solat. Seterusnya, Sheikh telah memulakan bab satu dengan tuntutan kebersihan dan kesucian dalam Islam. Bab satu ini disusuli dengan 5 tajuk yang bersangkutan-paut dengan kebersihan, bermula dengan jenis-jenis air, jenis-jenis najis, perihal wudu, perihal mandi wajib, bertayammum dan perkara-perkara yang berkait dengannya. Manakala dalam bab kedua, iaitu bab Perihal Solat dan dibawah bab utama ini dimuatkan tajuk-tajuk yang berkaitan dengan solat, termasuklah persoalan yang berkaitan dengan azan, rukun-rukun solat, perkara-perkara sunat dalam solat, solat-solat sunat, sujud tilawah dan sujud syukur, sujud sahwi, perkara yang membetalkan solat, kedudukan masjid dalam Islam, solat berjemaah dan hukum-hukum berkaitan dengannya, solat musafir, solat jumaat, solat jenazah dan perkara-perkara yang berhubung dengan pengekebumian, hukum talqin dan perkara yang berhubung dengan kubur².

iii- Mastika Hadis Jilid 3

Kitab Mastika Hadis jilid ketiga telah disiapkan pada Jun 1995 bersamaan Muharram 1416 dan dicetak dalam edisi rumi pada tahun 1997. Ia juga diusahakan oleh Sheikh seorang diri. Selain daripada

¹ Ibid

² Lihat Sheikh Abdullah Basmeih, Mastika Hadis, jld: 2.

ayat-ayat al-Quran yang menjadi dalil-dalil asas, Sheikh juga memuatkan hadis yang menjadi penterjemah bagi al-Quran sebanyak 191 buah hadis yang disertakan dengan makna dan huraian¹. Turut dimuatkan sejumlah terjemahan hadis bagi menguatkan dan menyokong hujah-hujah yang dikemukakan dalam satu-satu bab atau topik. Setiap hadis diterangkan darjatnya dan disertakan dengan kitab rujukan. Sebanyak 39 buah kitab yang muktabar dijadikan rujukan, 3 buah kitab tafsir, 22 buah kitab hadis dan 9 buah kitab fiqh dan selebihnya adalah kitab-kitab yang lain. Bab pertama telah dibincangkan padanya perihal puasa bulan ramadhan, kelebihan bulan ramadhan, masalah rukyah, rukun-rukun puasa dan syarat-syaratnya serta sunat-sunatnya, perkara yang membatalkan puasa, hari yang dilarang berpuasa padanya, hukum puasa orang sakit dan orang musafir, puasa sunat, solat terawih dan kelebihannya, malam lailah al-Qadar, hari raya aid al-Fitri². Manakala dalam bab yang kedua Sheikh telah membincangkan perihal zakat, kedudukan zakat, jenis-jenis harta yang diwajibkan zakatnya, zakat fitrah, orang yang menerima zakat, kelebihan sedekah dan khairat³.

5- Perangkaan Penggunaan Buku Mastika Hadis Dalam Kelas Pengajian Hadis Di Masjid-Masjid Di Negeri Selangor

Sebanyak 36 buah masjid (9.55%) daripada keseluruhan 377 masjid di negeri Selangor melaporkan ada menggunakan buku Mastika Hadis sebagai buku rujukan kelas pengajian Hadis mereka. 30 buah masjid menjadikannya sebagai silibus utama mereka, 5 buah masjid sebagai alternatif kedua mereka dan hanya 1 buah masjid sebagai alternatif ketiga.

Ia pilihan ramai yang ketiga tertinggi selepas buku Hadis 40 (di 88 buah masjid) dan Riyadh al-Salihin (di 41 buah masjid) bagi kategori silibus pilihan yang utama dan Riyadh al-Salihin (di 10 buah masjid),

¹ Lihat Sheikh Abdullah Basmeih, Mastika Hadis, jld:3, hlm: 4.

² Ibid

³ Ibid

Hadis 40 (di 8 buah masjid) manakala Mastika Hadis (di 5 buah masjid) bagi kategori silibus alternatif kedua¹.

KESIMPULAN

Harimau mati meninggalkan belang manusia mati meninggalkan nama, tetapi Sheikh Abdullah Basmeih bukan sekadar meninggalkan nama malahan telah meninggalkan khazanah ilmu bagi umat Islam di Malaysia. Tafsir Pimpinan al-Rahman kepada Pengertian al-Quran dan Kitab Mastika Hadis telah melonjakkan nama Sheikh sebagai seorang tokoh sarjana Islam yang disegani ramai. Kitab Mastika Hadis yang telah diusahakan oleh Sheikh telah menjadi rujukan dan bacaan dari awal cetakan pertama pada tahun 1973 sehingga ke hari ini. JAKIM turut memainkan peranannya dalam menjaga kualiti kitab Mastika Hadis dengan mengedit ejaan, susun ayat serta pengeditaan ejaan jawi baru. Tanggungjawab mencetak dan mengedar buku ini digalas oleh JAKIM.

Memandangkan Sheikh hanya sempat mengumpul dan membincangkan hadis-hadis yang berkaitan dengan puasa di dalam jilid yang ketiga, maka perlu ada usaha bagi menyempurnakan tugas yang berbaki dalam mengumpul dan membincangkan hadis-hadis yang berkaitan dengan Haji, Munakahat, Jenayah dan Muamalat. Semoga semangat keilmuan yang dimiliki oleh Sheikh dicontohi oleh ilmuan Islam pada hari ini. Berdasarkan latar belakang pendidikan Sheikh tidaklah sehebat orang di masa kini, tetapi kesungguhan dan ketekunan Sheikh telah meninggalkan jasa yang sangat besar untuk umat. Mudah-mudahan ilmu yang bermanfaat yang disumbangkan oleh Sheikh menjadi syafaat untuknya di alam barzakh. Amin.

1- Bibliografi

- 2- Noresah Baharom, *Kamus Dewan*, edisi keempat, 2005, Dawama Sdn. Bhd, Kuala Lumpur,
- 3- Syed Abdul Majid Ghouri, *Muʿjam al-Mustalahat al-Hadisyyah, Dar Ibn Kathir*, 2007, hlm: 303)
- 4- HAMKA, *Tafsir al-Azhar*, Pustaka Nasional PTE LTD, Singapura, 2007
- 5- Tanpa Pengarang, *Kertas kerja Biodata Sheikh Abdullah Basmeih*, t.t., Kuala Lumpur, JAKIM,
- 6- Wan Ramizah binti Hasan, *Sumbangan Sheikh Abdullah Basmeih dalam Bidang Tafsir: Kajian Khusus Terhadap kitab Tafsir Pimpinan al-Rahman*, Tesis MA, University Malaya, Kuala Lumpur, 2000,
- 7- Utusan Zaman, 9 Disember 1972

¹ Kajian: Pengajian Hadis Di Masjid-masjid Di Negeri Selangor, INHAD. 2010.

- 8- Berita Minggu, 29 April 1984
- 9- Jaafar Abdul Rahim, (1979), *"Tokoh Bulan Ini, Sheikh Abdullah Basmeih Pengarang Yang Tidak Pandai Menaip"*, Majalah Dewan Siswa, Julai 1979
- 10- Tanpa Pengarang, Hajjah Rahmah Abu Taib Bersara, Berkhidmat Lebih 13 Tahun, *Majalah Menara*, bil: 55, Jun 1996,
- 11- Ahmad Idris, *Abdullah Bameih Wartawan Ganas?* Majalah Qiblat, Oktober, 1975,
- 12- Tanpa Pengarang, *Syeikh Abdullah Basmeih Tokoh Maal Hijrah 1415*, Majalah Menara, bil. 49, September 1994,
- 13- Sheikh Abdullah Basmeih, Haji Muhammad Noor bin Haji Ibrahim, Haji Ismail Bin Yusof, *Muqaddimah Dan Jilid Satu Mastika Hadis*, JAKIM, Putrajaya, cet: 1, 2007.
- 14- Sheikh Abdullah Basmeih, *Mastika Hadis, jld:2*, JAKIM, Putrajaya, cet:1, 2007.
- 15- Sheikh Abdullah Basmeih, *Mastika Hadis, jld:3*, JAKIM, Putrajaya, cet:1, 2007.